

## Luka Kulemgoep

### *Lukaŋe Yesugât den pat âlepŋe kulemgoep.*

<sup>1</sup> Apo Teopilo, Luâk âmbâle bikŋande Yesu olowâk maliŋe wan me wan bunŋe nengât tânâmnennân miawagep are ekmâ keinjânbak dâm luâk hârok maknengiyi.

<sup>2</sup> Dâm maknengimbiâ luâk unduwâkŋe den pat are heŋgemgowerâm kulemgoyi.

<sup>3-4</sup> Akto gâŋe keinjânbak den pat are nâŋgâen gârâmâ kulem esenŋe ire oyaŋmâ keiŋe nâŋgâm heŋgemgowiatgât den pat are hârogâk heŋgemgom tâŋ tâŋâk kulemgom katgindân. Den pat are hin.

### *Aŋeloŋe Sakaria miawagep.*

<sup>5</sup> Uŋguŋân Heroteŋe Yudaia yengât luâk humo malep. Mando âmâ yâk yengât sumbe kat kat luâk siâ malep kotŋe Sakaria, yâk Abia yâkgât kâmolân gâtŋe akto yâkŋe âmbâle siâ kotŋe Elisabete are âmâ Aroŋ yâkgât kâmolân gâtŋe are miep.

<sup>6</sup> Akto Anutugât dewunŋân manmâ bâleŋe bo akminiat. Âlepŋe manmâ Anutugât den are lokom manmâ gayiat.

<sup>7</sup> Akto luâk âmbâi lâuwâ are gupin akmâ manmâ gam sâmbâ agiat.

<sup>8</sup> Akto sumbe kat kat luâk yâkŋe amboŋân amboŋân akmâ Anutugât sumbe omini.

<sup>9</sup> Akto omini aregât sop tâlâgumbo âmâ humo-  
molupŋande hin dâyi, “Sakaria Anutugât biwiŋe geâkgât wan me wan omenâ higenŋe agalâk.”

dâmbiâ, sumbe kat kat emetņe ain âgâep. Âgâm sumbe ondo âmâ

<sup>10</sup> luâk âmbâle bikņande sumbe kat kat emetņe aregât kâlegen gam Anutu ulilaņmâ kili.

<sup>11</sup> Ulilaņmâ kinbiâ âmâ Anutugât aņelo siâņe Sakaria miawagaņmâ ombiâ higenņe agep aregât alata bungen kilep.

<sup>12</sup> Miawagaņmâ kindo luâk sâmbâ arekņe ekmâ sân sân mem hamep akmâ kilep.

<sup>13</sup> Hamewakmâ kindo aņeloņe hin dâm magaņep, “Sakaria bo hamewak. Âmbengande nanaņ luâk membiapgât Anutu ulilaņmâ gamat aregât bunņe Anutuņe nâņgâ aņdo âmbengande nanaņ siâ membiap aregât kotņe Yohane dâm konbiat.

<sup>14</sup> Akto miawakbiawân kambiamge heroņe akbiap. Akto miawakto ainâk luâk unduwâkņe aregât heroņe nâņgâwai.

<sup>15</sup> Akto nanaņânbak Anutugât Heakņande memeņe agaņbiap. Akto yâk âmâ Anutugât dewunņân luâk humo akmâ manbiap. Akto tu kârikņe bo nem manbiap.

<sup>16</sup> Akto miawakmâ manmâ âgâm Israe luâk mem hâwât yekto âmâ biwiyeņe Kotdâ Anutugâlân katmâ manbai.

<sup>17</sup> Akto emelâk Eliane Anutugât bâtnân manmâ kârikņe mem malep hainâk nangande manmâ âgâm Anutuņe hoņ bawaņe huņgun aņdo gewiap yâkgâlân luâk âmbâleņe biwiyeņe katņetdâm aregât arim den pat makyeņgiwiap. Akto hain dâm arim nanaņ akto ewelupyenande kuk akyeņgiwai are makyeņgimbo gala akyeņgiwai. Dâ den koko yâk makyeņgimbo ârândâņ manmai yâk yeņgât nâņgâ nâņgâgât dâp watbai. Akto Kembuņe ikeņe kâmot

olonyegep yâk yengât biwiyene agalâkgât nangingande makyengim âgâwiap.” dâep.

18 Anutugât anelone hain dâambo Sakariaᅇe hin aikoep, “Net luâk âmbâi sâmbâ agiotgât gâᅇe nanaᅇgât dâmenâ nâᅇgâre bunᅇe bo aktâp hain dâm aktân. Gain gain nâᅇgâre bunᅇe akbiap?” dâep.

19 Hain dâambo anelone hin dâm maganeᅇe, “Agon aktere nâᅇgâ. Nâ Gabirie, nâ Anutugât hoᅇ bawa manman. Ire nek. Huᅇgun niᅇdo gem den bunᅇe makᅇiᅇdân.

20 Gârâmâ heniᅇdât dât aregât dosa amâ hin akbiat. Gâᅇe kopa akmâ den bâlâk manmâ âgâmenâ den yu makᅇiᅇdân ire bunᅇe akbiap sop ain amâ âlepᅇe akbiat.” Hain dâm ainâk heambukto Sakaria iᅇiᅇeâk kilep.

21 Sakariaᅇe sumbe emetᅇân âgâm sop kâlep mando luâk âmbâleᅇe gain gain akmâ sop kâlep mandâp dâm aregât han lâuwâ agi.

22 Hain akbiâ emelâk yâk yengâlân gem amâ den makyengiwerâm akto amâ laᅇᅇe tigiakto kopa ageᅇ. Kopa akto aregât hin dâyi, “Yâk amâ sumbe emetᅇân âgâambo biwiᅇe purik kato kulem siâ miawaktâp are ektâp.” Hain dâmbiâ yâkᅇe bâᅇᅇandeak kulem akmâ den makberâm hâumgoep.

23 Hain akmâ tato amâ âi sopᅇe bo ageᅇ. Âi sopᅇe bo akto keᅇian purik katmâ ariep.

24 Purik katmâ arimbo manbela emelâk âbenᅇande tepᅇe ageᅇ.

25 Tepᅇe akmâ amâ hin dâep, “Anutu Kotdâᅇe nâᅇgâ niᅇdo tepᅇe aktân aregât luâk âmbâle dewunyeᅇân aᅇun hulaᅇ akniᅇdâp.” dâep. Hain

dâm emetṅânâk tato dewutâ momerâk bo agep.

*Aṅeloṅe Mariagâlân miawagep.*

<sup>26</sup> Dewutâ momerâk bo akto âmâ Anutuṅe aṅelo kotṅe Gabirie are lâuwâṅe huṅgun aṅep. Huṅgun aṅdo Nasarete kepia are Galilaia hânân talep ain âmbâle sigan siâ malep yâkgâlân giep.

<sup>27</sup> Akto âmbâle sigan are kotṅe Maria are Dawidigât kâmolân gâtṅe luâk siâ kotṅe Yosepe yâkgât dâtâṅe malep.

<sup>28</sup> Akto aṅelo arekṅe maganmâ kinmâ hin dâep, “Anutuṅe gekmâ âmbâle âlepṅe aktât nâṅgâm memene akṅiṅdâp aregât herone ak.” dâep.

<sup>29</sup> Aṅeloṅe hain dâambo nâṅgâambo biwiṅe umatṅe akto biwiṅande hin nâṅgâep, “Den makniṅdât aregât keiṅe gain gain?” dâep.

<sup>30</sup> Hain dâambo aṅeloṅe hin maganep, “Maria, gâ bo hamewak. Anutuṅe gekmâ âlepṅe manmat nâṅgâp.

<sup>31</sup> Aregât gâṅe nananṅ mem kotṅe Yesu dâm konbiat.

<sup>32</sup> Yâkṅe âmâ luâk humo tâmbâ mando âmâ Anutu Humo dondâ yâkgât nanṅe dâwai. Akto Humo Anutuṅe bâṅinenṅe Dawidi yâkgât gewâkṅân kato

<sup>33</sup> Yakobogât kâmot nengât luâk kotdâ manbiap. Akto luâk damunyeṅe akmâ âi mem kârikṅe manmâ âgâwiap.” dâep.

<sup>34</sup> Hain dâambo Mariane hin dâm maganep, “Nâ luâk bâlâk mandâṅgât den are âmâ gain gain akmâ kârikṅe akbiap?” dâambo

<sup>35</sup> aṅeloṅe hin maganep, “Anutugât Heakṅande tigi gekto Anutu Humo yâkgât bâṅnân kinmenâ

meme akgiŋdo ain gâtŋe nanan membiat aregât kotŋe siâ kau salek salek are Anutugât nanŋe konbai.

<sup>36-37</sup> Akto den siâ makgiŋdere nânġâ. Anutuŋe hain akberâm aregât bo ewum pâpkomap. Lâuge Elisabete are gupinâk manmâ âmbâi sâmbâ aktâp yâk Anutuŋe meme agaŋdo tepŋe akmâ nanan luâk membiap. Akto dewutâ nâmbulân konok bo akto aregât kakŋân âmbâi gupin dâmai are hain miawaganbiap.”

<sup>38</sup> Aneloŋe hain dâambo Marianje hin dâm maganep, “Nâ Humogât hoŋ bawa âmbâle aregât den maktât are hanâgâk akniŋbiap. Hanâgâk akniŋdo âmâ âlepŋe dâwian.” dâambo anjelo are purik katmâ ariep.

*Marianje Elisabetegâlân ariep.*

<sup>39</sup> Akto Maria manmâ âgâambo kâlep bo akto âgâm arim Yudaia hân gimbanġân kepia siâ talep ain ariep.

<sup>40</sup> Ain arim Sakariagât emelan âgâm Elisabete ekmâ maganmâ heronje agaŋep.

<sup>41</sup> Heronje agaŋdo nânġambo ainâk tepŋe kâlegen nanan arekŋe piriŋ piriŋ kalep. Hain akto Anutugât Heakŋe Elisabete kautŋân mendo hin dâm maganep,

<sup>42</sup> “Lâune Anutuŋe meme akgiŋdo gâŋgât heronje maronje arekŋe âmbâle hârok yenġât ewangiyekbiap. Akto Anutuŋe nanan membiat aregât tângowiapġât heronje akbiap.

<sup>43</sup> Gâŋe Kembunenŋe membiat are nânġâm hin nânġân. Nâmâ âmbâle yânŋe mandân aregât nânġâlân togomenâ ârândâŋ bo aktâp.

44 Togom nogonmenâ ainâk nanan tepnân heronje akmâ bam guto nângân.

45 Akto den siâ makbe. Emelâk Anutuņe makgiņep are bunņe akbiap aregât biwige heronje aktâp.” dâep.

*Marianje Anutu maganmâ heronje agep.*

46 Hain dâmbo Marianje hin magep, “Nâņe Anutugât kotņe mem agatmâ hin dâwe.

47-48 Nâ Anutugât hon bawa manmâ âmbâle yânņe mandân. Aregât Anutu Humonje nângât okot nângâ niņmâ mem agat nektâp. Mem agat nekto luâk kâmotņe kâmotņe nângât nângâm Anutuņe tângombo heronje akmap dâmai.

49 Anutu Humo dondâ arekņe damunne akmap arekņe wan me wan âlepņe akniņep aregât kotņe mem agatmâ âmâ Anutugât biwine heronje aktâp.

50 Akto luâk âmbâle bikņe nenņe Anutugât hamewakmâ denņe lokoenņe nengât biwinenņe nângâm yaiwâk aknengim âmâ bâgilupnenņe miawakbai are hainâk hainâk akyenģiwiap.

51 Anutuņe wan me wan mem miawak yenģiwerâm akto aregât niņande luâk âmbâle hâkyeņe mem bâliwiap? Akto agatmâ, “Nenņeak humo akten.” dâmbiâ are mem biwiyeņe gulip yenģumbo awam akmai.

52 Akto bikņande luâk humo akmâ mem damunyeņe akberâmbiâ hain are mem gulip yenģumap. Hain akbiâ âmâ luâk yânņe me luâk gegeņe are mem agat yekmap.

53 Akto mop yenģimap yâk yenģât damunyeņe akmâ sot yenģimap. Akto luâk sikum olop manbiâ yâk mem gulip akyenģimbo yân manmai.

54 Akto ulikñân âmâ den dâm bâgilupnenne yenğât pat dâtâne makyenğiep aregâlâk nânğâm manmap, aregât Israe luâk âmbâle nengât han kalem akmâ damun akmap.

55 Akto bâgilupnenne Abrahamğât kâmot okotne nânğâ nengimbo nen Abrahamğât kâmot akmâ manmâ âgâwaen nengât dâtâne aregât bunne mi-awaktâp. Aregât kotne mem agatbe.” dâep.

56 Mariane hain dâm Elisabete olop malep. Akto yâk olop manmâ dewutâ âlâwu bo akto kepianân purik katmâ ariep.

### *Yohane miawagep.*

57 Purik katmâ arimbo Elisabete sopne mi-awakto manmâ nanan miep.

58 Mendo âmâ lâulupne kepia ambolupñande Anutu Humone Elisabete okotne nânğâepgât nânğâm yâk olowâk kambiamyene herone agep.

59 Hain akbiâ hilâm nâmbulân âlâwu bo akto âmâ mendugum nanan aregât hâkne gâiwerâm âmâ eweñaet kot nambe Sakaria are konberâm agi.

60 Hain akbiâ memenande hin makyenğiep, “Bo. Kotne Yohane konberen.” dâep.

61 Hain dâambo hin magaņi, “Are âmâ tâulupge yâk yenğâlân gâtne siâ kot nambe hain are siâ bo tatâp.” dâm magaņgi goaņgi akmâ hin dâyi,

62 “Eweņe luâk kopa are gain gain nânğâp?” dâm bâtyenandeak kulem akbiâ

63 tapeğât ulityenğimbo tape papaņe siâ mem waņi. Waņbiâ gâwu mem hin kulemgoep, “Kotne Yohane konberen.” hain kulemgoep.

<sup>64</sup> Kulemgombo oyaŋmâ nâŋgâmbiâ ainâk den miawagaŋep aregât Anutugât kotŋe mem agalep. Kulem are miawakto

<sup>65</sup> kepia ambolupŋande nâŋgâmbiâ dâtŋe akto kulem aregât hanyeŋe lâuwâ akto den arekŋe herone akmâ sambelem kepia ewumâk ewumâk hârok ariep.

<sup>66</sup> Luâk âmbâle Yuda gimbaŋe tete kepiaŋe kepiaŋe maliŋe den are nâŋgâm hin dâyi, “Nanaŋ hain arekŋe humo akmâ gain gain akbiap?” hain dâm hanyeŋeâk akmâ nâŋgâyi. Akto Humone tângombo malep.

*Sakariaŋe Yesugât keiŋe dâm miawagep.*

<sup>67</sup> Akto Anutugât Wâtgât memenande nanaŋ aregât eweŋe Sakaria kautŋân mendo den kârikŋe hin dâep,

<sup>68</sup> “Israe luâk nen Kembunenŋe Anutu mepaiŋe mene. Yâkŋe âmâ luâklupŋe mete katnengim gan-nenŋe dâmap.

<sup>69</sup> Hain akmâ âmâ Dawidi yâkgât tepŋân gâtŋe konok miawagaŋmâ heŋgemgo nengiwiapgât hambo kunkun akbiapgât anuŋep.

<sup>70</sup> Amâ tâmbâŋe dondâ hân miawagewânba ain propetelupŋe makyenŋimbo den makmâ mali dopŋân hainâgâk miawaktâp.

<sup>71</sup> Akto siâŋe gasa aknengiwiap. Aknengim âmâ hilipnenguwerâm akbiâ âmâ tân nengumbo âlepŋe manbaen.

<sup>72</sup> Akto ulikŋân Anutuŋe bâgilupnenŋe yeŋgât okotŋe nâŋgâm den kârikŋe katyeŋgiep are kambiamyeŋân kato tato bo nelâm aŋep.



<sup>73</sup> Akto tân nengumbo ainâk gasalupnennande bo hilip nenguwai aregât pat Abraham are makmâ hâreaņep.

<sup>74</sup> Aregât Israe nen hârogâkņe Humonenņe Anutugât âlepņe dâm ikinę den lokom bo hamep akmâ

<sup>75</sup> wan me wan bâleņe bo akmâ gala konok akmâ biwi irakņeâk manbaen.

<sup>76</sup> Nanne gâ irekņe sigan akmâ Humonenņe ulik gulik aganņiat. Gâņe soņ akmâ aregât hin dâm makyenņiwiat, “Humonenņe irawot togom heņgem nenguwiap aregât nâņgâ nâņgâyeņe bâleņe hep-unbiâ biwiyeņe Anutugâlân ari kindo Anutuņe kambiamņe nâņgâm dosayeņe hepun yeņgiwiâp.” dâm makyenņimenâ nâņgâwai.

<sup>77</sup> Gâ hain akmâ kembu luâklupņe âlepņeet den potatmâ yeņgimenâ nâņgâm heņgemgombiâ dosayeņe bo akbiâp.

<sup>78</sup> Anutunenņe han kalemņe humo yendâpgât dâmbo egonba hândâktâk pagalem arekņe

<sup>79</sup> hândâkņân akto momo bâlâpņân talion nen mem hauņ nenekmap. Akto oloņnenekmâ dâp sândukņân katnenekmap.” Sakaria hain dâep.

<sup>80</sup> Akto nanaņ are hagitņe tiņ tiņ dâmbo hâk biwi olowâk humo agep. Humo akmâ manmâ eweņe memene hepun yelekmâ hân kamitņângen luâk bo manmaiângen arim malep. Manmâ manmâ makyenņiwiapgât sop tâlâgumbo âmâ purik katmâ Israe luâk âmbâle hutyeņân arim miawakmâ malep.

## 2

*Yesu nanaņ miawagep.*

1-2 Akto uliknân kiap humo siâ kotnje Kuirinio yâk Siria yenğât kiap humo malep sop ain âmâ Roma luâk kotdâ siâ malep kotnje Augusto yâkne den kârikne hin dêep, “Luâk hânne hânne areyenğât kotyene oyanjekbiâ yekbian.” dêep. Are âmâ agak meme hain are umbunân bo agi. Irakne keine katmâ kulemgoyi.

3 Keine katmâ hârogâk oyan yekberâm akto aregât kepia yenğangenba hârogâk purik katmâ arim meteyi.

4 Arimbiâ Nasarete kepia are Galilaia hânân talep ain gâtne luâk siâ kotnje Yosepe, are Dawidigât kâlegen gâtne are hainâk Yudaia hânân Dawidigât kepia kotnje Betelehem ain ariwerâm âmbâle ikinje dâtâne are kewugumbo olop ariyat.

5 Yosepe akto âmbâi patne dâtâne kotnje Maria tepdâk malep are kewugumbo kotyetne kulemgowerâm ariyat.

6 Arim luâk yâkne menduguak menduguak emetne are pikbiâ aregât makao emetnân âgâ taliat.

7 Tatbela Mariane nanan memberâm hâk hilâlâm nângâmbo nanan ulik gulikne miawagep. Miawakto sângumne mem katipkom makaone sot nemai ain kondoân katbela ge talep.

8 Akto kepia ewumâk ain luâk biknande hândâgân umilinân lamalupyene damunylene akmâ kili.

9 Kinbiâ âmâ Anutugât anelo siâne yâk yenğâlân miawakto Anutugât pagalenande erâmbo ekmâ ongâylene hogoep.

10 Akto anelo arekne hin dâm makyengiep, “Bo hamep aknet. Nângâi. Nâne den pat âlepne siâ

mem togoân ire makyengire nângâñet.

11 Uñak ire âmâ hengemgo yekbiapgât luâk arekñe âmâ Dawidigât kepia kautñân ain miawaktâp. Yâkñe âmâ damunyeñe akbiap. Aregât den ire sambelem arimbo luâk âmbâle hârokñe nângâm herone akbai.

12 Akto nananj are sângumñeak katipkom makaone sot nemai kondo are kâlegen katbela tatâp gârâmâ arim âmâ mem miawakbi. Akto nângât den bunje nângâñetgât arim mem miawakmâ nângâm hengemgoñet.” dâep.

13 Añeloñe den hain dâm makyengimbo ainâk añelo kâmot humo togom galayeñe penianbiâ menduguakmâ kinmâ Anutugât kotñe mem agatmâ hin dâyi,

14 “Anutune luâk âmbâle bikñe nângât dâtâñe dâm potatyegep are yengât herone akyengimbo yengâlân gala konok miawak yengîap. Aregât nen hârogâk herone akmâ himbimân egon Anutugât kotñe mem agaten.” dâyi.

15 Hain dâm himbimân purik katmâ âgâmbiâ lama damunyeñe yâkñe hin dâm maganji goanji agi, “Nen Betelehem kepiar arim Anutune añeloñe hungun anjo gem den maknengiâp are bunje mem miawakne.” dâyi.

16 Hain dâm dowâk pârigin arim Maria akto Yosepe yâk yetgâlân arim mem miawakyelekmâ âmâ nananj makaogât kondoân katbela ge talep are egi.

17 Ekmâ nananj aregât den pat are luâk âmbâle makyengim mali.

18 Makmâ miawakbiâ nângâm hin dâyi, “Yae,

nanaŋ arekŋe hâmbâi gain gain akbiap?” dâmbiâ biwiyenŋe agalep.

<sup>19</sup> Akto Mariane den are biwiŋân kato kindo malep.

<sup>20</sup> Akto lama damunyenŋe are purik katmâ arim wan me wan egi aregât den pat are nâŋgâm aŋeloŋe makyenŋiep are miawagepgât Anutu me-paŋe mem kotŋe mem agatmâ kinmâ heronŋe agi.

*Simeonŋ akto Hana yetgât den pat.*

<sup>21</sup> Akto ainba hilâm nâmbulân âlâwu bo akto hâkŋe gâim kotŋe Yesu koli. Nanaŋ are bo miawaktoân aŋeloŋe Mariagâlân miawakmâ, “Kotŋe Yesu konbiat.” dâepgât aregât launŋe lokom kotŋe Yesu dâm koli.

<sup>22</sup> Akto ulikŋân Mosenŋe hin kulemgoep are tatâp, “Âmbenlupyenŋande nanaŋ membiâ âlepŋe akto âmâ Anutugât den pat lokombiâ yekto ârândânŋ akbiâp.” dâm den kârikŋe kulemgoep den are lokom kinmâ âmâ Maria akto Yosepenŋe Yesu mem Yerusalem kepien mem âgâyat.

<sup>23</sup> Âgâm âmâ ulikŋân Anutuŋe den hin dâep are lokoyiat, “Nanaŋ luâk ulik gulik miawakto are âmâ Humogât pat konbai.” Den are lokom kinmâ agiat.

<sup>24</sup> Akto Humogât den kârikŋe siâ talep are hin, “Ewenŋe memenŋe kembâ lâuwâ me gâmut lâuwâ mem huit oyelekmâ Anutu wanŋbiandat.” Den are lokom kinmâ ariyat.

<sup>25</sup> Akto sop ain Yerusalem kepien luâk siâ malep kotŋe Simeonŋ, yâkŋe âmâ Anutugât den lokom luâk âlepŋe manmâ Anutuŋe heŋgemgo nenekbiapgât hunŋun aŋdo miawakbiap aregât lâmgom

malep. Akto Anutugât Heakñande biwiñân hut-gombo malep.

26 Akto emelâk Anutugât Heakñande den siâ hin magañep, “Gâ boâk mombialân Anutu Humoyenande damunyeñe agâkgât hunḡun anḡo gewiap are miawakto ekbiat.” dâep.

27 Akto Anutugât Heakñande memene aḡanḡo owâiñe akmâ Israe yeñgât sumbe kat kat emetñân âgâep. Âgâambo âmâ Maria akto Yosepe Anutugât den lokowerâm nanyetñe mem âgâmbela

28 Simeonñe nanañ are lokom hin dâm Anutu magañep,

29 “O Humo dondâ, hinñe Israe damun nenñe akbiap yâk miawakto ektângât biwine heronñe aktâp. Den are emelâk magen ina are bunñe aktâp. Hain gârâmâ mombiangât sop miawaktâp.

30 Akto nanañ ire guge hunḡunañmenâ humo akmâ luâk âmbâle heñgem nenguwiap ina ektân.

31 Amâ gâ hân ârândân luâk âmbâle hârokñe ekñetgât mem miawaktât.

32 Arekñe Anutu bo nânḡañmai yâk yeñgât han ewum pagalewiap. Akto luâklupge Israe nengât egâlian pagaleñe aknengiwiap.”

33 Nanañ aregât hain dâambo eweñe memenande nânḡâmbela biwiyetñe agatmâ hogoep.

34 Akto Simeonñe Anutuñe tân yetkuâk dâm Anutu ulilanmâ nanañ aregât memene are hin dâm magañep, “Nânḡât. Israe potalakmâ bikñe biwinenñe yâkgâlân katenñe kindo manbaen. Dâ bikñe âmâ yâkgât hâkân akbiâ biwiyenñe pâlâmñe akto bâliwai.

35 Akto siân kambiamge dondâ bâliwiap. Hain

are miawakto ain luâk dondânje agak memenenje ekmâ keinenje mem miawakbai.” dâep.

<sup>36</sup> Akto âmbâle siâ Anutugât den makmâ miawakmâ malep are kotje Hana are Panuegât baratje Asa kâmolân gâtje akto âmbâle arekje ulikjân luâk mendo manbela hombanj nâmbulân lâuwâ bo akto luâkje moep.

<sup>37</sup> Mondo aregât kakjân ikinjak kambut manmâ âgâmbo hombanj 84 are bo akto âmbâi kambut akmâ malep. Akto âmbâle arekje hilâmje ârândân sumbe kat kat emetjân âgâm Anutu ulilanjminep. Akto sopje sopje sot bâlâk manmâ ulilanjep.

<sup>38</sup> Akto yâkje sop ain sumbe kat kat emetjân âgâm nananj are egep. Ekmâ âmâ Anutu herone aganjmâ maganjep. Maganjmâ Yerusalem kepia ambolupjande Anutuje damunyeje are hunjun anbiap aregât lângom mali yâk Yesugât keije makyenjejep.

<sup>39</sup> Akto Maria akto Yosepe den kârikje lokowerâm nanyetjaet sot dâtânje are Anutu wanjmâ metem kepia yetjângen Nasarete are Galilaia hânân talewân ain purik katmâ ariyat.

<sup>40</sup> Arim manbela nanyetjaet hagitje kârigembo nângâ nângânje humo akto Anutuje memeneje aganjep are nângâm kinmâ agak meme âlepjeâk akminep.

*Maria akto Yosepeje Yesu kewugum Yerusalem kepijan âgâyat.*

<sup>41</sup> Akto ulikjân anjelo siânje Israe luâk damunyeje akmâ Aigita are yengât nananj ulik gulik miawagi are yenguep aregât nângâm hombanj kotje Pasowa ain serâ omini. Serâ omberâmbiâ sop

miawakto aregât Yosepe akto Mariane kepiayetne hepunmâ Yerusalem kepiân âgâyat.

<sup>42</sup> Akto Yesu nananj are hombanje 12 akto luâk sisik akto serâ are omberâm kewugumbela olowâk âgâyi.

<sup>43</sup> Âgâm manbiâ hombanj are bo akto luâk âmbâle awam akbiâ âmâ Maria akto Yosepe yâkne nanyetne bo ekbela tato Yerusalem kepia are hepunmâ yetneâk purik kaliat.

<sup>44</sup> Purik katmâ arim hin nângâyat, “Nannetne kâmot humo yâk olop emelâk ariâp mon?” dâyat. Hain dâm dâwân arim galalupyetne yengât hutyenân undâgâtbela bo akto manbela hândâk agep.

<sup>45</sup> Akto galalupyetne aiyengum undâgâtbela bo akto purik dâm Yerusalem kepiân purik katmâ arim undâgâlanjat.

<sup>46</sup> Undâgâlanjbela hilâm âlâwu bo akto âmâ sumbe emetne ain âgâyat. Âgâmbela âmâ Yuda luâk den makyengimini are yengât hutyenân tatmâ amâ denyene nângâm aregât keinjaet aiyengumbo tali.

<sup>47</sup> Hain tatmâ yâk hârogâkne nângâ nângâjaet akto denjaet nângâm ekbiâ biwiyene agatmâ ho-goep.

<sup>48</sup> Akto yâk yengât hutyenân tato mem mi-awakmâ âmâ han undup akmâ kiliat. Akto memenande hin dâm maganep, “Ewege olop net gângât undâgât ginjetne bo akto kuknetkimbo to-goet. Aregât gâ wangât hain aktât?”

<sup>49</sup> Hain dâmbo hin makyetkiep, “Gain gain akmâ kulâgâtniqmâ mandat? Nâ Ewenaet âiân memberâm akman are bo nângât me?” dâep.

<sup>50</sup> Hain dâmbô denņe are nângâmbela hâumgoep.

<sup>51</sup> Are âmâ memenande denņe are biwiņân katmâ nângâm gaep. Hain akto yâk olop Nasarete kepiā purik katmâ arim yâk yetgât den lokom malep.

<sup>52</sup> Akto nângâ nângâņe humo akto manmâ gambo Anutu akto luâk âmbâle hârokņe ekbiâ ârândâņ agep.

### 3

#### *Yohanenņe âi keiņe kalep.*

<sup>1</sup> Roma luâk siâ kotņe Tiberio Sisa are Roma yengât luâk humo manmâ gambo hombaņ 15 bo agep. Bo akto âmâ Yohanenņe âi keiņe katmâ miēp. Sop ain luâk siâ kotņe Pontio Pilato yâk Yudaia yengât kiap humo malep. Akto luâk siâ kotņe Herote yâk âmâ Galilaia luâk âmbâle yengât damunyenņe akmâ malep. Akto emiņe kotņe Pilipo yâkņe âmâ Ituraia akto Trakoniti yâk yengât luâk humo malep. Akto luâk siâ kotņe Lisania, yâkņe Abilene yengât luâk humo malep.

<sup>2</sup> Akto sumbe kat kat luâk are yengât kautņe lâuwâ maliat kotyetņe Anasi akto Kaipa luâk lâuwâ are luâk humo akmâ manmâ gayiat. Sop ain Sakariagât nanņe kotņe Yohane are hân kamitņângen mando âmâ Anutuņe den dâm waņep.

<sup>3</sup> Den dâm waņdo Yodaņ tu biken biken manmâ hin dâm makyengiep, “Agak memeyenņe bâleņe are makmâ miawakmâ biwiyenņe Anutugâlân katbiâ kindo togombiâ tuân katyektere dosayenņe bo agâk.” dâep.



<sup>4</sup> Akto ulikñân Anutuñe dâambo propeteñe Yesaia yâkñe den hin kulemgoep aregât bikñe hin tatâp, “Luâk siâñe hân kamitñângen manmâ hin dâm tatâp, Humogât dâp megatñet.

<sup>5</sup> Mem gimbâñe mambâñe are kârâmbiâ dâp konogâk agâk. Akto hân hutaguâk akto huruñ dâambo âmâ totokombiâ dâp ârândânñâk agâk. Akto dâp gonjon meñjon are tân tânñâk hengemgowai. Akto dâp bâleñe are mem âlepñe ketugunet.

<sup>6</sup> Akto luâk âmbâle hârok Anutuñe hengem nen-guwerâm aktâp aregât keñe nânğâwai.”

Yesaiañe hain kulemgoep are bunñe akto Yohane miawagep.

*Yohaneñe den ginñe makyenğiep.*

<sup>7</sup> Akto luâk dondâ yâkñe Yohanegâlân togom tuân kat nenegâk dâmbiâ aregât hin dâm makyenğiep, “Niambigât kâmot ye bâleñaet hâuñe togowerâm aktâp are hamewakmâ awam akmâ arinjetgât niñande makyenğiep?

<sup>8</sup> Ye hanyenñe purikatmâ manbaigât dopñe bunñe peniañmâ ariwai. Dâ hin bo makñet, “Nen Abrahamgât kâmot manden.” Nâ makyenğire nânğânñet. Anutuñe kât ire makto luâk akmâ Abrahamgât kâmotlupñe irakñe yengât dumyenñân miawakbai.

<sup>9</sup> Akto den ginñe siâ makyenğiwe. Unam are emelâk dâtñe hâwim lâwin keññân kato tatâp. Arekñe lâwin siâ bunñe bo kindâp are kârâm kâlâwân ombiap.” dâep.

<sup>10</sup> Hain dâm makyenğimbo âmâ hin dâm aikoyi, “Wei, aregât gain gain akbaen?” dâmbiâ hin makyenğiep,

11 “Luâk siâne hâk pekeŋe lâuwâ talaŋdo galaŋe umburuk mandâp are ekmâ âmâ âlepŋe waŋbiâp. Akto sot potatmâ waŋbiâp.” dâep.

12 Akto gawaman puli meme luâk yâkŋe hainâk tuân katnenegâk dâm togoyi. Togom aikom hin dâyi, “Ewenenŋe, nen gain gain akbaengât nâŋgât?” dâyi.

13 Hain dâmbiâ hin makyenŋiep, “Damunlupyenande gawaman puli dop hainâk meŋet dâm makyenŋimbiâ aregât yeŋe siâ bo dewatim membai.” dâep.

14 Akto tembe loko yâkŋe hainâk yâkgâlân togom dâyi, “Nenŋe âmâ gain gain akbaengât nâŋgât?” dâmbiâ hin dâm makyenŋiep, “Siâgât wan me wan ekmâ kuckyenŋimbiâ yeukŋe akbiâ are bo membai. Akto wan me waŋ memberâm akmâ âmâ bo hianŋim ire nengât dâwai are borondâ membai. Agak meme ire akbai âmâ âigât puliŋe yeŋimai are ârândâŋ akto areâk membai.” dâep.

*Yohanenŋe Yesugât keiŋe makmâ miawakyenŋiep.*

15 Akto luâk arekŋe Yohanegât nâŋgâm biwiyenŋe hikom hin dâyi, “Anutuŋe huŋgun aŋdo togom damun nenŋe akbiap aregât biwinenŋân katmâ manmaen are ire me aŋgâ?” dâm nâŋgâyi.

16 Nâŋgâm aikombiâ hin dâm makyenŋiep, “Nâ tu yân puliyektân. Dâ siâ haminângen togom mandâp yâk âmâ kârikŋenŋe dop siâ yeandâp. Yâk nâ hin arekŋe sikumgât ito goliandere ârândâŋ bo akbop. Yâkŋe âmâ Heakgât kâlâp are puliyekbiap.

17 Akto yâkgât den ginŋe siâ makyenŋiwe. Sot pipiŋe urutmâ kâlâwân panmaen dop hainâk yâkŋe gagap mem urutmâ kâlâwân katbiap. Dâ

sot neneje kitalân katmaen dop hainâk sot âlepje potatmâ katbiap.”

<sup>18</sup> Yohaneje hainâk dâm pat âlepje are kârikjeâk makyenjeep.

*Heroteje akmâ hilipkoep.*

<sup>19</sup> Akto sop ain luâk humo Herote yâkne âmâ kandâne kotje Herodia are emiŋaet âmbâle are kâmbu miep. Mem âmâ aregât kakjân agak meme bâlne dondâ mendo dosane humo miawagep. Hain akto Yohaneje, “Bo agakne aktât.” dâm den kârikne maganejep.

<sup>20</sup> Maganjo nâŋgâmbo bâlimbo aregât Yohane mem lope kâlegen kato talep, aregât Heroteje dosa siâ miep.

*Yohaneje Yesu tu puliep.*

<sup>21</sup> Ulikjân luâk dondâne Yohanegâlân arim tuân katyegâkgât maganji. Maganbiâ tuân katyejep. Katyekto âmâ Yesu yâkâ hainâk arim maganejep. Maganjo tuân kato sopanmâ Anutu ulilando ainâk himbim pâronj âgâmbo

<sup>22</sup> Anutugât Wâtgât memene Heakjande himbimânba lâut kotje kembâ hainare akmâ Yesugât kakjân giep. Gembo himbimânba Anutuje den siâ hin dâm Yesu maganejep, “Gâ nanne kambiamnân gâtje aregât gekmâ ukenne nâŋgân.” Anutuje den hain dêep.

*Yesugât bâgilupjaet kotyene.*

<sup>23-38</sup> Yesu bâgilupjaet kotyene âmâ hin. Keine katmâ Anutuje Adam akto Ewa kat yelegep. Akto Adamje Ewa mendo Sete miep. Setene humo akmâ âmbâle mendo nanje kotje Enosi miep.

Enosiņe humo akmâ âmbâle mendo nanņe kotņe Kenañ miep. Kenañņe humo akmâ âmbâle mendo nanņe kotņe Mahalale miep. Mahalaleņe humo akmâ âmbâle mendo nanņe kotņe Yarede miep. Yaredeņe humo akmâ âmbâle mendo Enoko miep. Enokoņe humo akmâ âmbâle mendo Metusala miep. Metusalaņe humo akmâ âmbâle mendo Lamek miep. Lamekņe humo akmâ âmbâle mendo Noa miep. Noaņe humo akmâ âmbâle mendo Sem miep. Semņe humo akmâ âmbâle mendo Arpasada miep. Arpasadaņe humo akmâ âmbâle mendo Kenañ miep. Kenañņe humo akmâ âmbâle mendo Sela miep. Selaņe humo akmâ âmbâle mendo Ebe miep. Ebeņe humo akmâ âmbâle mendo Pelege miep. Pelegeņe humo akmâ âmbâle mendo Ragau miep. Ragauņe humo akmâ âmbâle mendo Serugu miep. Seruguņe humo akmâ âmbâle mendo Naho miep. Nahoņe humo akmâ âmbâle mendo Tara miep. Taraņe humo akmâ âmbâle mendo Abraham miep. Abrahamņe humo akmâ âmbâle mendo Isaka miep. Isakaņe humo akmâ âmbâle mendo Yakobo miep. Yakoboņe humo akmâ âmbâle mendo Yuda miep. Yudaņe humo akmâ âmbâle mendo Perese miep. Pereseņe humo akmâ âmbâle mendo Hesoroņ miep. Hesoroņņe humo akmâ âmbâle mendo Arani miep. Araniņe humo akmâ âmbâle mendo Adamin miep. Adaminņe humo akmâ âmbâle mendo Aminadaba miep. Aminadabaņe humo akmâ âmbâle mendo Nason miep. Nasonņe humo akmâ âmbâle mendo Sala miep. Salaņe humo akmâ âmbâle mendo Boasi miep. Boasiņe humo akmâ âmbâle mendo Obede miep. Obedeņe humo akmâ âmbâle

mendo Isai miep. Isaiņe humo akmâ âmbâle mendo Dawidi miep. Dawidiņe humo akmâ âmbâle mendo Natanj miep. Natanņe humo akmâ âmbâle mendo Matata miep. Matataņe humo akmâ âmbâle mendo Mena miep. Menaņe humo akmâ âmbâle mendo Melea miep. Meleanņe humo akmâ âmbâle mendo Eliakim miep. Eliakimņe humo akmâ âmbâle mendo Yonam miep. Yonamņe humo akmâ âmbâle mendo Yosepe miep. Yosepeņe humo akmâ âmbâle mendo Yuda miep. Yudaņe humo akmâ âmbâle mendo Simeonj miep. Simeonņe humo akmâ âmbâle mendo Lewi miep. Lewiņe humo akmâ âmbâle mendo Matata miep. Matataņe humo akmâ âmbâle mendo Yorim miep. Yorimņe humo akmâ âmbâle mendo Eliese miep. Elieseņe humo akmâ âmbâle mendo Yosua miep. Yosuaņe humo akmâ âmbâle mendo Ere miep. Ereņe humo akmâ âmbâle mendo Elimadam miep. Elimadamņe humo akmâ âmbâle mendo Kosam miep. Kosamņe humo akmâ âmbâle mendo Adi miep. Adiņe humo akmâ âmbâle mendo Meliki miep. Melikiņe humo akmâ âmbâle mendo Neri miep. Neriņe humo akmâ âmbâle mendo Sealitie miep. Sealitieņe humo akmâ âmbâle mendo Serubabe miep. Serubabeņe humo akmâ âmbâle mendo Resa miep. Resaņe humo akmâ âmbâle mendo Yoanan miep. Yoananņe humo akmâ âmbâle mendo Yoda miep. Yodaņe humo akmâ âmbâle mendo Yosek miep. Yosekņe humo akmâ âmbâle mendo Semeinj miep. Semeinjņe humo akmâ âmbâle mendo Matatia miep. Matatiaņe humo akmâ âmbâle mendo Mata miep. Mataņe humo akmâ âmbâle mendo Nagai miep. Na-

gajne humo akmâ âmbâle mendo Esili miep. Esilijne humo akmâ âmbâle mendo Nahum miep. Nahumne humo akmâ âmbâle mendo Amosi miep. Amosijne humo akmâ âmbâle mendo Matatia miep. Matatiane humo akmâ âmbâle mendo Yosepe miep. Yosepeje humo akmâ âmbâle mendo Yanai miep, Yanaijne humo akmâ âmbâle mendo Meliki miep. Melikijne humo akmâ âmbâle mendo Lewi miep. Lewijne humo akmâ âmbâle mendo Matata miep. Matatajne humo akmâ âmbâle mendo Eli miep. Elijne humo akmâ âmbâle mendo Yosepe miep. Akto Yosepegât hin nângâm hilipkoyi, “Yosepeje âmâ Yesugât ewenje.” hain dâyi. Dâ Yesu âmâ Anutugât nanje are himbimân gâtje. Akto Yesuje mando hombanj 30 are bo akto âmâ âi keijne kalep.

## 4

### *Niambiñe Yesu dop koep.*

<sup>1</sup> Anutugât Heakñande Yesu huñgun anjo Yodan tu are hepunmâ hân kamitje siân ariep.

<sup>2</sup> Arim âmâ sot bâlâk manmâ gambo hândâk hilâm 40 bo agep. Sop ain mopje dondâ aguep. Hain akto Niambiñe yâk dop komberâm hin dâm magañep,

<sup>3</sup> “Mopge aguâpgât gâ Anutugât nanje akto âmâ kât ire makmenâ sot akto ne.” dêep.

<sup>4</sup> Dâmbo hin magañep, “Bo, Anutuñe den hin dâmbo kulemgoyi are hin tatâp, Anutuñe damun nenje akmap aregât nenje sotgâlâk nângâm mandenje ârândânj bo akbiap.” dêep.

<sup>5</sup> Hain dâambo Niambiņe hân gimbâņe siân oloņmâ âgâm âmâ luâk hânņe hânņe manmâ ariyi are yeņgât sikum me ito siâ siâ hekalaņep.

<sup>6</sup> Hekalaņmâ hin magañep, “Nâņe ire hârok damunyeņe aktân. Akto ire hârok niņande damunyeņe agâk dâm nunagâk damunyeņe akman. Akto niņande nânġât okotnân malâk dâm nunak hain akman.

<sup>7</sup> Aregât kotne mem agatmenâ âmâ sikum me wan me wan ire hârok damunyeņe katgekmâ giņbian.” dâep.

<sup>8</sup> Hain dâambo den hâuņe hin magañep, “Anutuņe den hin dâambo kulemgoyi are tatâp. Kembu Anutu konok hoņ bawa agañmâ kotņe mem agatben.” dâep.

<sup>9-11</sup> Hain dâambo âmâ Niambiņe Yesu mem sumbe kat kat emetņe Yerusalem kepiā talep areġât bokņân oloņmâ âgâm katmâ hin dâm magañep, “Anutuņe den siâ hin dâambo kulemgoyi are tatâp, “Nâņe aņelolupne huņgun yeņgire meņgekmâ tân gugum damunge akņet. Kâlân gugum keige hârewopġât aņelolupnande bâtgân meņgekņet.”

areġât ġâ Anutugât nanņe mandât areġât ġâ inba sopanmenâ aņeloņe damunge akbiâ kâlân me wan me wanân bo guguwerâp âlepņe sopanberât.” dâep.

<sup>12</sup> Hain dâambo hin magañep, “Anutugât den siâ hin tatâp, Anutuņe damunge aktâpġât keiņe ekberâm dop komeņâ ârândâņ bo aktâp.” dâep.

<sup>13</sup> Hain dâambo Niambiņe hepunmâ sop siângât lâmgom malep.

*Yesuņe Nasarete kepiā arim den kepikmâ*

*makyengim malep.*

14 Anutugât Heakñande Yesu memenje agañdo Galilaia hânân purik katmâ ariep. Purik kato aregât den patñe sambelem arimbo kepia ambolupñe hârogâk nângâyi.

15 Akto ain den emetñe ârândân arim den potatmâ yengimbo kângoañmâ kotñe makmâ egâlianji.

16 Hain akmâ arim nanañânbak manmâ gaep ikiñæet kepia Nasarete ain arim âi bo meme sopñân Sarere ârândânâk den emetñân âgâminep. Hainâk âgâm malep. Âgâm manmâ Anutugât den emelâk kulemgoyi are oyañberâm âgâmbo

17 propete luâk Yesaianje kulem kulengoep are wañi. Wañbiâ mem kelalakom ekmâ den hin kulengoep talep are oyañmâ makyengiep,

18 “Humogât Heakñande meme akniñdo kinmâ den hin dâm makniñep, “Luâk biwiyenje umat bâleñân mandâi are yengâlân arim den pat âlepñe makyengiwen. Akto hikoyekto mandâi amâ hulañyekben. Akto luâk dewunyeñe bok bokñe yâk yengâlân arim makyengimenâ dewunyeñe hulañ akto âlepñe ekbai.

19 Akto Anutunje tân yenguwiapgât sop tâlâguâp aregât den pat makyengiwen.” hain dâm makniñep.” dâep.

20 Den hain dâm oyañmâ kulem esenje are mem bigeim hoñ bawa siâ wañmâ âmâ ge talep. Ge tato den emetñân tali yâkñe hârogâk hewugem ekmâ tali.

21 Ekbiâ den hin dâm makyengiep, “Den ya oyañdere nângâi are unjak yu dewunyenân bunje



miawaktâp.”

<sup>22</sup> Hain dâmbô nângâmbiâ den are ukênje akto hin dâyi, “O, ire Yosepegât nanje arekne gain gain unak den bunje akto âlepne miawaktâp dâp.”

<sup>23</sup> Hain dâmbiâ aregât hin dâm makyenjiep, “Yeje hin dâm makniñmai, “Gâje siâ henngemgoen aregât hinje guge henngemgoak. Akto Kapanaum kepiân âi ketugumenâ den patge nângâmaen hainâk kepia iren ketugumenâ ekne.” hain dâm makniñmai.

<sup>24</sup> Aregât den bunje makyenjiere nângâñet. Anutunje propetelupne makyenjimbo are makmâ miawakbiâ areyengât ginbailupyenjande denyenje bo nângâmai.

<sup>25</sup> Ulikñân Israe luâk siâ kotne Elia malep sop ain dewutâ kârikne kondo hombanj âlâwu dewutâ nâmbulân konok hain bo akto âmâ mop humo miawakto luâk âmbâle hârok sot bâlâk mali.

<sup>26</sup> Akto sop ain Israe yengât âmbâle kambut dondâ manmâ gambiâ âmâ Anutunje Elia hungun anjo ikinje kepia hepunmâ Yuda luâk bo manmaiân Sareta kepia are Sidonj hânân talep, ain âmbâle kambut siâ yâkgâlân arimbo Anutunje tângombo sot wanjo niep.

<sup>27</sup> Israe luâk siâ kotne Elisa malep sop ain Israe kepia ambolupne dondâje hâk bâle agi. Akto yâk yengâlân gâtne siâ bo âlepne akbiâ luâk siâ kotne Naemanj are Yuda luâk bo manmaiân Siria hânân gâtne konokne âlepne agep.” dâep.

<sup>28</sup> Hain dâm makyenjimbo den emetñân taliñe den are nângâmbiâ bâliepgât kuk dondâ akmâ

<sup>29</sup> agatmâ kepia hamiñângen mem bam borâñe siân âgâm katmâ ainba hemem dâtñân mem, “Pan-

denŋe geâk.”

<sup>30</sup> dâmbiâ bo menekŋet dâm hut yenânba hepun yekmâ gem ariep.

<sup>31</sup> Akto arim kepia siâ kotŋe Kapanaum are Galilaia hânân talewân ain arimbo âi bo meme sopŋân Sarere akto den makyenŋiep.

<sup>32</sup> Makyenŋimbo are nânŋâm hin dâyi, “Oe, luâk irekŋe den maknengim tatâp are nânŋâenŋe dâtŋe kârikŋe aktâp.” hain dâyi.

<sup>33</sup> Hain dâmbiâ den emetŋân ain luâk siâ kinmâ sinduk baniara bâleŋande kautŋân mendo den humo akmâ hin dâep,

<sup>34</sup> “Woe, Yesu Nasarete kepia amboŋe gâ wangât nengâlân togoât? Keige nânŋân. Gâ Anutugât nanŋe bunŋe mandâtgât hilip nenguwerâm togoât.” dâmbo

<sup>35</sup> Yesuŋe maganŋmâ hin dâep, “Den bo ak. Luâk ire hepunmâ ari.” dâep. Hain dâmbo sinduk baniaraŋe hepunmâ pando ge hutyenân yem âlepŋe akto ariep.

<sup>36</sup> Hain manmâ arimbo ekbiâ hanyeŋe undup akto hin maganŋi goanŋi agi, “Wâe, ire âmâ gain gain? Sinduk baniara bâleŋe maganŋdo hepunmâ ariâp.” dâyi.

<sup>37</sup> Hain dâmbiâ aregât den pat sambelem arim kepia biken biken ârândânŋ akmâ arimbo yâkgât maganŋi goanŋi agi.

*Yesuŋe dâmbo Petorogât hewonŋe âlepŋe agep.*

<sup>38</sup> Akto Yesuŋe agatmâ den emetŋânba gem ariep. Arim luâk siâ malep kotŋe Simonŋ Petoro yâkgât emelan âgâep. Âgâmbo âmâ Simonŋgât

hewonje kundat akmâ hâkne kâlâp akto yem kilep. Aregât ginbailupñande Yesu ulilanj.

<sup>39</sup> Ulilanbiâ yâkgât enemñân ba kinmâ kundatgât makto âlepne agep. Âlepne akmâ agatmâ sot om yenjimbo neyi.

<sup>40</sup> Akto dewutâ kulukberâmbo âmâ galalupyenande kundat agi are meyekmâ Yesugâlân togombiâ bâtnandeak meyekto kundat ainâk bo akyenjiep.

<sup>41</sup> Akto sinduk baniara bâleñe are watyenjimbo âmâ hepunyekmâ bam arim hin dâyi, “Gâ Anutugât nanñe hungun ginjo togoen.” dâmbiâ Yesuñe mem iratyenjum hin dâm makyenjiep, “Den bo ak.” dâm makyenjiep.

<sup>42</sup> Akto yem kinbiâ hañdo emelanba gem hân siâ luâk bo manmaiângen ariep. Pumângen arim mando luâk dondâ undâgâtmâ manmâ mem miawakmâ hin dâm magañi, “Gâ nen olop in manbaengât nângâen.” dâmbiâ hin dâm makyenjiep,

<sup>43</sup> “Bo, kepia ârândân arim Anutugât den âlepne makyenpire lokom manbai aregât hungun niñdo geân.”

<sup>44</sup> Hain dâm Yuda yenğât den emetne ârândân arim manmâ den makyenjim malep.

## 5

### *Yesuñe dâmbo inñan dondâ meyi.*

<sup>1</sup> Hilâm siân Yesuñe Genesaret bâtgum dâtnân kindo Anutugât den are nângâwerâm gam ândeanmâ kinbiâ

<sup>2</sup> waŋga lâuwâ yelegep. Aregât ambolupŋande waŋganba sopanmâ iŋan ito pulim kili. Akto iŋangât ito pulim kinbiâ

<sup>3</sup> Yesuŋe Simonŋât waŋgan âgâm hin maganŋep, “Den makyenŋiwerân aregât waŋga ire memenâ getek bam indânŋân kilâk.” dâambo mendo indânŋanŋen ariyi. Arim tatbiâ Yesuŋe kâmot nupiân kili are den makyenŋim malep.

<sup>4</sup> Makyenŋimbo bo akto Simonŋ hin dâm maganŋep, “Bâtgum tânâmŋân arim âmâ iŋan ito panmâ iŋan oloŋ.” dâep.

<sup>5</sup> Hain dâambo Simonŋe hin dâm maganŋep, “Apo, hândâkŋân sop kâlep manmâ iŋan itoŋe are pandenŋe gembo iŋan siâ bo menden. Bo dondâ. Gârâmâ gâŋgât den are lokom arim iŋan ito panmâ ekberen.” dâep.

<sup>6</sup> Hain dâambo âmâ iŋan ito are panbiâ gembo iŋan dondâ kâlegen kulukbiâ aregât umatŋân tâk hâre akberâm agep.

<sup>7</sup> Hain akto hâk hilâlâm nânŋâm âmâ galalupyene waŋga siân mali are yeŋgonbiâ gam tân yeŋguyi. Tân yeŋgum iŋan are bikŋe membiâ waŋga lâuwâ lâuwâ pikto âmâ kumbuŋe kawut yekberâm agep.

<sup>8-10</sup> Hain akto Petorogât galalupŋe akto emi teulogâtŋe lâuwâ kotyetŋe Yakobo akto Yohane are Sebedaiio nanlogâtŋe yâkŋe iŋan dondâ are ekmâ sân sân meyi. Sân sân membiâ Simon Petoroŋe Yesugât keiŋân kânŋom gem hin dâep, “Woe, Humo, dosane humo mem luâk bâleŋe manman aregât hepun nekmâ ari.” dâep. Hain dâambo Yesuŋe hin dâep, “Gâ bo hamewak. Iŋangât âi memmat dop hainâk hâmbâi luâk mem oloŋ yek-

menâ nângât kâmot akbai.” dâep.

11 Hain dâambo wanğa are membiâ nupiân âgâambo âmâ wan me wan are hepunmâ Yesu olop arim mali.

*Yesuđe dâambo hâk bâle bo agep.*

12 Yesuđe manmâ kepia are hepunmâ siângen ariep. Arimbo luâk siâ hâk bâle kârikđe malep arekđe Yesu ekmâ âmâ enemđân gam hin dâm ulilađe, “Kotdâ, gâđe diwi bâle aktân ire mem howai nekmenâ âlepđe akberân aregât kârikđe tat-giđdâp aregât gugak mem howai nekmenâ âlepđe akberân me bo?” dâep.

13 Hain dâambo Yesuđe hâkđe mem howaiep. Howaim hin dâm maganđe, “Nângâ giđdângât pandagâk.” dâambo ainâk hâk bâle are pandakto ârândân agep.

14 Akto Yesuđe den hin maganđe, “Gâđe iregât pat luâk bo makyengim yânâk arim âmâ sumbe kat kat luâk are yeŋgâlân arimenâ gekbi. Akto diwi pandak giđdâp iregât Moseđe den kulemgöep are lokom Anutugât pat soŋgo huit omenâ are ekmâ hin dâwai, “Âo, luâk iregât diwi bâle emelâk pandakto ârândân aktâp.” dâwai.” dâep. Yesuđe hain dâm maganđo ariep.

15 Hain maganđo luâk âlepđe agep aregât den pat arekđe sambelem kepia ârândân arimbo hin dâm maganđi goanđi akmini, “Yesuđe den makto nângâenđe bunđe akbiap, are âmâ kundatnenđe bo aknengiwiapgât yâkgâlân arine.” Hain dâm hârogâkđe yâkgâlân arimini.

16 Arim mendugum kinbiâ hepun yekmâ hân pumângen arimbo Anutu olop den akminiat.

*Yesuñe luák båtñe keñje kârigem malep siâ henngemgoep.*

<sup>17</sup> Akto hilâm siân Yesuñe den makmâ hulanmâ potatmâ yengim malep. Mando âmâ Parisaio luák akto Mosegât den kârikñe oyañmâ makyenngiyi are Galilaia hânân gâtñe akto Yudaia hânân gâtñe akto Yerusalem kepian gâtñe arekñe togom tali. Tatbiâ Anutuñe Yesu memene agaño âmâ luák henngem yenguep.

<sup>18</sup> Henngem yengumbo ainâk luák båtñe keñje kârigiep siâ galalupñande temân katmâ lokom togoyi. Togom âmâ emelan mem âgâm Yesugât enemñân katberâm

<sup>19</sup> âmâ luák gam turun panmâ kili. Aregât gain gain akmâ katne dâm tirekñânba âgâm emet bokñân kinmâ ainba bok gagaimbiâ dâpñe mi-awakto ainba luák are temdâk tâgân panbiâ gem gem luák âmbâle hutyenñân Yesugât enemñân giep.

<sup>20</sup> Gembo Yesuñe biwiyenñe ekmâ nângâm âmâ luák kundatdâ are hin dâm magañep, “Dosage puliginđangât Anutuñe hâuñe bo ginbiap.”

<sup>21</sup> Hain dâambo Mosegât den makyenngiyi akto Parisaio luák yâkñe den are nângâm âmâ biwiyenñân hin nângâyi, “Anutuñe ikinjak âmâ dosayenñe hepun yengimap ina luák irekñe yâkgât dop akberâmbo bâliâp.” dâyi.

<sup>22</sup> Hain nângâm kinbiâ Yesuñe yekmâ nângâm âmâ hin dâm makyenngiep, “Biwiyenñân hain nângâi are âmâ ârândân bo aktâp.

<sup>23</sup> Gain gain arekñe owâinñe luák bâleñe ire hin dâm magañberân, “Anutuñe dosage hepundâp.” hain dâm magañberân me hin dâm magañberân, “Agatmâ ari.”

24 Aregât maktere nângânet. Nâ Anutuņe dosayeņe puliwiangât huņgun niņdo geân aregât Anutuņe nâ kârikņe niņep aregât keiņe ekmâ nângânet.” dâep. Hain dâm makyengim aregât luâk bātņe keiņe kârigiep are hin dâm magañep, “Agatmâ tem tâkge meakmâ emetgân ari.” dâep.

25 Hain dâm magañdo ainâk tem tâkņe meakmâ Anutu kotņe mem agatmâ kepianjângen ariep.

26 Arimbo ekmâ nângâm bātyeņe dâtyeņân igim kinmâ Anutu kotņe mem agatmâ hin dâyi, “Uņak iren agak meme irakņe pup pup ekten.” dâyi.

### *Yesuņe Lewi kolep.*

27 Akto Yesuņe emelanba gem ariep. Arimbo puli meme luâk siâ kotņe Lewi yâkņe gawamangât puli emetņân tato ekmâ hin dâm magañep, “Gâ nâ penâniņmenâ olowâk manbaet.” dâmbo

28 Lewiņe wan me wan are hârok hepunmâ agato Yesu olop ariyat.

29 Akto Lewiņe Yesu ikinę emelan talâk dâm kewugum âgâm Yesugât heroņe nângâm sot oep. Om puli meme luâk akto luâk bikņe meyekto gambiâ olop sot neyi.

30 Nem tatbiâ Parisaio luâk akto Mosegât den makyengi yi yâkņe yekmâ nângâmbiâ bâlimbo Yesu olop mali are hin dâm makyengi yi, “Yeņe Roma yeņgât gawaman puli meme luâk akto luâk bâleņe yâk olop tatmâ sot nembiaâ ârândâņ bo aktâp.”

31 Hain dâmbiâ Yesuņe nângâm hin dâm makyengiep, “Âlepņe manmai are yeņgâlân doktaņe âi bo ketugumai. Kundatdâ areyeņgâlân âi ketugumai.

<sup>32</sup> Aregât keiņe hin. Nâņe luâk âlepņeâk bo meyekman. Luâk bâleņe olowâk mem oloņ yektere aregât bâleņe yeņe makmâ miawakbiâ biwiyeņe Anutugâlân ari kilâkgât dâm yeņgât geân.” dâep.

*Sotgât hanoko agi aregât den.*

<sup>33</sup> Yesuņe hain dâmbo Parisaio akto Mosegât den makyeņgiyi are yeņgâlân gâtņe bikņande hin dâm magañi, “Yohane olop manmai arekņe âmâ hilâm ârândâņ sot hepunmâ manmâ Anutu ulilaņmai. Akto nengâlân gâtņe hainâk akmâ manmai. Gârâmâ gâ olop mandâiņe sot hanâk nem manmai are nâņgâeņe ârândâņ bo aktâp.” dâyi.

<sup>34</sup> Hain dâmbiâ Yesuņe hin makyeņgiep, “Luâk humo siâņe âmbâle mendo âmâ sot ombiâ kâmotlupņe yâk olop heroņe akmai sop ain âmâ bikņande sot bo nem yân tatberen dâmbiâ aregât ârândâņ bo akmap.

<sup>35</sup> Bo kârikņe. Hâmbâi luâk humo nâ menekmâ kewugunekbiâ bo aktere âmâ undâgât niņmâ okotyeņe nâņgâm sop ain âmâ sot bâlâk manbai.” Yesuņe hain dâep.

<sup>36</sup> Hain dâm âmâ ikiņaet den ginņe siâ hin dâm makyeņgiep, “Luâk siâņe sâņgum irakņe hârem arekņe mem hâk katipņe duwalak duwalakņe tâmbâņe are bo parutmap. Sâņgum irakņe tâmbâņe hut bit parutmap dâine sâņgum irakņe are bâliwop akto sâņgum lâuwâ are dopņe konok bo akbop.

<sup>37</sup> Akto nen âmâ waiņ tu irakņe yo hâkņe tâmbâņân bo kâienņe gemap. Hain akmaen dâine waiņ tuņe arekņe yo hâkņe are mendo âmâ bim



âgâm hogoakbop. Akto wainj akto yo hâkņe lâuwâ lâuwâ bâlewat.

<sup>38</sup> Aregât wainj irakņande yo hâkņe irakņân gembo âlepņe akmap.

<sup>39</sup> Dâ siâ wainj tâmbâņe nem hanņe agepņe wainj irakņe aregât hâkâņj akmâ hin dâwiap, “Tâmbâņe are nendere ukenņe aktâp.” dâwiap.” dâep.

## 6

### *Sarere âi bo meme sop aregât den.*

<sup>1</sup> Akto Sarere âi bo meme sop siân Yesu olop maliņe kalam ginņângen ariyi. Arim olop mali yâkņe kalamânba sot bâikņe konok konok are mem hâkņe digim neyi.

<sup>2</sup> Hain akbiâ Parisaio luâk arekņe yekmâ hin dâyi, “Ye wangât hain aktâi? Uņak âi meme sopņe bo aregât âi membiâ ârândâņj bo aktâp.”

<sup>3</sup> Hain dâmbiâ Yesuņe hin dâm makyenģiep, “Ye bo nâņgâi me? Dawidi akto luâklupņe mop mi-awak yenģimbo agi are nâņgâi me bo?”

<sup>4</sup> Yâkņe hin agi. Dawidiņe Anutugât sumbe kat kat emetņân âgâm sot Anutugât pat dâm kali are mem nem bikņe luâklupņe yenģimbo olowâk neyi. Sot are luâk anģâ yenģât pat borâm sumbe kat kat luâk are yenģâlâk dâm magi. Ainba yâkņe hanâk mem neyi.

<sup>5</sup> Aregât keiņe makmâ miawaktere nâņgâņet. Nâ Anutuņe huņgun niņdo luâk akmâ geân Sarereân âi bo meme aregât kautņe akmâ mandân.” dâep.

### *Sarere siân Yesuņe luâk siâ heņģemgoep.*

6 Akto Sarere siân den emetjân âgâm den makyenjiep. Makyenjimbo luâk siâ talep aregât båtje bungen âmâ kamunje agep.

7 Hain akto Mosegât den kârikje makyenjimini akto Parisaio luâk arekje, “Yesuje luâk ire mem hejgemgowerâp me bo?” dâm aregât ekmâ âmâ denân katbaen dâm aregât damungom tali.

8 Akto Yesuje yekmâ nângâm âmâ luâk båtje kamunje are hin maganep, “Agatmâ kin.” dâmbo agatmâ kilep.

9 Kindo damungom kili are hin makyenjiep, “Sarere âi bo meme sopjân wan me wan âlepje me bâleje akbaen are luâk hejgem yengumaen me hilip yengumaen aregât maknijbiâ nângâwe.” dâep.

10 Hain dâm tânjâk yekto den hâuje bo maganji. Yân kinbiâ båtje kamunje are ekmâ hin maganep, “Bâtge mem agat.” dâmbo båtje mem agato âlepje agep.

11 Akto are ekmâ hin maganji goanji agi, “Sarere âi meme sopje boân ina âi ire mendo ârândâj bo aktâp. Aregât gain gain akne.” dâm Yesugât kuk bâleje akmâ kili.

### *Yesuje Aposololupje meyegep.*

12 Akto sop siân emet dâgâwerâm akto Yesuje gimbâje siân Anutu maganberâm âgâep. Âgâambo Anutu olop den akbela emet haujdo

13 luâk olop mali hutyenânba keiân lâuwâ are mem oloj yegep. Olojyekmâ âmâ Aposolo yengonlep.

14 Dâ kotyeje ikiyeâk ikiyeâk âmâ hin. Simon kotje siâ Petoro emiñe Anderea, Yakobo, Yohane, Pilipo, Batolomaio,

15 Mataio, Toma, Yakobo siâ are Alipaiogât nanje akto Simonj siâ Roma yengât hâkâñ agi are yengâlân gâtñe akto

16 Yudasi are Yakobogât nanje akto Yudasi siâ Karioto kepijan gâtñe arekñe âmâ beirâ Yesugât gasalupñe makyengimbo kombiâ moep.

17 Yâk meyekmâ gimbanje kautñângenba gem hân ukulenân arim luâk âmbâle dondâ penâyengiyi. Penâyengimbiâ luâk dondâ yâk yengâlân togom menduguyi. Akto Yudaia hânângenba akto Yerusalem kepijanba akto Tiro akto Sidon kepijan are haru dâtñân talewângenba togom mendugu akbiâ den potatmâ yengiep. Akto kundat agi are yengât makto âlepñe agi.

18 Akto sinduk baniara bâlenjande kautyênân miép are watyekto arimbiâ âlepñe agi.

19 Hain akmâ Yesugât kârikñenande heñgemnengumbo howaim âlepñe akne dâm kili.

*Yesuñe den dâtñe makyengiep.*

20 Akto Yesuñe ikinje haminân gâtñe yekmâ hin dâep, “Ye puligât umburuk akmâ manmai aregât Anutuñe damunyañe akberâm aktâp. Aregât yengât nâñgâre âlepñe aktâp.

21 Sop hinñeâk iregât âmâ mop mandâi. Dâ hâmbâi âmâ Anutuñe wan me wangât egâlian akmai are yengimbo ârândân akbiap. Aregât yengât nâñgâre âlepñe aktâp. Sop hinñe âmâ okotyene nâñgâm indem mandâi yene âmâ hâmbâi biwiyene herone akbiap aregât yengât nâñgâre âlepñe aktâp.

22 Luâk âmbâle bikñande luâk akmâ geân nâñgât hâkâñ akmai aregât ye yekbiâ gembiâ hogom nâñgâyengim watyekmai

<sup>23</sup> aregât yengât hâu âlepņe hâmbâi Humoņe him-bimân wan katyengiep are tatâp aregât biwiyene heroņe humo nângâm manbi. Amâ bâgilupyenande yeņe aktâi dop hainâk akmâ Anutugât hoņ bawa aganmâ mali.

<sup>24</sup> Woe, niņemaņe puli siâ siâ tat yeņgiâp aregât emelâk âlepņe yeņaet hâu meyi. Ye hâmbâi âmâ bâleņân arim âi girâp akbai.

<sup>25</sup> Woe, uņak âmâ sot humo nem unsambe manmâ heroņe aktâi. Dâ hâmbâi âmâ bâleņân arim mop manmâ âi girâp akbai. Akto uņak âmâ giriņmâ heroņe maroņe kakņân mandâi. Dâ hâmbâi âmâ indem umatņân manbai.

<sup>26</sup> Woe, ulikņân luâk bikņande agatmâ den mem hin hianġim dâyi, “Nen Anutuņe den dâm maknengiâp are makmâ miawaktenņe nângâm lokoņet.” dâmbiâ âmâ bâgilupyenande heroņe akyeņgiyi. Heroņe akyeņgimbiâ Anutuņe bo huņgun yeņgiep, yânâk agatmâ hianġi den dâyi aregât dosayeņe yeņgiep. Aregât uņak iregât âmâ luâk âmbâle kâmot humo arekņe yeņgât nângâm heroņe akyeņgimbiâ âmâ hanoko akbi.

### *Gasa are gala akyeņgiwei.*

<sup>27</sup> Gârâmâ nâ hin maktere nângâņet. Yeņe gasalupyene yeņgât nângâm gala akyeņgiwi. Akto yeņgât hâkâņ akmai are mem gala katyekbi.

<sup>28</sup> Akto ye bâleņe akyeņgimai are heroņe akyeņgiwi. Akto makmâ hâkâņ yekmai yâk yeņgât akmâ Anutu ulilaņbi.

<sup>29</sup> Luâk siâņe ondopge hogombo are ondopge bikņe waņben. Luâk siâņe gâņgât ito meņġiņberâm kârikņe akto âmâ iripânge biken are waņben.

30 Luâk siâñe puli siâ siâgât ulit giñdo are wanbiat. Akto luâk siâñe puli siâ siâ are meñgiñdo aregât purik katmâ niñ bo dâwiat.

31 Yeñe wan me wan siâ siâ aknengiñet dâm aregât ukenñe akmai dop hainâk akyengiñwai.

32 Luâk âmbâle bikñande ye han kalem akyengiñmai yâk han kalem purikatmâ akyengiñwai amâ hâu gain gain miawakyengiñwai? Amâ luâk bâleñande galalupyene han kalem akyengiñmai gai.

33 Akto bikñande gala akyengiñmai yâk gala akyengiñwai amâ hâu gain gain miawakyengiñwai? Amâ luâk bâleñande hain akmai aten.

34 Akto hâuñe purikatmâ nengiñetdâm wan me wan yeñgiñwai amâ Anutuñe hâu wan hinan purikatmâ yeñgiñwai? Amâ Anutugât den bâlâk manmai yâkñe galalupñe hin dâm siâ me siâ yeñgiñmai, “Maleine yekâ hainâgâk hâuñe nengiñwi.” dâmai.

35 Bo. Ye hain bo akbi. Ye gasalupyene gala akyengiñwi. Hâuñe bo yeñgiñwai yâk hanâk heñgemyeñgum siâ me siâ yeñgiñwi. Hain akmâ maleine hâuñe umatñe membai. Hain akmâ Humo yâkgât nan barat akmâ manbai. Yâkñe amâ luâk gulip akto metñe yâk hanâk han kalem akyengiñmap.

36 Eweyeñande han kalem manmapgât yeñe hainâk han kalem olop manbi.

37 Akto yeñe yâk yeñgât den borâm hâre yeñgimbiâ amâ hainâk Anutuñe dosayeñe bo kat yeñgiñwai. Dâ dosayeñe hepun yeñgimbiâ amâ hainâk Anutuñe dosayeñe hepun yeñgiñwai.

38 Puli me wan me wan akyengiñmbiâ amâ Anu-

tunje hainâk akyenjiwiap. Gârâmâ Anutunje lugum totokombo humo akto yenjiwiap. Are âmâ yenje yenjimai dop hainâk Anutunje yenjiwiap.” dâep.

*Yesunje den umatnje dâm makyenjiep.*

<sup>39</sup> Yesunje den hain dâm makyenjim den ginje hin dâm makyenjiep, “Dewunyetnje bok boknje lâuwâ siâne yetnjeâk oloŋ akmâ dâp mesokmâ siângen arim hememân hâkoko akbiandat.

<sup>40</sup> Akto den siâ makbe. Nananj âmâ tiksane bo ewangimap. Nananj are wan me wan nânġâm henġemgom âmâ tiksa areġât dop akmap.

<sup>41</sup> Akto den siâ makbe. Gâne galagaet dewunġân lâwin unenje tatâp are ekmâ guge dewunġân lâwin papane tatâp areġât bo nânġangim galagaet dewunġân tatâp areġâlâk hin dâmenâ ârândânj bo akbiap,

<sup>42</sup> “Gala, dewunġân gagap tatâp are meŋġinbe.” Gâ hianġi luâk. Guge dewunġân lâwin papane tatâp are soj meakmenâ âlepne akto âmâ galagaet dewunġân lâwin unenje tatâp are memenâ ârândânj akbiâp.

*Lâwin keiŋe keiŋe.*

<sup>43</sup> Akto den siâ makbe. Lâwin keiŋe keiŋe areġât koane ikiŋeâk ikiŋeâk kinmap. Lâwin koane âlepġande lâwin bâleġân bo kinmap. Akto hainâk lâwin koane bâleġande lâwin âlepġân bo kinmap.

<sup>44</sup> Giat bunġande kewu bo akmap. Akto kânden bunġande ham bo akmap. Bunġaet keiŋe ya ekmâ nânġâmai are.

<sup>45</sup> Luâk siâġât biwiġân wan me wan bâleŋe me âlepne pikmâ yendâp areġât lauġânba âlepne me bâleŋe miawakmap. Areġât luâk âlepne siâ biwi

irakne manmapgât bunne biwiñânba agak meme âlepneâk miawakmap. Dâ luâk bâlene siâ biwi helen manmapgât bunne biwiñânba agak meme bâleneâk makmap.

*Emet kârikne akto yeukne aregât keine.*

<sup>46</sup> Yeñe lau yeñandeâk, “Humonenne, Humonenne.” dâm nogonmâ âmâ nâñe den makyenngiman are bo lokomai are amâ ârândân bo akmap.

<sup>47</sup> Siâne nâñgât denne nâñgâm lokom manmap are âmâ dop hin dâre nâñgâñet.

<sup>48</sup> Luâk siâne emetne ketugum tetembeñe kâlep anuñdo gembo totokombo kârikne agep. Kârikne akto âmâ emetne are ketugumbo ârândân akmâ tato âmâ wâriñ humo mendo tu seru kârikne akto emet are kârikne akmâ bo kâwulakmâ kilep. Luâk hain arekne dop hain aktâp.

<sup>49</sup> Dâ siâne denne ire nâñgâm âmâ hepulep aregât dop âmâ luâk siâ emet ketugum âmâ tetembeñe yân hanâk yogan yogan kakñân anuñdo kilep. Ain âmâ tu seru humo pando âmâ yogan yogan akmâ kâwulakmap.” dâep.

## 7

*Yesune dâmba hoñ bawa siâ âlepne agep.*

<sup>1</sup> Yesune den bunne are makyenngim metem âmâ Kapanaum kepien ariep.

<sup>2</sup> Arimbo Roma tembe loko yenngât kautne siâne ikinje hoñ bawa nâñgâ anño humo agep are momberâm agep.

<sup>3</sup> Hain akto luâk kotdâ arekne Yesugât pat nâñgâm âmâ Yuda damunyenje mali are arim Yesu

kewugumbiâ togom hoŋ bawa maganjo kundat hepulâkgât makyenŋiep.

<sup>4</sup> Makmâ hungunyenŋimbo arim hin dâm ulilaŋi, “Roma tembe loko yenŋât kautŋe siâ hutnenŋân mando luâk âlepŋe dâmaen.

<sup>5</sup> Akto nengât den emetŋaet puli kato ketugu nengiyi aregât denŋe nânŋâmenâ ârândâŋ agâk.” dâm maganŋi.

<sup>6</sup> Hain maganŋiâ nânŋâm yâk olop ariyi. Arim emetŋe are ewumâk akbiâ galalupŋe den hin dâm makyenŋim hunŋun yenŋimbo Yesugâlân arim maganŋi, “O Humo, damun nenŋande hin dâp, “Nâ luâk yânŋe mandân aregât nânŋâlân bo togowen. Akto nunaet nânŋâre ârândâŋ bo aktâp.

<sup>7</sup> Akto nâ gânŋâlân bo togoman. Aregât gâ yân denâk makmenâ hoŋ bawane ire âlepŋe agâk.

<sup>8</sup> Akto nâ luâk humomo yenŋât den lokoman. Dâ tembe lokolupnande âmâ nânŋât den lokomai. Hain akbiâ hutyenŋân gâtŋe siâ maganmâ, “Gâ ari” dâre âlepŋe arimap. Akto siâgât, “Gâ ga” dâre âlepŋe gamap. Akto siâgât, “Âi me” dâre âi memap.” hain dâp.” dâyi.

<sup>9</sup> Hain dâmbiâ Yesuŋe tembe loko yenŋât den are nânŋâmbo dâtŋe akto aregât purik katmâ haminŋân dondâ kili are hin dâm makyenŋiep, “Makyenŋire nânŋânŋet. Israe luâk yenŋât hut yenânba luâk siâŋe nânŋâniŋmap âlepŋe hinare bo mem miawagân.” dâep.

<sup>10</sup> Hain dâambo tembe loko galalupnande purik katmâ arim emelan âgâm hoŋ bawa âlepŋe agep are egi.

*Yesuŋe dâambo luâk momoŋe siâ agatmâ âlepŋe*



*agep.*

<sup>11</sup> Akto Yesu Aposololupņe ołowâk kepia siâ kotņe Naiņ ain arimbiâ luâk kâmot humoņe hamiyeņân kinbiâ ołowâk ariyi.

<sup>12</sup> Akto kepia are tâlâgumbo luâk âmbâle kâmot humo siâņe âmbâle kambut siâgât nanņe konok moep are lokom hangowerâm togoyi.

<sup>13</sup> Togombiâ Humoņe âmbâi kambut are ekmâ okot nâņgâm hin dâep, “Bo inde.” dâep.

<sup>14</sup> Hain dâm temân dâgâm lokom togoyi are mendo yân kinbiâ hin dâep, “Luâk sigan agat.”

<sup>15</sup> dâm maganņdo luâk momoņe are agatmâ den agep. Den akto Yesuņe maganņmâ, “Memege olop malet.” dâep.

<sup>16</sup> Hain dâmbo luâk âmbâle arekņe ekmâ ongâyeņe hogombo bâtyeņe dâtyeņân igim kinmâ Anutu maganņmâ hin dâyi, “Anutu gâņe hoņ bawage humo siâ huņgunanņen are hutnennân mandâp.” dâyi. Dâm âmâ hin dewatim dâyi, “Anutuņe luâk âmbâle damun nenņe akberâm huņgun aņdo togoep.” dâyi.

<sup>17</sup> Akto Yesuņe agep aregât pat are sambelem arim Yudaia hân akto hân biken biken arimbo hârokņe nâņgâyi.

*Yesuņe Yohanegât dâep.*

<sup>18</sup> Yohane tu puliyenņiep yâkgât galalupņande Yesuņe wan me wan miep aregât den pat magani.

<sup>19</sup> Maganņbiâ galalogâtņe lâuwâ siâ yetkondo togombela den hin makyetkim huņgun yetkiep, “Humogâlân arim den hin dâm maganņlet, Luâk togowiapgât dâyi are gâ me? Nen niņande togoâk dâm lâmgom manden?” hain dâm maganņlet.”

<sup>20</sup> Hain dâm hunḡun yetkimbo Yesugâlân togom hin dâm magan̄iat, “Yohane tuân katyegep arek̄ne hin dâm hunḡun netkiâp. Luâk togowiapgât dâyi are gâ me? Me siâgât lâmgom manbaen?” dâyat.

<sup>21</sup> Akto sop ain Yesuḡe luâk kundatyene olop are makyen̄gimbo bo akyen̄giep. Akto sinduk baniara bâlen̄ande kautyen̄ân meyegi are watyegep. Akto dewunyeḡe bok bok̄ne makyen̄gimbo dewunyeḡe hâreakto egi.

<sup>22</sup> Aregât Yesuḡe Yohanegât galalogât̄ne hin dâm makyetkiep, “Yet arim âmâ wan me wan yet̄ne dewunyet̄ande ektat akto ondopyet̄ande nân̄gat nân̄gâ yâkgât den pat Yohane hin dâm magan̄let, “Dewunyeḡe bok bok̄ne yâk yen̄gât dâmbo dewunyeḡe hâreakto ektâi. Keiyene gon̄goḡe yâk yen̄gât dâmbo âlep̄ne akmâ bam gutâi. Hâk bâle mi-awak yen̄gimbo manmai yâk yen̄gât dâmbo âlep̄ne aktâi. Ondopyene bok bok̄ne yâk yen̄gât dâmbo ondopyene pâron̄ âgâmbo den âlep̄ne nân̄gâi. Momeḡe yen̄gât makto golâ akmâ mandâi. Akto umburuk mandâi are den pat âlep̄ne makyen̄gimbo nân̄gâi.”

<sup>23</sup> Akto luâk siâ nân̄gât akmâ bo bâleniḡmâ hâkân̄ akniḡbiap amâ yâkgât nân̄gâre âlep̄ne humo akbiap.” Hain dâm hunḡun yetkiep.

<sup>24</sup> Hunḡun yetkimbo purik katmâ arimbela Yesuḡe luâk âm̄bâle kili are Yohanegât hin makyen̄giep, “Ye hân kamit̄n̄angen wan ekberâm ariyi? Seruḡe kâro waito duwuḡ akto are ekberâm ariyi me?”

<sup>25</sup> Yohane âmâ haingât dop̄ne bo. Me luâk siâḡe hâk pekeḡe kulem melem agak̄ne luguakmâ kei

pekeŋe âlepŋe dondâ kalep are ekberâm ariyi me? Amâ bo. Luâk hain arekŋande luâk humomo yeŋgât emelan tatmâ sot âlepŋe nembia tepyeŋe pikto gemai.

<sup>26</sup> Yohane âmâ hainare yeŋgât dopŋe bo. Aregât ye wan ekberâm ariyi? Ye Anutugât den dâm miawagep siâ ekberâm ariyi. Aregât makyenŋire nânŋâŋet. Yohane egi are âmâ Anutugât den makmâ miawakmâ gayi yâk hainare bo.

<sup>27</sup> Yâk âmâ siâ. Yâkŋe âmâ hârok ewangiyektâp. Hain gârâmâ Anutuŋe yâkgât den hin dâep are tatâp,

“Nune hoŋ bawane maganmâ huŋganaŋdere laune lokom gâŋgât ulikŋân akŋimâ dâp heŋgemgo giŋbiap.”

Akto den kulemgoep are bunŋe akto Yohane togoep.

<sup>28</sup> Akto luâk siâŋe Yohane ewangiwiapgât dop bo tatâp. Are âmâ Yohanene ulik gulik akmâ âinaet keiŋe bo ekmâ nânŋâwiap aregât luâk yânŋe biwiyeŋe Anutugâlân katbiâ arim kinbiap yâk hârokŋe Yohane ewangiwai.”

<sup>29</sup> Hain dâm makyenŋimbo luâk âmbâle dondâŋe gawamangât puli meme luâk olowâk yâkŋe emelâk Anutugât den lokom manbiâ Yohanene tuân mem katyegep yâkŋe Anutugât den are tângombiâ bunŋe agep.

<sup>30</sup> Dâ Parisaio luâk akto Mosegât den makyenŋimini yâkŋe âmâ Anutugât dâp are hâkâŋ akmâ Yohanene tuân bo kat nenegâk dâm manmâ gayi. Hain agigât yâkŋe âmâ nânŋâmbiâ bunŋe bo agep.

<sup>31</sup> Akto den siâ hin dâm lâuwâŋe makyenŋiep,

“Luâk kâmot ire yâk yengât wanân dop katmâ makbe? Yâk wan hinare?”

<sup>32</sup> Nananj kâmot lâuwâ kepia sombeimân tat-bai. Akto kâmot siâne kâmot siâ are hin dâm makyengiwei, “Nenne herone akmâ bâtâ kondenne yeŋe kep bo kondâi. Akto nenne âi girâp akmâ indien hain indenet dâm makyengiŋne bo indeâi.” dâwai.

<sup>33</sup> Akto aregât maktere nângâŋet. Yohanene tuân katyegep yâkne âi keiŋe katmâ tu sot bo nem manmâ âmâ yân âi mem manmâ gambo hin dâyi, “O, luâk ire sinduk baniara bâleŋande meme agandâp.”

<sup>34</sup> Akto nâ luâk akmâ geân nâne sot sonjo nendere nekmâ hin dâmai, “Luâk ire âmâ sot humo nem mandâp are gawamangât puli meme luâk akto luâk bâleŋe yengât gala.” dâmai.

<sup>35</sup> Anutugât nângâ nângâ kâmot are âmâ gin-bailupne yâkne yâkgât keiŋe mem golâ katbiâ bunne kârikne agep.” dâep.

### *Âmbâle siâne Yesugât keiŋe puliep.*

<sup>36</sup> Parisaio luâk siâne Yesu kewugumbo emetjân âgâmbo mendugu akmâ sot neyi.

<sup>37</sup> Sot nem tatbiâ ain gâtne âmbâle dâp gulip malep siâne Yesu Parisaio luâk yâkgât emetjân âgâm talep are nângâm tu higenne are mem âgâep.

<sup>38</sup> Mem âgâm hamiŋân kinmâ indembo dewunne tuŋe târâŋ dâm keiŋân giep. Gembo dumutne yeukne arekne keiŋe pulim metiep. Pulim metem âmâ keiŋe mem manganmâ tu higenne are keiŋân kâim puliep.

39 Hain akto Parisaio Yesu kewugumbo âgâyat arekñe ekmâ biwiñânâk hin nângâep, “Dâp gulip manmap irekñe aktâp ire bo agakñe. Gârâmâ bundâk Yesu Anutugât hoñ bawa manmap dâine âmbâle iregât keiñe nângâwop.” dâm nângâep.

40 Hain nângâmbo Yesuñe ekmâ nângâm âmâ hin magañep, “Simon, den siâ maktere nângâ.” dâmbo hin magañep, “Tiksa, makniñmenâ nângâwe.” dâmbo

41 hin magañep, “Luâk siâñe luâk lâuwâ puli yetkiep siâ 50 kina siâ 5 kina.

42 Akto siân aregât hâuñe niñlet dâmbo puli are panbela bo agep. Bo akto bo mem miawagiat aregât yâkgâlân arim kinmâ hin dâyat, “Puli bo tat netkiâp.” dâmbela hin makyetkiep, “Hanâk, misiget, âlepñe ariet.” dâmbo ariyat. Hain akto âmâ niñande dosa hepunañep aregât nângâmbo huraguep? 50 kina miep arekñe me 5 kina miep? Aregât makniñmenâ nângâwe.” dâep.

43 Hain dâmbo hin dâep, “Puli dondâ miep arekñe ukenñe nângâep.” dâep. Hain dâmbo Yesuñe hin dâm magañep, “Gâ âlepñe maktât.”

44 Hain dâm âmbâle are ekmâ hin dâm Simon magañep, “Âmbâle ire ek. Nâ gâñgât emelan gare tu bo kâim niñmenâ puliaktân. Akto âmbâle irekñe âmâ indembo dewunñe tuñe keinân gembo dumutñande puli nektâp.

45 Gâñe âmâ bo mañgan nektât. Dâ âmbâle irekñe âmâ keiñe mem mañgan nekmâ heronñe akniñdâp.

46 Akto gare gâñe âmâ tu higen suk suk siâ kautnân bo kâiât aregât âmbâle irekñe âmâ tu higenñe olop kâimbo keinân gembo puli nektâp.

47 Âmbâle irekne âmâ gala konok akniņdâpgât nâ yâkgât patne hin maktere nâņgâ. Luâk siâņe galaņæet dosa umatne puliaņdo aregât herone humo nâņgâ aņbiap. Dâ luâk siâņe galaņæet dosa bikneâk puliaņdo aregât herone kakneâk nâņgâ aņbiap. Aregât keiņe hin dâre nâņgâ. Anutuņe âmbâle iregât dosane umatne are emelâk hepun aņdo herone humo nâņgâ niņdâp hain.”

48 Hain dâm âmbâle are hin dâm maganeņep, “Dosage emelâk hepun giņdân.” dâep.

49 Hain dâmbo olowâk tatmâ sot neyi arekne biwi yeņân hin nâņgâyi, “Luâk iregât keiņe gain gain hinare? Gain gain akmâ dosage emelâk hepun giņdân dâp?”

50 Biwiyenande hain nâņgâmbiâ Yesuņe âmbâle are hin dâm maganeņep, “Biwige Anutugâlân arim kindâp aregât kambiamge sândugembo manbiat.” dâm maganeņep.

## 8

### *Yesu olop ariyi yeņgât keiyene.*

1 Sop aregât kakņân Yesuņe kepia hârogâk ândeañmâ arim Anutuņe damunyeņe akberâm aktâp aregât den pat âlepne makyenġim malep. Akto Aposololupne keiân lâuwâ are oloņ yekto olowâk ariyi.

2 Akto âmbâle bikne olop ariyi are yeņgât keiyene hin. Bikne âmâ sinduk baniara bâleņande meyek-biâ are watyenġimbo âlepne agi are. Akto bikne âmâ heņgem yeņguep yâk olop ariyi. Akto yâk yeņgâlân gâtne siâ kotne Maria Madala kepian

gâtņe, yâkgât âmâ sinduk baniara bâleņe nâmbulân lâuwâ walaņep.

<sup>3</sup> Akto siâ kotņe Yohana are Herotegât hoņ bawa luâk kotņe Kusa yâkgât âmbenņe. Akto siâ kotņe Susana. Akto âmbâle bikņe puli oyaņmâ Yesu akto aposololupņe yeņgiyi are olowâk ariyi.

*Anutugât den aregât dâp.*

<sup>4</sup> Luâk âmbâle dondâņe kepiayenņe hepunmâ Yesugâlân togom mendugumbiâ yekmâ âmâ den ginņe hin dâm makyenņiep,

<sup>5</sup> “Luâk siâņe senņo alekņe are panberâm âiângen mem ariep. Akto alekņe bikņe dâwân gembo luâkņe tâlim hogombiâ lâutņe togom nem meteyi.

<sup>6</sup> Dâ senņo alekņe bikņe âmâ hân yam yamân gembo kâmņe gam âmâ tu bogât ainâk moep.

<sup>7</sup> Akto alekņe bikņe hele kâlegen giep. Gem kâmņe gambo are âmâ hele humoņe gam âgâm lokom gunduņaņdo moep.

<sup>8</sup> Akto alekņe bikņe âmâ hân keluņe olowân gembo miawakmâ kâmņe bususuk dâm gam bunņe dondâ miawagep.” Hain are makmâ âmâ benņe kârikņeâk makmâ hin magep, “Luâk ondopdâņe den ire nâņgâwi.” dâep.

<sup>9</sup> Akto hoņ bawalupņande den memenņe aregât keiņe gain gaingât maktât dâm aikoyi.

<sup>10</sup> Aikombiâ hin dâm makyenņiep, “Anutuņe ye emelâk nâņgâ nâņgâyenņe mem pâroņ kalep. Kato Anutuņe damunyenņe akmapgât keiņe nâņgâi. Dâ bikņe amâ ekmâ âmâ bo ekmâ nâņgâm heņgemgomai. Amâ Anutuņe makto dewunyenņande âmâ ekmai. Dâ biwiyenân bo gemap. Akto ondop yeņande nâņgâmai. Dâ nâņgâ

nângâ yeñân bo gemap. Aregât den dopñân maktere keiñe bo nâñgâmai.

<sup>11</sup> Hain. Akto den ginñe makyenñiân aregât keiñe hin. Anutugât denñe seño alekñe aktâp.

<sup>12</sup> Seño alekñande dâwân giep. Hân dop are âmâ hinare manbai arekñe Anutugât den nâñgâmbiâ biwiyenñân ewuwiap. Ewumbo Niambiñe ekmâ den are nâñgâm biwiyene nâñgâlân katbiâ Anutñe damunyeñe akbopgât hâreyenñim ariwiap.

<sup>13</sup> Dâ seño koañe kât heregân giep dop hainare manbai yâkñe den pat âlepñe nâñgâm arekñeak ukenñe akbai. Dâ hanyenñân kândârâñe bo giep gât sop pân konok dondâ mem âmâ dopko dopko miawakto den pat âlepñe hamianñmai.

<sup>14</sup> Akto seño alekñe bikñe hele kâlegen giep dop hinare manbainje amâ Anutugât den nâñgâwai. Nâñgâm âmâ hâkgât siâ me siâgât nâñgâm heñgemgom puli me sâñgum lâuwâ lâuwâ me ito sikum aregât ukenñe nâñgâm hanokoakmâ âmâ den are hepunbiâ âmâ bunñe bo akmap.

<sup>15</sup> Dâ koañe hân kelurâ ain giep dop hainare manbai yâkñe den pat âlepñe nâñgâm han yeñe heñgemgom yeukñân mem manmai. Hain akmâ kârikñe akmâ bunñe penianñmai.

### *Pagalenegât dop.*

<sup>16</sup> Luâk siâñe pagalenje sagom âmâ umbâ kâlegen me yeye amukñân kato bo tatmap. Tek tekñân kato emet kâlenje pagalembo ekmâ gem âgâmai.

<sup>17</sup> Aregât keiñe âmâ hin. Wan me wan tip yemap are mem miapanbai. Dâ siâ me siâ ekbiâ bo akto are pagalenñân miawakto hârokñe ekbai.



18 Siâ siâ me siâ talaŋdo âmâ Anutuŋe siâ waŋdo sambeleanbiap. Dâ siâ siâ me siâ bo talaŋmap are bâtnân tatniŋdâp dâm nâŋgâm hilipkombo are Anutuŋe bâtŋânba oloŋmâ pando yân tatbiap. Aregât den makmâ tatân ire nâŋgâm gangerâm manbi.” hain dâep.

*Yesugât memenje emilupŋe.*

19 Sop ain luâk kâmot humoŋe Yesu ândeanmâ kinbiâ memenje emilupŋe togom imbianmâ ekberâm ewum hâumgom kâlewânâk kili.

20 Kâlewânâk kinbiâ luâk siâŋe hin dâm magaŋep, “Memege emilupgande gekberâm togo iŋgon betgen kinmâ gemenâ gekne dâm gogondâi.” dâep.

21 Hain dâmbo Yesuŋe hin dâm magaŋep, “Anutugât den nâŋgâm lokomai ire âmâ nâŋgât memene emilupne are yengât dop aktâi.” dâep.

*Yesuŋe seru magaŋdo sândugiep.*

22 Hilâm siân Yesuŋe hin dâm makyenŋiep, “Bâtgum ire hâtikom biken arine.” dâmbo olop waŋgan âgâm ariyi.

23 Arimbiâ Yesu asin yiep. Yem tato seru humo pando âmâ haru are bâliep. Bâlimbo âmâ waŋga are kâi akberâm agep.

24 Kâi akberâm akto Humo are goaŋmâ hin dâyi, “Wâe, luâk Humo, nen ire haruân bâliweren.” dâmbiâ agatmâ makto seru akto haru nâŋgâm nâŋgâiyiat.

25 Nâŋgâmbela hin dâm makyenŋiep, “Nâŋgâm kepilâniŋmai are yâgâte?” dâmbo yâkŋe âmâ wan me wan akmâ miep are ekmâ otneyeŋe ariep. Arimbo kinmâ hin dâm magaŋgi goaŋgi agi, “Ae,

luâk irekñe âmâ seru akto haru ina den makto nânğanđat aregât keñe gain gain?” dâyi.

*Yesuñe sinduk baniara watyekto bauyeñgât bi-wiyenân geyi.*

<sup>26</sup> Akto bätgum are hâtikom Galilaia hân bikñângen Gerasene are yeñgâlân ariyi.

<sup>27</sup> Ain arim wañgañe haru dâtñân kindo sopanmâ ge kindo âmâ luâk siâ kepiangenba togom peniañep. Aregât keñe hin. Sinduk baniara bâleñe kugâkñe memene agañbiâ malep. Agañbiâ hâk pekeñe bälâk manmâ añun bo añgim sop kâlep hainâk malep. Manmâ emetñân bo manmâ âmâ sumângen hilâm ârândâñ arim togominep.

<sup>28-29</sup> Hain akto tembe lokoñe bätñe bikñe bikñe dâgâmbiâ âmâ piriñ piriñ kato hâreakto sinduk baniara arekñe hâwâlañdo hân kamitñângen arim-inep. Keñe hain. Akto luâk are togom Yesu ekto sinduk baniara bâleñe are wat yekberâm akto aregât enemñân ge yiep. Yem âmâ hin magañep, “Yesu gâ Anutu Humo dondâ yâkgât nanñe wangât nânğâlân togoât? Nâ hâk hilâlâm bo niñ.” dâmbo

<sup>30</sup> ekmâ magañep, “Kotge niñe?” dâm aikombo sinduk baniara dondâne memene agañbiâ malep aregât agonakmâ hin dâep, “Kotne kâmot humo.” dâep.

<sup>31</sup> Hain dâmbo sinduk baniara dondâ arekñe Yesu hin dâm ulilañi, “Âlepñe huñgun nengimenâ hememân bo gieneñe nenguwerâp.” dâm ulilañi.

<sup>32</sup> Akto hân ain bau dondâ tâmut nem mali aregât sinduk baniara bâleñe arekñe magañi, “Nânğâ nengimenâ luâk ire hepunmâ bau yeñgât biwiyenân gene.”

<sup>33</sup> dâmbiâ, “Âlepņe.” dâmbô arekņeak luâk are hepunmâ bauyeņgât biwiyenân geyi. Gembiâ baune gem tu denġânân gembiâ lauyeņân pikto moyi.

<sup>34</sup> Akto bau damunyeņe arekņe are ekmâ pârigim arim luâk âmbâle dondâne kalam yeņângen me kepia yeņângen ari den pat are makyenġiyi.

<sup>35</sup> Makyenġimbiâ luâk âmbâle hameņe olowâk wan me wan agep are ekberâm Yesugâlân togoyi. Togombiâ sinduk baniaņe memene agani yâkņe âmâ nânġâ nânġâņe hulaņ akto hâk pekeņe lugu akmâ Yesugât keiņân talep. Are ekmâ hamep akmâ kili.

<sup>36</sup> Kinbiâ âmâ wan me wan are ekmâ nânġâyine sinduk baniaara watyekto âlepņe agep yâkgât den pat makyenġiyi.

<sup>37</sup> Makyenġimbiâ Gerasene hân ambolupņande hamep akmâ Yesuņe hân are hepunmâ siângen ariâk dâm areġât magani. Magaņbiâ ariwerâm waņgan âġâmbo

<sup>38</sup> luâk sinduk baniaara walaņep arekņe olop arire dâm magaņep. Magaņdo Yesuņe hin magaņep, “Ġâ tat.

<sup>39</sup> Anutune heņgem guguâp areġât den pat ewege memege akto ginbailupge makyenġiwen.” dâm magaņep. Hain dâmbô purik katmâ arim Yesuņe heņgemgoep areġât den pat hârogâk makyenġiep.

*Yesuņe dâmbô den emetņe damun luâk areġât baratņe siâ momoņânba agalep.*

<sup>40</sup> Akto Yesuñe kepia are hepunmâ bâtgum biken ariep. Arimbo lâmgom tali arekñe dondâñe heronje agi.

<sup>41</sup> Heronje agañbiâ den emetñe damunñe siâ kotñe Yairo arekñe keiñân kâñgom âmâ togom hin dâm magañep,

<sup>42</sup> “Baratne konok dondâ hombañe 12 are momberâm aktâpgât gâ kewugu gekmâ emetnân ariwerâm aktân.” Hain dâm magañdo olowâk ariyat. Arimbela luâk âmbâle dondâñe watmâ arim ândean gondeañ agi.

<sup>43</sup> Akto hutuyenân âmbâle siâ kilep yâkgât keiñe hin. Âmbâle yeñgât dewutâ gambo akmai dop hain bo akminep. Hokboâk hokboâk gambo mando hombañ 12 bo agep. Hain akmâ manmâ gambo doktañe tângowerâm ewum hâumgom hepunmini.

<sup>44</sup> Akto âmbâle arekñe Yesugât hamiñân arim luguak luguakñe mem walip koañep. Walip kom arekñeak âlepñe agep.

<sup>45</sup> Âlepñe akto ainâk Yesuñe hin dâm aiyenñuep, “Niñande mem walip nuguâp?” dêep. Hain dâmbo hârogâkñe ândean gondeañ agi arekñe nen bonânğâen dâmbiâ aregât Petoronje hin dêep, “Apo, luâk dondâ ândean gondeañ ketugu gektâi.” dâmbo

<sup>46</sup> hin dêep, “Wâtne gembo aregât maktân. Siâñe walip nuguâpgât nânğân.” dâmbo

<sup>47</sup> âmbâle arekñe bundâk howaire nânğâp dâm ongâñe hogombo Yesugât enemñân bam âmâ walip kom âlepñe agep aregât keiñe hârogâk ain kili yeñgât dewunyenñân makmâ miawakmâ magañep.

<sup>48</sup> Magañdo nânğâm hin magañep, “Meñ, biwige

nângâlân katât aregât Anutuņe nângâ giņdo âlepņe aktât. Yeukņân bam ari.” dâep.

<sup>49</sup> Hain dâm kindo ainâk Yairogât hoņ bawa siâņe emelanba gam hin dâm magañep, “Baratge emelâk mondâp aregât luâk Humo ire inâk talâk. Umatņe siâkâ bo agaņ. Bo hâwâlaņ.” dâmbo

<sup>50</sup> Yesuņe nângâm Yairo hin dâm magañep, “Nângâmâk bo ak. Biwige nângâlân katmenâ baratge âlepņe akberâp.” dâep.

<sup>51</sup> Hain dâm oloņmâ arim Yairogât emet ewumâk kinmâ bikņe yeņgât dâmbo kili. Kinbiâ Peto, Yohane, Yakobo akto âmbâi sisik aregât eweņe memenņe meyekto emelan olowâk âgâyi.

<sup>52</sup> Akto luâk âmbâleņe indem kambiam bâle agi are hin dâm makyenņiep, “Baratyetņe ire bo mondâp. Yân asiņ yendâp aregât ye bo indenet.” dâmbo nângâm giriņ aņi.

<sup>53</sup> Giriņ aņmâ hin dâyi, “Wangât hain dât? Are bunņe mondâp.”

<sup>54</sup> dâmbiâ baratyetņe mem magañep, “Barat agatmâ kin.”

<sup>55</sup> dâmbo tepņân tuk tuk dâmbo ainâk agalep. Agato sot om waņbiâ neâk dâm makyenņiep.

<sup>56</sup> Hain akto aregât eweņe memenņande ekbela dâtņe agep. Akto Yesuņe hin dâm makyetkiep, “Iregât den pat bo makyenņiwandâp.” dâm makmâ hâre yetkiep.

## 9

*Yesuņe Aposololupņe huņgunyengimbo âi keiņe kali.*

1 Yesuŋe Aposolo 12 mem oloŋyekto togombiâ sinduk baniara bâleŋande meme akyeŋgimini are watyeŋgiwaigât akto kundatdâ mem âlepŋe ketugu yekbaigât aregât makmâ kârikŋe yeŋgiep.

2 Akto Anutuŋe damunyeŋe akto den pat makyeŋgim kundatdâ mem âlepŋe ketugu yekbai aregât huŋgun yeŋgim hin dâm makyeŋgiep,

3 “Ariwerâm âmâ huwan, ito, sot, puli akto hâk pekeŋe dondâ bo mem ariwai.

4 Kepia siân arimbiâ emelan oloŋ yekmâ âgâmbiâ ainâk tatmâ gem ariwai.

5 Akto siân arimbiâ âmâ gala bo akyeŋgimbiâ âmâ kepia are hepunmâ keiyeŋân nukum tatbiap are paŋ paŋgom panmâ den kârikŋe makyeŋgim arimbiâ âmâ yeŋgât keiyeŋe nâŋgâwai.” dâep.

6 Hain dâm makyeŋgim huŋgun yeŋgimbo kepiaŋe kepiaŋe arim manmâ Anutu damunyeŋe akbiap aregât den pat makyeŋgiyi. Akto kundatdâ mem âlepŋe ketugu yegi.

*Heroteŋe Yesugât den pat nâŋgâep.*

7-9 Akto Yesuŋe ya agep aregât bikŋande hin maŋangi goaŋgi agi, “Yohaneŋe momoŋânba agatmâ mandâp mon?” dâyi. Dâ bikŋande âmâ hin dâyi, “Eliane lâuwâŋe miawakmâ mandâp mon?” dâyi. Dâ bikŋande âmâ hin dâyi, “Anutugât hoŋ bawa emelâk gâtŋe siâŋe momoŋânba agatmâ mandâp mon?” hain dâyi. Hain dâmbiâ Heroteŋe nâŋgâmbo ârândân bo akto han lâuwâ akmâ hin dâep, “Emelâk maktere Yohane hanŋe hâreyi. Dâ ire âmâ niŋande hainare akmâ mandâp aregât den pat ire nâŋgân?” hain dâm Yesu ekberâm agep.

*Yesuŋe luâk 5,000 sot yeŋgimbo neyi.*

10 Akto aposololupņande âi ketugum mali. Manmâ purik katmâ aregât den pat Yesu magañi. Den pat dâm magañbiâ Yesuņe meyekmâ, “Nenņeak ari manmâ biwiyeņe sândugeâk.” dâambo Besaida kepiangen ariyi.

11 Arimbiâ luâk bikņande yekmâ âmâ hamiyenân ariyi. Akto Yesugâlân togombiâ gala akyeņgimbo mali. Manmâ Anutuņe damunyeņe akberâm agep aregât den pat makyeņgiep. Akto kundat agi are mem heņgem yeņguep.

12 Hain akmâ kindo emet dâgâ yeņgiwop dâm aposololupņe bāt biken lâuwâ arekņe togom hin magañi, “Iren hân kamitņângen manden aregât luâk âmbâle huņgun yeņgimenâ kepiayeņângen arim sot mem neņet.” dâm magañi.

13 Hain dâmbiâ hin dâm makyeņgiep, “Yeņe sot siâ yeņgiņet.” dâambo hin dâm magañi, “Nen sot mo-merâk akto iņan lâuwâ areâk tat nengiâp. Aregât gain gain akberen? Kepiangen arim luâk kâmot humo ire yeņgât sot puligonegât maktât me?” dâyi.

14 Amâ luâk 5,000 maligât. Dâ Yesuņe hin dâm makyeņgiep, “Makyeņgimbiâ kâmot 50 âk hârok ain ain tatmâ ariņet.” dâep.

15 Hain dâambo makyeņgimbiâ hainâk tatbiâ

16 sot akto iņan are mem himbimân dewunņe panmâ Anutugât mepaiņe mem agatmâ iņan are munditmâ ligiep. Ligim sot are mem munditmâ hoņ bawalupņe ârândâņ yeņgimbo luâk âmbâle kâmot tali are oyaņ yekmâ yeņgimbiâ neyi.

17 Nembiâ tepyeņe pikto bikņe talep are âmâ hakan lugumbiâ haka 12 pigep.

*Petoroŋe Yesugât keiŋe makmâ miawagep.*

18 Akto hilâm siân Yesu ikiŋeâk manmâ Anutu olop den maganġiyat. Hain akbela Aposolone yâkgâlân arimbiâ aiyenġum hin dêep, “Luâk âmbâleŋe nânġât niŋe dâmai?” dêep.

19 Hain dâambo yâkŋe hin dâm maganġi, “Bikŋande âmâ Yohane tuân katyegep are hain dâmai. Dâ bikŋande âmâ Elia hain dâmai. Akto bikŋande âmâ Anutugât hoŋ bawa propete siâ emelâk moep arekŋe momoŋânba agatmâ mandâp hain dâmai.” dâyi.

20 Hain dâmbiâ hin aiyenġuep, “Dâ yeŋe âmâ nânġât niŋe dâmai?” dâambo Petoroŋe hin maganġep, “Gâmâ Anutuŋe huŋgun ġiŋdo damun nenŋe akberâm ġien are bunŋe.” dêep.

21 Hain dâambo areġât bo makmâ miawakmâ makyenġiwi dâm makmâ hâreyenġiep.

22 Akto lâuwâŋe hin dâm makyenġiep, “Nâ luâk akmâ geângât nâ wan me wan akniŋbiâ nâ hâk hilâlâm nânġâwian. Ain âmâ sumbe kat kat luâk akto Moseġât den kârikŋe makmâ miawakmai akto kepia ambolupŋe yeŋġât damunlupyenġande gasa akniŋmâ nugumbiâ mondere hilâm âlâwu bo akto momoŋânba agatmâ manbian.” dêep.

*Yesugât den lokom manmai areġât keiŋe.*

23 Yesuŋe luâk âmbâle hin dâm makyenġiep, “Luâk bikŋande biwiyenŋe nânġâlân katmâ nâ olop ariwerâm âmâ wan me wan akmâ hilipkowai areġât bo hamep akmâ manbai. Akto yeŋe hâkyenġaet bo nânġâm hilâmŋe hilâmŋe nânġât den lokom manbai.



24 Dâ siâne ikiye manmanje gangerâwiap are âmâ hilip aguwiap. Akto siâne nângât den âi aregâlâk nângâm mando kombiâ âmâ momonânba agatbiap.

25 Dâ siâne manmâ siâ siâ mem lokom aregât ukenje âlepje akbiapje mombiap sop ain wan me wangât ya ukenje akbiap arekje bo tângombo momo kârikânba bo agatbiap.

26 Akto siâne nângât hâkân akmâ nângât den bo lokom manbiap aregât keije hin. Nâ luâk akmâ geân akto ewene netgât pagaleje netjande panmâ njirik njirik dâambo âmâ himbimân anelolupnetjande nâ olop gienne luâk ya akmai are nâkâ hainâk hami yenjiwian.

27 Maktere nângâjet. Yu kindâi ire bikje bo mom golâ manbaiân Anutuje damunyeje akbiapgât are ekbai.” Hain dâm makyenjiep.

*Mose akto Elia Yesu olop den maganji goanji agi.*

28 Yesuje den hain dâm makyengimbo hilâm 8 mon bo akto Anutu olop den akberâm Petoro, Yohane, Yakobo, meyekto gimbâje siân âgâyi.

29 Âgâmbiâ Anutu olop den akbela Petoro akto galalogâtje yâk asingât akmâ tali. Hain akbiâ Yesugât enem dewunje siâ akto hâk pekenje lugu agep are kau timan timan agep.

30 Hain akto himbim pagaleje belek belek dâm yendo luâk lâuwâ Mose akto Elia ainâk miawagiat.

31 Yâk miawakmâ Yesu Yerusalem kepien arim Anutuje yâkgât makmâ hâreañep are watmâ mombiap aregât yâk olop den maganji goanji agi.

32 Den aregât maganġim kâlâkom agatbiâ Petoro akto galalogâtne asingât dondâ akyetkimbo dewunyeje panmâ Yesu pagaleje kulemne akto luâk lâuwâ yâk olop kinbela yelegi.

33 Akto Mose akto Elia ariwerâm akbela Petoroje tirip aregât keiġe bo nânġâm Yesu hin dâm maganġep, “Luâk Humo, âlepne dondâ nen in manden aregât gâ nânġâmenâ uligi gânġât siâ Mosegât siâ Eliagât siâ hain ketugune.” dâep.

34 Hain dâambo ainâk hamandat akmâ dâġâm bup panmâ tigi yekto Petoro, Yohane akto Yakobo yâkne ongâyeje hogombo kili.

35 Hain akbiâ hamandat kâlegenba Anutuġe hin dâm makyenġiep, “Are ekġet. Luâk ire nânġât nanne okotne nânġâ anġere nânġât lau lokom manmap yâkġât denne nânġâm lokom manbai.”

36 Anutuġe den hain dâm kondo Yesuġe ikiġeâk kindo egi. Akto wan me wan egi are sop ain luâk siânba bo makyenġim yân biwiyenânâk katmâ nânġâm mali.

*Yesuġe sinduk baniara bâleġe walep.*

37 Emet haunġo gimbânġânba gemiâ luâk kâmot humoġe togom Yesu peniaġi.

38 Togom peniaġi yâk yenġât hutyenġânba siânġe Yesu hin dâm maganġep, “Luâk Humo, ireġât yu ulitġinbe. Nanne konok ire gam ek.

39 Keiġe hin. Sinduk baniara bâleġe siânġe hilâm ârândânġ kautġân mendo dewunġe gâwânġ gâwânġ dâambo ge yendo launġân barak pâtkombo den kârikġe makmap. Akto sinduk baniara bâleġe arekġe hilâm ârândânġ hainâk hilipkom hâk hilâlâm waġmap.

40 Haingât aposololupgande watnet dâm ulit yengire ewum hâumgom hepuli.” dâep.

41 Hain dâmbo Yesuñe hin dâm magañep, “Yei, luâk kâmot bo nângâniñmai ye hanyeñe kârikñe. Nâ ye olop sopñe sopñe manmâ sokom katyebian mon? Nange are mem ga.” dâep.

42 Hain dâmbo Yesugâlân mem âgâambo sinduk banirañe bâleñe agaño dewunñe gâwâñ gâwâñ dâmbo ge yiep. Hain akto Yesuñe sinduk baniara bâleñe are watmâ pando arimbo âlepñe akmâ eweñaelân ariep.

43 Arimbo luâk âmbâleñe Anutuñe memeneñe agaño kulem miep are ekmâ nângâm bâtyeñe dâtyeñân igim kinmâ han lâuwâ agi.

*Mombiap aregât makmâ miawagep.*

44 Hain akmâ dât yeñân igim kinbiâ Yesuñe hon bawalupñe oloñ yekmâ makyengim hin dâep, “Den ire makyengire nângâm mem biwiyenân katmâ manbi. Nâ luâk akmâ geân nâ hilip nuguwerâm luâkñe menekbai aregât sop tâlâguâp.” dâep.

45 Hain dâm makyengimbo nângâmbiâ den keiñe yeñaelân Anutuñe bo kalep aregât akmâ aikowerâm agi are nângâm hamep akmâ hepuli.

*Luâk gain hin arekñe humo akmâ ewangiyekbiap.*

46 Akto hon bawalupñe, “Nengâlân gâtñe niñande humonenñe akmâ manbiap?” dâm magañgi goañgi akmâ papalagi.

47 Hain akbiâ Yesuñe biwiyenâet keiñe ekmâ nângâm âmâ nanañ bâlensiâ siâ mem hutyeñân kato kindo hin dâm makyengiep,

48 “Siâñe nananj bâlensiâ ire hinare tângomap are âmâ nâ tân nugumap aregât dop akmap. Akto siâñe nâ tân nuguâp aregât dop akmap arekñe Anutuñe hungun niñep nâ tân nugumap. Akto yengâlân gâtñe siâñe, “Nâ luâk yânñe mandân.” dâm biwiñande ikinjaet nâñgâmbô gemapñe emelâk ewangi yektâp.” dâep.

49 Hain dâmbô Yohanene Yesu hin dâm magañep, “Luâk humo anjâ yengâlân gâtñe siâñe gâ gogonmâ sinduk baniara bâlene watyekto are ekmâ, “Gâ nengâlân gâtñe bo. Hain bo ak.” dâm koañion.” dâep.

50 Hain dâmbô Yesuñe hin dâm magañep, “Luâk siâñe gasa bo akyengimapñe amâ ye tân yengum gala akyengiwiap. Gârâmâ siâñe hain akto âmâ bo koañbi.” dâm magañep.

*Samaria kepia ambolupñande Yesugât hamep agi.*

51 Yesuñe himbimân purik katmâ âgâwiap aregât sop tâlâgumbo Yerusalem kepiã ariwerâm aregât biwiñe humo kalep.

52 Hain akmâ hoñ bawalupñe hungun yengimbo den mem ariyi. Arim Samaria yengât kepia siân arim Yesu ain ariwiap aregât, “Emet siâ yogan nengimbiâ heñgemgone.” dâm aregât kepia ambolupñe makyengiyi.

53 Makyengimbiâ Yesu Yerusalem kepiã ariwiap aregât kautñe oriepgât nâñgâm bo dâyi.

54 Hain dâm emet gangerâmbiâ Aposolo lâuwâ Yohane akto Yakobo yâkñe nâñgâmbela ârândân bo akto peiyekmâ Yesu aikom hin dâyiat, “Humo

gâ nânghâmenâ netje dêetje himbimânba kâlâp siâ gem oyegâk.” dâyat.

<sup>55</sup> Hain dâmbela purik dâm yelemâ, “Hepulet.” dâm den are koyetkiep.

<sup>56</sup> Koyetkimbo kepia siângen ariyi.

*Luâk hain arekne Yesugât haminân ariyi.*

<sup>57</sup> Arimbiâ luâk siâne mem miawakye kmâ Yesu hin dâm maganep, “Gâ iregen me aregen ariwerâm akmenâ nâ watge kmâ manbian.” dêep.

<sup>58</sup> Hain dâmbo Yesune hin dâm maganep, “Songo âmâ emetyene âlepân yemai akto lâut âmâ kelomyene âlepân tatmai. Dâ nâmâ luâk akmâ geân nâmâ emetne bo tatniᅇdâp.” dêep.

<sup>59</sup> Akto sop siân Yesune luâk siâ mem miawakmâ hin dâm maganep, “Gâ nâ wat nekmenâ olop mande.” dâmbo hin dêep, “Humo, nânghâmenâ nâne son arim apone hangom âkâ purik katmâ togore gâ olop ariwaet.” dêep.

<sup>60</sup> Hain dâmbo hin dêep, “Momone manmai arekne momolupyene hangoyeknet. Dâ gâmâ arim Anutune luâk âmbâle damunylene akbiap aregât den pat makyenᅇiwen.” dêep.

<sup>61</sup> Hain dâmbo luâk siâne Yesu hin dâm maganep, “Humo gâ olop ariwaetgât nânghân. Gârâmâ nânghâmenâ nâ purik katmâ arim ginbailupne yekmâ indem katyekmâ purikatmâ togore âmâ gâ olop ariwaet.” dêep.

<sup>62</sup> Hain dâmbo Yesune hin dêep, “Maktât aregât hin maktere nânghâ. Luâk siâne âiân ariwerâm âmâ pânân hepunbiapne amâ Anutugât kepiân ariwiap gât dop bo talanᅇbiap.” dêep.

# 10

## *Yesuŋe Anutugât den makyenŋiŋet dâm luâk 70 huŋgun yeŋgiep.*

<sup>1</sup> Manmâ Yesuŋe luâk 70 siâ mem oloŋ yekmâ âi den dâm yeŋgiep. Akto ikiŋak kepiane kepiane ariwerâm nânŋâep ain âmâ luâk lâuwâk lâuwâk mem katyekmâ, “Yeŋe soŋ ariŋet.” dâm huŋgun yeŋgiep.

<sup>2</sup> Huŋgun yeŋgiwerâm kinmâ den hin dâm makyenŋiep, “Kalamân sot bunŋe dondâ miawaktâp aregât âi amâ humo. Dâ âi luâk amâ amon siâ. Aregât sotgât Amboŋe maganbiâ Amboŋande ikiŋe kalamâŋgen luâk siâkâ lâuwâŋe katyegâk.

<sup>3</sup> Akto siâ makbe. Lama pâlâmŋe are dua metŋe hut yeŋân arimbiâ hilip yeŋgumai dop hainare akmâ luâk metŋe tânâmyeŋân huŋgun yeŋgire arim manbai.

<sup>4</sup> Huŋgun yeŋgire ariwerâm âmâ delem me puli me kei pekeŋe himbân lâuwâ bo meakmâ ariwai. Akto kepiangen ariwerâm dâwâŋgen luâk olop den kâlep bo akbai.

<sup>5</sup> Yânâk tâŋ tâŋâk kepiariwai. Akto emet siân âgâwerâm âmâ emet aregât ambolupŋe herone akyenŋiwai.

<sup>6</sup> Herone akyenŋimbiâ emet ambolupŋe bikŋande herone akmâ, “Gambiâ biwi konok akne.” dâmbiâ âmâ gala akyenŋiwai. Dâ emet ambolupŋande gala bo akyenŋimbiâ âmâ hepun yekmâ ariwi.

7 Âi luâk âi meyenġimai are âlepņe puli yenġimbiâ ârândânġ akmap. Aregât nânġât âi ketuguwai aregât

8 kepia siâ me siân âġâmbiâ sot om yenġimbiâ âmâ nem ain tatbi. Tatmâ emet ain ba bam emet anġân hanâk hanâk bo âġâwi.

9 Gala hain akyenġimbiâ ainâk tatmâ kundat akbai are heņgem yenġuwai. Heņgem yenġum âmâ hin dâm makyenġiwi, “Anutunġe damunyeņe akberâm aktâp aregât ire akyenġien.”

10 Hain dâm makyenġim arewa kepia siân arimbiâ hâkânġeņe akbai âmâ sombeimân kinmâ hin dâm makyenġiwi,

11 “Kepia in ġâtņe gagap pipiņe siâ bo membaen aregât keinennân nukum me gagap tatâp ire paņ paņgom pandenņe amâ hin ekmâ nânġânġet. Anutunġe damunyeņe akberâm aktâp aregât miawakbiapgât sop tâlâġuâk.” Hain dâm makyenġim hepun yekmâ ariwi.

12 Akto aregât keiņe maktere nânġânġet. Sop humoân Sodom kepia ambolupņe agak meme bâleņe aġi aregât hâu membai. Dâ kepia ambolupņande yenġât hâkânġ akbai aregât hâu bâleņe humo membai.” dâep.

13 Yesunġe hain dâm kepia bikņe yenġâlân katmâ hin magep, “Woe, Korasiņ kepia ambolupņe, woe, Besaida kepia ambolupņe, nânġe yenġâlân kulem hamepņe olowâk ketugum manmâ gan hain are Tiro Sidonġ kepiân ketuguân dâine yâkņe emelâk agak memeyeņe bâleņe are hepunmâ kânġom kinmâ yeņaet okot bâle nânġâ anġim manmâ Anutugât den nânġâwâi.

14 Ye hain akbai aregât siân sop humoân Tiro Sidon kepia ambolupñande dosa membai. Hain membiâ yeâmâ dosa umatñe bâleñe membai.

15 Akto Kapanaum ambolupñe ye hilâm ârândân kotyeñe mem agatmâ hin dâmai, “Nen emelâk himbingât pat akmâ manden.” Hain dâm mandâi. Aregât ye âmâ hememân gewai.

16 Yeñe den ire luâk âmbâle bikñe makmâ miawakyenjimbiâ âmâ Anutugât den tâñâk nânğawai. Akto den ire makyenjim miawakyenjimbiâ hâkân akmâ bo lokowai are âmâ ye bo hâkân yenğiwai. Are âmâ nâ hâkân niñmâ akbai. Akto huñgun niñep yâk gai hâkân ağanbai.” dâep. Hain dâm huñgun yenjimbo ariyi.

*Luâk 70 purik kali.*

17 Luâk 70 arekñe manmâ purik katmâ togom biwiyen heronje humo akto aregât Yesu magarñmâ hin dâyi, “Humo gâ gogonmâ kepia ain ain sinduk baniara watyenğienñe dennenñe lokoyi.” dâmbiâ

18 yâkñe hin dâep, “Ye arim sinduk baniara bâleñe watyekbiâ âmâ Niambiñe âmâ mem belek katmap dop hainâk akmâ himbimân ba ge kondo egân.

19 Nânğâi. Niambi sâmbâ metñe me dek kakñân tâlimbiâ hilip yenğuwop akto sinduk bâleñande mem siâ me siâ yenğiwop dâm aregât kârikñe yenğian. Gârâmâ wâtñân kinbiâ memenje akyenğire manbai.

20 Gârâmâ sinduk baniara bâleñande denyenje lokombiâ aregât heronje bo akñet. Himbimân manbaigât Anutunje kotyeñe kulemgoep aregât nânğâm heronje akñet.” dâep.



*Yesuŋe biwi heronje nângâep.*

21 Akto sop ain Anutugât Heakŋande memeneŋe aganŋo Yesuŋe biwiŋe heronje humo nângâm Anutu hin dâm maganŋep, “Apone, himbim haru hân ambonje gâŋe luâk bikŋe nângâ nângâyeŋaet nângâmbiâ humo akmap are âmâ gângât denge are mem heambukyengimat. Dâ nananŋ âmâ makmâ miawakyengimat. Aregât nâ mepaige mendân. Gâ hain miawagâkgât makmâ kârigien.

22 Ewene yâkŋe nâ meme akniŋdo aregât kotŋe siâ siâ akman. Akto Ewenaet keiŋe nângângât luâk âmbâle potatyekmâ biken biken makyengire arekŋe âmâ hainâk keiŋe nângâwai.

23-24 Hain dâm hoŋ bawalupŋe yoŋâk hin dâm makyengiep, “Den bunŋe makyengiwe. Ulikŋân Anutugât propete akto luâk kotdâ dondâŋe wan me wan unak yeŋe ekmâ mandâi hainâk ekberâm ukenŋe humo nângâm mali. Dâ âmâ bo egi. Akto den pat âlepŋe makyengire nângâi ire gai nângâwerâm ukenŋe humo nângâm mali. Dâ âmâ bo nângâyi. Aregât ye âmâ wan me wan ekmai aregât nângâm heronje humo akmai. Akto den pat âlepŋe makyengire nângâmai aregât heronje humo nângâm manmai.” dâep.

*Luâk siâŋe gasanŋe ekmâ benŋe gala aganŋep.*

25 Akto Mosegât den makmâ kepigi siâŋe Yesu dop komberâm den hin dâm aikoep, “Luâk humo, gain gain akmâ âmâ manman kârikŋaet pat aktere ârândânŋ akbiap?” dâep.

26 Hain dâmbo hin dâep, “Mosenŋe den gain gain kulengoep? Akto wan oyanmat?” dâmbo

27 hin magep, “Den kulengoep are hin tatâp, “Anutugâlâk nângâm denje lokom biwige yâkgâlân katmâ yâkgât wâtjân kinmâ manben.” Akto siâ hin tatâp, “Gâ gugaet akmat hainâk galagaet agañben.” hain tatâp.” dâep.

28 Dâmbo hin dâm magañep, “Âlepje den are lokom kinmâ manman kârikjaet pat akbiat.” dâep.

29 Hain dâmbo luâk arekne ikinje agak memenje are mem agatberâm akmâ kârikjaet kulâgâtmâ hin dâm magañep, “Gâ nijaet nângâmenâ gala aktâp?” dâmbo

30 Yesuje den ginje siâ hin dâm magañep, “Yuda luâk siâje Yerusalem kepia hepunmâ Yeriko kepi-angen arimbo gasalupjande tenjâ kinmâ kombiâ gilâmje gem yiep. Ge yendo hâk pekenje me puli me wan me wan meanmâ ariyi. Arimbiâ âmâ momberâm akmâ yiep.

31 Hain akmâ yendo Yuda gâtje sumbe kat kat luâk siâje dâp hainâk togom yendo egep. Dâ egep amâ hâkâj akmâ yân hanâk ewangiep.

32 Akto sumbe emetje aregât hon bawa siâ Lewigât kâmolân gâtje siâje âkâ hainâk togom yendo ekmâ enemjânâk bam tâjâk egep arekne benje biwine pâlâmje akto yânâk ewangim ariep.

33 Hain akto benje gasaje siâ Samaria hânân gâtje arekne togom âmâ egep.

34 Ekmâ okotje nângâm enemjânâk bam ekmâ âmâ gilâmje pulianmâ keluje mem pulim diwine are katip koañep. Hain akmâ donje kakjân mem kato âgâambo mem kepia siân arim luâk lombo togo yemai are yengât emet yenân kato tato gala agañmâ damunje agep.

35 Hain akto emet hauᅇdo ariwerâm âmâ emet aregât amboᅇe puli wanmâ hin maganᅇep, “Damunᅇe akmâ manmenâ puli giᅇdân ire bo akto âmâ siân lâuwâᅇe giᅇbian.” dâm arieᅇp.

36 Hain ageᅇp aregât aigugure makniᅇ. Gâᅇe nânᅇgâmenâ luâk âlâwu are yeᅇᅇgâlân gâtᅇe niᅇaet âmâ nânᅇgâmenâ âlepᅇe aktâᅇ?” dâep.

37 Hain aikombo hin dâep, “Han kalem aganᅇep luâk arekᅇe keiᅇe nânᅇgâm damunᅇe ageᅇp are.” dâep. Aregât Yesuᅇe hin maganᅇep, “Gâᅇe dop hainâk akyeᅇᅇiwen.” dâm maganᅇep.

### *Mata akto Maria.*

38 Akto Yesu Aposololupᅇe kepia siânᅇen arimbiâ âmbâle siâ kotᅇe Mata yâkᅇe Yesu kewugumbo emetᅇân âᅇâᅇiat.

39 Âᅇâmbela garinᅇe kotᅇe Maria, yâkᅇe âmâ Humogât enemᅇân bam tato maganᅇdo nânᅇgâm taleᅇ.

40 Den nânᅇgâm tato Mataᅇe ikiᅇak sot om âi mieᅇp aregât, “Garinande siâ bo tân nuguâᅇ.” dâm nânᅇgâm bâlianmâ hin dâep, “Humo, garinande yân tato nunagâk sot om tatân aregât nânᅇgâre bâliâᅇ. Maganᅇmenâ tân nuguâk.” dâmbo

41 Yesuᅇe hin dâm maganᅇep, “Mata, ᅇâ wan me wan yânᅇe aregât hanoko akmâ hâk hilâlâm kakᅇân kindât.

42 Garige âmâ nânᅇgât den nânᅇgâwerâm akto ârândân aktâᅇp aregât siânᅇe bo gulipkowiap.” dâep.

## 11

### *Anutu olop den akbaen aregât keiᅇe hin tatâᅇ.*

1 Yesuᅇe siânᅇen arimbo Anutu olop den agiat. Akmâ metembela âmâ hoᅇ bawa siânᅇe hin dâep,

“Humo, Yohanenê galalupnê Anutu olop den agi aregât keiñe makyenñiep aregât hainâk makneng-imenâ nânğâne.” dâyi.

<sup>2</sup> Hain dâmbiâ hin dâm makyenñiep, “Anutu maganberâm âmâ hin dâm maganbi. Ewenenñe kotge agat agatñe are hainâk âlepñe tatmâ âğâwiâp. Damun nenñe akmenâ wâtğân kinmâ mandenñe hânân humo aknengiwen.

<sup>3</sup> Akto hilâmñe hilâmñe sot dop nenñânâk ârândân nengiwen.

<sup>4</sup> Akto luâk siânbañe bâleñe aknengim aregât dosa memai are hepun yenğim malion dop hainâk dosanenñe kutigit nengiwen. Akto gâñe bo dop nenguwen.”

<sup>5</sup> Yesuñe hain dâm den ginñe siâ hin dâm makyenñiep, “Yenğâlân gâtñe siâñe hândâk tânâmñân arim galañe siâ hin dâm maganbiap,

<sup>6</sup> “O galane, makğindere nânğâ. Galane siâ dâp manmâ nânğâlân togombo sot bo akto wan wañberâm aregât sot siâ niñmenâ wañdere neâk dâm aregât gânğâlân togoân.” dâmbo

<sup>7</sup> galañe arekñe emelanâk tatmâ hin dâwiap, “Galane, gain akmâ hândâk timonñân togom nogondât? Emelâk emet hânğinñe gugure nan baratlupne asinj yendâi aregât agatmâ giñberângât dop âlepñe bo.”

<sup>8</sup> Aregât hin makyenğire nânğânjet. Galañande hain dâm emelanâk tatmâ gala bo aganbiap. Dâ kârıkñe akmâ hâwâtmâ ulilañdo aregât hanâk wañbiap.

<sup>9</sup> Aregât maktere nânğânjet. Yenñe hain are aregât undâgâtmâ manmaen dâm Anutu maganbiâ tân

yeŋgumap. Akto kulâgâtmâ manmaine mem miawakbai. Akto emet hânghiân “Woa” dâmbiâ wan me wan magañmai dop hainâk Anutuŋe wan me wangât makbiâ hainâk yeŋgimap.

<sup>10</sup> Aregât Anutu aikomapne den hâuŋe nânghâmap. Akto undâgâtmapne mem miawakmap. Emet hânghiân konmai yâkne wan me wan ulilaŋbiâ hainâk miawak yeŋgimap.

<sup>11</sup> Akto yeŋgâlân gâtne siâgât nannde sotgât ulilaŋdo kât waŋbiap mon? Akto yeŋgâlân gâtne siâgât nannde iŋangât ulilaŋdo niambi sâmbâ bo waŋbiap.

<sup>12</sup> Akto pui koaŋaet ulilaŋdo kendemuŋ are bo waŋbiap.

<sup>13</sup> Akto ye luâk bâleŋande nan baratlupyene damunyeŋe akmâ wan me wan âlepneâk akyeŋgimai hainâgâk Eweyeŋe Anutu himbimân mandâp arekne dopne are ewangim luâk siâne aikombo yâkgât nânghâm ikiye Heakne dowâk huŋgun aŋdo gewiap.” dâep.

*Yesuŋe Anutugât wâtŋân kinmâ sinduk baniara bâleŋe watyegep.*

<sup>14</sup> Akto sop siân sinduk baniara bâleŋande luâk siâ oloŋmâ hanne dâpne tigimbo den bo makmâ malep. Den bo makmâ mando Yesuŋe sinduk baniara are wato arimbo hanne pâroŋ âgâmba den agep. Den makto luâk âmbâleŋe ekmâ bâtyeŋe dâtyeŋân igim kili.

<sup>15</sup> Akto Parisaio luâk bikŋande hin dâyi, “Niambi kotne Besebulu sinduk baniara bâleŋe are yeŋgât humoyeŋe arekne meme agaŋdo sinduk baniara watâp.” dâyi.

16 Dâ luâk bikɲande âmâ hianmâ hin dâm ulilaɲi, “Makmenâ kulem siâ himbimânba miawakto ekmâ keige nânġâwaengât dopɲe agâk.” dâyi.

17 Hain dâmbiâ yekmâ nânġâm den ginɲe hin dâm makyenġiep, “Hân siâġât ambolupɲande potalakmâ agumbiâ âmâ kotyeɲe humo bo akbiap. Bo kârikɲe. Are hilip aguwai. Akto hainâk luâk âmbâleɲe hain akmâ nanaɲ lepatlupyenɲe hilip yenġumbiâ dâine kâmot are gulip akbop.

18 Dop hainâk Niambigât kâmotɲe potalakmâ galalupyenɲe watyekmai dâine Niambi âi kârikɲe bo ketuguwop. Aregât yeɲe âmâ nânġât hin dâi, “Besebuluɲe memenɲe agaɲdo sinduk baniara are watâp.” dâmbiâ ârândâɲ bo aktâp.

19 Hain dâmbiâ areġât yenġât hoɲ bawalupyenɲande sinduk baniara bâleɲe watyektâiân niɲaet wâtɲân kinmâ watyektâi? Yâkɲe âmâ keiyenɲe makmâ miawakbiâ âmâ yenġât den are nânġâm henġemgowi.

20 Nâɲe âmâ Anutugât wâtɲân kinmâ sinduk baniara bâleɲe are watyektânġât Anutuɲe damunyeɲe akmap areġât keiɲe uɲak yu ektâi.

21 Aregât den ginɲe siâ maktere nânġâɲet. Luâk kârikɲe siâɲe mâron goliakmâ tembe bisârâɲ me nandup me kândâm meakmâ ikiɲe kârikɲeɲaet nânġâmbo humo agep are mem âġâm emet kepianɲe damungom henġemgowiap âmâ yâġgât ito me wan me wan âlepɲe talaɲbiap.

22 Hain akto gasa kârikɲe dondâɲe togom bugâ mâron areġâlâk nânġâwiap are kom watmâ gulip kom areġât tembe bugâ kemunɲ puli me wan me wan dua baulupɲe are meanmâ arim galalupɲe oyaɲmâ yenġiwiap.

<sup>23</sup> Aregât luâk siâne gala bo akniņmapņe âmâ gasa akniņmap. Akto siâne âine ekmâ bo tân nugumapņe nugum pan nekbiapgât dop aktâp.

*Sinduk baniara bâleņande galalupņe mem kewuguyekto lâuwâņe purik katmai.*

<sup>24</sup> Sinduk baniara siâ walaņdo âmâ hân pumângen are luâk niņaet undâgâtmâ manbiap. Undâgâtmâ mando bo akto hin dâwiap, “Emelâk nâņgât luâk are agaņmâ hepulân aregâlân purik katmâ arim manbian.”

<sup>25</sup> Hain dâm purik katmâ arim emetnenņe pulim mem âlepņe ketugumaen dop hainâk luâk arekņe ekmâ hin dâwiap,

<sup>26</sup> “Sinduk baniara galalupne dondâ bâleņe are meyekmâ togom luâk are mem manmâ nâņgâwian.” dâm arim galalupņe nâmbulân lâuwâ bâleņe dondâ akmai are mem miawakyekto togom membiâ emelâk bâleņe agaņep are ewangim umatņe agaņbai.”

<sup>27</sup> Yesuņe hain dâm makyenģimbo kinbiâ hutyenânbâ âmbâle siâne hin dâm maganep, “Memegande menģekmâ nam giņep yâkgât nâņgâre âlepņe aktâp.” dâep.

<sup>28</sup> Hain dâmbo Yesuņe nâņgâm hin dâep, “Âlepņe maktât gârâmâ nâņe Anutugât den nâņgâm lokom manmai are yenģât nâņgâre âlepņe humo aktâp.” dâep.

*Kulem siâ miawakto ekberâm nâņgâyi aregât makyenģiep.*

<sup>29</sup> Luâk dondâņe Yesugâlân togom mem ândean gondean ketugum kinbiâ hin dâm makyenģiep,

“Kâmotyene bâlene, yene kulem siâ miawakto ekberâm makniņmâ manmâ gai are ektere bâliâp. Hain aktâi aregât hinneâk âmâ kulem siâ bo mem miawaktere ekbai. Aregât ulikņân âmâ Anutuņe luâk kotņe Yona aregâlân kulemgoep are uņak kulem dop hainâk mendere ekmâ nâņgâwai.

<sup>30</sup> Ulikņân âmâ Yonaņe kulem siâ agep are Niniwe kepia ambolupņande egi kulem hain are hâmbâi luâk akmâ gewiap dâmai are nâ yu ge mandân hâmbâi siâ bo nekbai.

<sup>31</sup> Akto âmbâle kotdâ siâņe ulikņân Salomo yâkgât nâņgâ nâņgâņe ekberâm kepia kâlewângenba togoep. Nâņgât nâņgâ nâņgâne irekņe Salomogât nâņgâ nâņgâņe are ewangiâp ina yene nâņgât den bo lokomai aregât sop humoân keiyene makmâ miawakbiâ ekbianân âmbâle kotdâ arekņe hutyenân agatmâ kinmâ biwiyenâet den dopyenân dâm keiyene makmâ miawakto dosa membai.

<sup>32</sup> Akto Yonaņe Niniwe kepiā arim kepia ambolupņe den kârikņe makyenġimbo hamep akmâ agak memeyene bâlene makmâ miawakmâ mali. Aregât hin maktere nâņgâņet. Nâņe âmâ Yona ewangiân ina yene nâņgât den bo nâņgâm lokomai. Aregât sop humoân Niniwe kepia ambolupņande agatmâ kinmâ yene nekamyenân tângom kinbiâ hârokņe hâuņe membai.” hain dêep.

### *Pagalenâet dop.*

<sup>33</sup> Akto Yesuņe den ginņe siâ hin dâm makyenġiep, “Luâk siâņe pagalene sagom gauņmâ umbâ kâlegen katmap dâine pagalene bo miawakbop. Gârâmâ tek tekņân kato âmâ emet



kâlegen ululunje arekne pagalembo ekmâ gem âgâmai.

<sup>34</sup> Hâkgaet pagalene amâ dewunge. Dewunge âlepne tato âmâ hâkge mem pagalewiap. Dâ dewunge bâlimbo hâkgande hândâk akbiap.

<sup>35</sup> Akto biwiyenân pagalene tatâp are bo akbopgât nângâm kinmâ biwi golâ manmâ âgâwi.

<sup>36</sup> Akto biwiyenande agak memeyene irakneâk akmâ pagalene olowâk tatbiawân hainâk wan me wan âlepne are tek tekñân ekbai. Pagalene mem tek tekñân katmai aregât dop hain tatâp.” dâep.

*Hiangi bo akmâ manbi.*

<sup>37</sup> Den are makyenjim mando Parisaio luâk siâne Yesu sot neâk dâm mem olojep. Mem olojdo emetñân âgâm bâteje bo pulim yânâk sot mem nemângen ge talep.

<sup>38</sup> Hain akto bâteje puliâkgât soj bo maganepgât Parisaione nângâmbo bo ârândân agep.

<sup>39</sup> Hain akto Humone hin dâm maganep, “Bâe, Parisaio ye hin aktâi. Yene âmâ kondo, umbâ tuân pulim hâkgâlâk nângâm manmai aregât biwiyene âmâ helen akmâ nasukne agep aregât bo nângâmai.

<sup>40</sup> Ye âmâ luâk ulikñân Anutune Adam ketugum hâk biwi nângâ nângâne olop kalep aregât Anutune hâkgât akto biwigât lâuwâ lâuwâ nângâm manmap. Gârâmâ ye âmâ hâkgâlâk nângâm manmai.

<sup>41</sup> Akto aregât hin makyengiwe. Biwiyene damunje akmâ Anutugât den nângâm hengemgom lokowai âmâ ârândân akto Anutune yekmâ âlepne dâwiap.

42 Bâe, Parisaio ye wan me wan usak lombo me hemi me kârik hainare amâ Humogât pat dâm kat-mai. Hain akmâ siâ me siâ Anutuņe ekto ârândân akmap me Anutugât han kalemņe are bo lokomai. Gârâmâ wan me wan umatņe me owâiņe lâuwâ lâuwâ akmâ manbiâ âmâ ârândân akbiap. Hain akmâ manmai dâine ârândân akbop.

43 Bâe, Parisaio yeâmâ den emetņân âgâm luâk kembu yeņgât tat talân tatberâm aregâlâk nâņgâmai. Akto dâwân luâk âmbâleņe yekmâ nâņgâ yeņgimbiâ humo agâkgât bam gane dâm aregâlâk biwiyeņe humo yemap.

44 Bâe, Parisaio yeņgât dop siâ hin. Luâk siâ mondo yoņâk lokom hangombiâ hambuep dop hain. Akto luâk âmbâleņe kakņân bam gutmâ aregât bo nâņgâmai. Ye dop hain akmâ manmai.”  
dâep.

*Yesuņe den hain makmâ Mosegât den kârikņe makmâ kepigep siâ sârekoep.*

45 Yesuņe hain dâmbo Mosegât den kârikņe makmâ kepigi areyeņgât hutyeņân gâtņe siâņe hin dâm magañep, “Luâk humo, hain dâm makyeņgim nen olowâk hâkâņ nenekmenâ nâņgâenņe bâliâp.”  
dâmbo

46 hin dâm magañep, “Bâe, Mosegât den kârikņe makmâ makyeņgimai yeņe den siâ siâ umatņe are luâk kakyeņân katbiâ lokombiâ yeņe âmâ bo tânyeņgum âmâ owâiņân manmai aregât aņun bo aņgimai.

47 Bâe, ulikņân bâgilupnenņande Anutugât den makmâ miawagi are yeņgum mem siâ siâ ketugu yekbiâ mombiâ are yeņgât sum kakņân siâ siâ

buluņe mem togom katmâ mem âlepņe ketugu yekbiâ kepia sombeim hain are miawagep.

48 Hain akmâ âmâ bâgilupnennande yengâlân lâuwâņe bugâ yeņaet nâņgâmbiâ âlepņe agep.

49 Aregât Anutugât nâņgâ nâņgâņe humo arekņe den hin dâep, “Hoņ bawalupne propetelupne akto aposololupne âi makmâ yeņgim huņgun yeņgire yengâlân togom makmâ miawakbiâ yeņgum hâk hilâlâm siâ siâ ketugu yekbiâ bikņe mombai.” Anutuņe hain dâep.

50 Akto aregât ulikņân Anutuņe keiņe katmâ luâk âmbâle ketugu yekto mali sop ain Anutugât hoņ bawalupņe hilip yeņgum gayi are yengât nâņgâmbiâ âlepņe akmap aregât yeņe hainâk akmâ dosa hainâk membriâ Anutuņe yekâ hainâk akyeņgiep.

51 Ulikņân hakulupnennande bugâņe luâk kotņe Abe kom ainba keiņe katmâ yeņgum gam gam bâiņe Sakaria sumbe emetņaet hâņgi akto alatagât keiņe aregât hutņânba gam ariwerâm akto ain kombiâ moep. Aregât hin makyeņgire nâņgâņet. Yu mandâi irekņe Anutugât luâk âi membriâ ârândâņ agep are hilipyeņgumbiâ moyi aregât hâuņe amâ yengâlân miawakbiap.

52 Bâe, Mosegât den kârikņe makyeņgimai yeņe luâk âmbâle arekņe Anutugât keiņe nâņgâm denņe lokoyi aregât dâp tigi yeņgim gamai. Tigi yeņgimbiâ bikņande ariwerâmbiâ dâp katyeņgim âmâ yeņeak âmâ hâkâņ akmâ dâp ainba bo arimai.” Hain dâm makyeņgiep.

53 Akto kepia are hepunmâ siâņgen ariwerâmbo Mosegât den kârikņe makmâ kepigi arekņe akto

Parisaio yengât biwiyenê kâlâp akto den kaknân hogo anberâm agi.

<sup>54</sup> Hain akmâ Yesunê den hilipkom dosa meâk aregât lâmgom kinmâ mali.

## 12

*Tik tiknân tatâp siân tek tekñân miawakbiap.*

<sup>1</sup> Akto luâk âmbâle dondâne togom pikmâ kondan agum kinmâ keiyenande tâliagi. Hain akmâ kinbiâ hon bawalupne are hin dâm makyengiep, “Ye Parisaio yengât kalak arekne yengâlân hâtikowopgât ekmâk manbi. Nâ Parisaionê biwi hiangi akmâ manmâ keiyenê bo nângâmai aregât maktân.

<sup>2</sup> Wan me wan munen akmai are hainâk bo tatbiap are siân tek tekñân miawakbiap. Akto wan me wan siâ tik tiknân tatmap are hainâk bo tatbiap, are siân mem miawakbai.

<sup>3</sup> Ye hândâknân heambukmâ kinmâ den dâmai are siân dewutâ humoân âmâ ekmâ nângâm hârogâk ekmâ mem miawakbai. Akto den yonâk makmai are siân sombeimân kinmâ makmâ miawakbiâ nângâm metewai.” dêep.

*Anutuñe oyan nenektâp.*

<sup>4</sup> Akto Yesunê den siâ hin dâm makyengiep, “Galalupne ire maktere nângânet. Luâk siâne hâkyenê yengum benne aregât kaknân lâuwâne bâlene siâ akyengiwaigât kârikne bo tatyengiâp aregât hamep bo akbi.

<sup>5</sup> Akto hamep aknetgât makyengire nângânet. Yengum metem âmâ haminân kâlâp kârikñân pa-nyekto manbai yâkgât hamep aknet. Gârâmâ

yâkgât konok âmâ nângâm hamep akñet dâm aregât makyenjiân.

<sup>6</sup> Lâut siâ kotñe sâmbâlilik are âmâ lâut yânñe dâm aregât puli gegenande puligomaen. Hain gârâmâ Anutuñe sâmbâlilik are yenğât hârogâk nângâmbo tatâp.

<sup>7</sup> Dâ Anutuñe yenğât kautyenñe dumutñe oyanmâ metemap. Aregât hamep bâlâk manbi. Ye sâmbâlilik bo. Ye luâk.

*Yesugât nângâm anjun anjiwaengât dop bo tatâp.*

<sup>8</sup> Akto siâ maktere nângâñet. Luâk siânñe biwiñe nângâlân katmâ luâk âmbâle hutyenñan agatmâ, “Biwine Yesugâlân katere kindâp.” hain dâm makyenjiwiap yâkgât akmâ luâk akmâ geân nâ hainâk Anutuñe huñgun niñdo gewianân âmâ Anutugât anjelolupñe makyenjiñe bunñe membai.

<sup>9</sup> Dâ luâk siânñe, “Yesu are bo nângandân.” dâm makyenjiwiap yâk hainâk nâ Anutuñe huñgun niñdo geân aregât Anutugât anjelolupñe yenğât dewunyenñan kinmâ, “Luâk are bo nângandân.” dâwian.

<sup>10</sup> Akto luâk siânñe nâ luâk akmâ geân bâleñe akniñmâ mem ge katnekmâ âmâ dosa membiap are Anutuñe dosa hepun anjiapğât dopñe tatâp. Dâ luâk siânñe Anutugât Heakñe are mem ge katmâ âmâ dosa membiap are Anutuñe hepun anjiapğât dopñe bo tatâp. Borondâ.

<sup>11</sup> Akto siâ maktere nângâñet. Denân kat yekberâm meyekmâ den emetñaet damunñe yenğâlân me kiap yenğâlân meyekmâ ariwaiân âmâ, “Den hâuñe gain gain dâwaen.” dâm nângâmâk bo akbi.

12 Sop ain den akbai are Anutugât Heaknande den dâpne meyenjim makyenjimbo âlepne dâwai.” hain dâep.

*Hângât wan me wan aregât egâlian bo akbaen.*

13 Akto kinbiâ hutyenânba luâk siâne agatmâ hin dâm Yesu maganep, “Luâk Humo, maktere nângâ. Ewenetne mondo teunande ito sikum ikinêak mem mandâp. Mem mandâp aregât maganmenâ bikne potatmâ ninâk.” dâmbo

14 hin dâm maganep, “Luâk kotdâ siâne nâ yengât damunyeje dâm bo kat negep aregât gâ wangât nângâlân aregât maktât?” dâep.

15 Hain maganmâ purik katmâ kâmot kili are yekmâ hin dâm makyenjiep, “Sikum me kalam humo are biwiyenjet bo. Are âmâ hâk yenaelâk. Haingât galalupyenande hainare mem manmai are yekmâ aregât ukenne nângâmbiâ biwiyene bâlimap are boagakne.”

16 Hain dâm den ginne hin dâm makyenjiep, “Luâk kotdâ siâne sot kâmeto bunne dondâ mi-awakmâ unsambe agep.

17 Akto biwinande hin nângâep, “Gain gain akbe? Sot dondâ ire mem emet gain hinan katbe?

18 Nâ hin akbe. Nâne sot emetne bâlensiâ are patakum humoâk ketugum âmâ katere tatbiâp.

19 Tato unsambe humo yenindâpgât tatmâ nângâm sop kâlep aregât sot tu nem ukenne nângâm herone marone manmâ âgâwian.” hain nângâmbo

20 Anutune hin dâm maganep, “Gâ kopa. Emet dâgâmbo momberât. Momenâ âmâ wan me wan

siâ siâ are katmâ mem konok ketuguen are luâk niñande membiap?” dâep.

<sup>21</sup> Den ginje are keiñe hin dâm makyenpire nângâñet. Siâ yâk Anutugâlân han unsambe bo yeañdo âmâ ikinjaet pat dâtâñe sot sikum mem oloñmâ mem manbiap dopñe hainâk hâmbâi miawagañbiap.” dâep.

*Anutuñe damun nenñe akmap aregât ongânenñe bo hogowiap.*

<sup>22</sup> Akto Yesuñe aposololupñe hin dâm makyenpiep, “Aregât maktere nângâñet. Manmanyenjaet hanokoak bo akbi. Akto hin bo dâwi, “Wan nem manbaen?” Akto hâkyenjaet nângâmâk bo akmâ hin bo dâwi, “Wan mem luguakmâ manbaen?”

<sup>23</sup> Sotñe amâ bunñe bo. Manmanyenñande amâ bunñe. Akto sâñgunñe amâ bunñe bo. Hâkyenñande amâ bunñe.

<sup>24</sup> Ye lâut are yekñet. Are âmâ âi bo ketugumai, akto kalam yenânba sot wan bo mem mendugumai. Akto kâmbum bo ketugum alekñe katmai. Hain bo akmai aregât Anutuñe irawotñân sot mem miawak yenpiep. Ye lâut hainare bo. Lâut amâ gegeñe. Dâ ye amâ âgâ âgâñe aregât nângâm henngemom âmâ bo hanokoakmâ manbi.

<sup>25</sup> Akto yenğâlân gâtñe siâñe ikinje nângâ nângâ watmâ manman kâlep manbiapgât dop bo tatâp.

<sup>26</sup> Arekñe wan me wan yânñe hain are akmâ ewum pâpkomai aregât wan me wan umatñe aregât nângâm hanokoakbiâ ârândânñe bo akmap.

27 Akto aregât siâ makbe. Dem dem surandem are ekjet. Sângum lâuwâ lâuwâ yejaet âi bo ketugumai. Akto Salomo yâkne sângum kulem melem âlepne dondâ mem malep arekne tâk bulune are bo ewangiâp.

28 Akto pâlonângen siâ me siâ bulune yeukne unak hainare miawaktâp dâ hole hainare bererek âgâm gembo ombiâ omap amâ Anutu ne hanâk makto kulemne âlepne miawakmap. Aregât yengât sângum wan me wan mem miawakmâ yengiwai aregât nângâ nângâ yeukne bo nângâm hengemgowi.

29 Akto wan me wan nembaen me tugât gain gain membaen dâm aregât bo hanokoakbi.

30 Are âmâ luâk âmbâle hânne hânne manmâ Anutu bo nânganmai yâkne hanoko akmâ kulâgâtmâ manmai. Dâ ye siâ me siâ are bâlâk âlepne bo manbai are Eweyenande nângâmap.

31 Dâ ye âmâ, “Anutu ne damun nenne akberâm aktâp.” hain nângâm denne lokombiâ âmâ damunne akmâ wan me wan are yengiwai.

32 Aregât nângâm biwiyenân katmâ hamep bo akmâ manbi. Eweyene Anutu ne yengât nângâmbo herone akto, “Nângâlân gambiâ olowâk manbaen.” dâm makyengiwai.

33 Aregât kotne siâ siâ tat yengiâp are mem arim yengimbiâ yâkne puli yengimbiâ mem arim luâk umburuk manmai are yengiwai. Hain akbiâ himbimân katyengiep are bo gulip akyengiwai. Akto himbimân are luâk kâmburâne bo meyengiwai me saŋ saŋ siâne bo nem hilipko yengiwai. Hain akbiâ are kârikneâk tat yengiwiâp.



34 Egâlian yeŋe yembiap hainâgâk hanyeŋe yembiâp.

*Biwi golâk manbaen.*

35-36 Hoŋ bawalupyenande luâk humoyeŋe siâŋe âmbâi mendo aregât sot om taliânba purik katmâ togom emet kâlegen gambo, “Woa” dâm den hogo anberâm hânghiân lâmgom tatmai dop hainare akmâ biwi golâk tatmâ manbi. Tatmâ manmâ, “Humonenŋe amuten purik katmâ togowiap.” dâm biwiyenæet damun kârikŋe akbi.

37 Luâk kotdâŋe hoŋ bawalupŋe biwiyenŋe golâ akto tatbiâ âmâ purik katmâ togom mem miawak yekmâ âmâ nânghâ yeŋgimbo âlepŋe akbiap. Hain akmâ biwi hero nânghâm itoŋe lândem katmâ sot om oyanmâ yeŋgim neŋet dâm yeŋgiwiap.

38 Akto hândâk timoŋân yendo hoŋ bawalupŋe biwi golâ tatmâ damungombiâ purik katmâ gam mem miawakyekmâ biwi hero humo nânghâ yeŋgiwiap. Hain nânghâm heronŋe akŋet dâm nânghâ yeŋgiwiap.

39 Akto siâ maktere nânghâŋet. Kepia ambolupŋande gasalupyenŋe hândâkŋân togowai sop are nânghâm dâine âmâ biwi golâ tatmâ kepiayenŋe damungombiâ âmâ bo bâliyenŋiwop.

40 Aregât nâ luâk akmâ geân nâmâ hâmbâi lâuwâŋe purik katmâ gewian aregât sopŋe bonânghâmai. Aregât yeâmâ biwi golâk damun nugum manbi.” dæep.

*Hoŋ bawa âlepŋe bâleŋe yeŋgât keiyenŋe.*

41 Yesuŋe den ginŋe hain dâmbo Petoroŋe aikom hin maganep, “Humo, den ginŋe are Aposolo

nengâlâk maktât me luâk hârok nengât maktât?”  
dâmbô

<sup>42</sup> hin makyenġiep, “Den umatġe siâ maktere nângâġet. Luâk kotdâ siâġe hoġ bawalupġe yengât damun siâ katmâ hin dâm maganġbiap, “Arim mandere gâġe damunyeġe akmâ sowânâk sot me soġo are dop yenânâk yengim manben.”

<sup>43</sup> Hain dâm hepunyekmâ arimbo damunyeġe arekġe âi aregât biwiġande mem heġgemgom mando humoġande purik katmâ togom ekmâ okot âlep nângâ anġbiap.

<sup>44</sup> Aregât den bunġe hin makyenġiwe. Hângât sikum siâ siâ are hârok damungowen dâm maganġbiap.

<sup>45</sup> Dâ humoyenġande damunyeġe akmâ manben dâm arimbo âmâ damunyenġande biwiġande hin nângâwiap, “Kotdânande hepun nekmâ arim sop kâlep mandâp imâ dowâk bo togowiap.” nângâm âmâ damunyeġe akmâ âmâ gala bo akyenġim tu kârikġe nem biwi gulip akto

<sup>46</sup> humoġande dowâk sân sânâk bo nângâwiap ain togom ekmâ aregât hâuġe wanġmâ mem kom gâimbo itik matik akto den bo lokomai ain hâkokombo hememgât pat akbiap.

<sup>47</sup> Akto aregât siâ makbe. Hoġ bawa arekġe den are nângâm heġgemgom âmâ bo lokomaiġe aregât hâuġe umatġe membai.

<sup>48</sup> Dâ hoġ bawa siâġe âmâ humoġaet den pâpkom âmâ âi mem hilipkomap amâ bugâġe owâiġe igi-wiap. Hain aregât den dâtġe âmâ hin. Luâk siâġe umatġe are wanġdere memapġe âi ketugum manmâ bunġe umatġeâk mem miawakto âmâ ârândânġ akbiap. Dâ luâk siâ âi humo makmâ

wandere memapne aregât hâuñe bunñe umatñe dondâ bo mem miawakto âmâ are ârândân bo akbiap.

*Yesuñe gembo potalakmâ manden aregât den.*

<sup>49</sup> Kâlâp pundun panmâ longaim siângen arim om metemap dop hainâk agak meme bâleñe akbiâ aregât hâuñe yenñiwian aregâlâk nânğan. Are emelâk miawakto dâine heronñe akbom.

<sup>50</sup> Akto hâk hilâlâm nânğare aregât kakñân nânğât den pat âlepñande miawakmâ ariwiap. Aregât hâk hilâlâm are miawakto bo akbiap aregât biwine umatñe aktâp.

<sup>51</sup> Akto maktere nânğârjet. Nânğât âmâ hin bo dâwi, “Gala konok manñet dâm aregât maktâp.” Hain bo. Nâ geân aregât hionakmâ me potalakmâ kâmot lâuwâ akmâ mandâi. Akto hainâk akmâ manbai.

<sup>52</sup> Emet siâ aregât kâlegen luâk âmbâle nan baratlupyetñe momerâk manmaine potalakmâ kâmot lâuwâ akbai. Biken lâuwâ biken âlâwu hain potalakbai.

<sup>53</sup> Akto eweñe nanñâi arekñe potalakmâ yetñe gasa aganñiwandât. Akto memene baratñâi âkâ hainâk potalakmâ yetñe gasa aganñiwandât. Akto erânñe erânñe arekâ hainâk potalakmâ gasa aganñiwandât. Amâ hainâk nâ geân aregât gasa aganñiwai.” dâep.

*Sop humoân Yesu gewiap aregât keiñe.*

<sup>54</sup> Yesuñe luâk âmbâle kâmot humo are hin dâm makyenñiep, “Hamandat dâgâambo âmâ ye hin dâmai, “Woe, tânâk hologowerâm aktâp.” hain dâmbiâ hainâk akmap.

<sup>55</sup> Akto hamandat tokberâmbô âmâ ye hin dâmai, “Emelâk dewutâ komberâp.” dâmbiâ hainâk akmap.

<sup>56</sup> Ye hiangi luâk. Yeñe hamandat kulewoñwoñ aregât keñe nângâmai. Dâ sop iregât keñe wangât bo nângâm henjengomai?

<sup>57</sup> Aregât gain gaingât âmâ hanyenjeâk akmâ dâp âlepñe bâleñe are bo ekmâ nângâmai?

<sup>58</sup> Gasagande menjekmâ kiapgâlân arim denân kat gekmâ dâm hâre giñdo tembe lokolupñande menjekmâ kala busiân kat gekbâi aregât dâwân arim galage makmâ miawaganmenâ yetñeâk dâm gala agañgiwiandat.

<sup>59</sup> Borâm hâre añgiwiandat akto âmâ kala busiân kat gekbiâ tatmâ âmâ yân bo gewiat. Hâu hârok puligom kutigitbialân âlepñe ain gewiat.” dâep.

## 13

*Agak memenenñe bâleñe are hepunmâ Anutugât den lokom mandenñe damun nenñe akbiap.*

<sup>1</sup> Sop ain luâk bikñande Yesugâlân togom den pat hin magañi, “Pilatonje dâmbô tembe lokolupñande Galilaia hânân gâtñande lama akto makao kom gâim Anutugât sumbe higenñe oyi yâk yengumbiâ gilâmyeñe gembo makao gilâmyeñe olop mendugum katmâ oyi.” dâyi.

<sup>2</sup> Hain dâm magañbiâ hin dâm makyengiep, “Pilatonje dâmbô yenguyi areyengât gain dâmai? Moyi yengât dosa bâleñe arekñe âmâ Galilaia siânba yengât dosa are ewangiâp dâmai me?

<sup>3</sup> Hain bo. Akto yengât dosa keiņe aregât agak memeyeņe bâleņe dondâ bo hepunmâ âmâ Anutugât den bo nâņgâ anmai are hâuņe yenġiwiap ain hainâk ye yenġiwiap. Akto aregâlâk siâ makbe.

<sup>4</sup> Yerusalem luâk 18 kinbiâ Siloam kepiagât emet kâkâlep arekņe kâwulakmâ tigiyegep are yengât hin bo dâwi, “Dosayeņe bâleņe âmâ Yerusalem kepia ambolupņande angâ yengât dosa ewangiâp aregât moyi.”

<sup>5</sup> Hain bo dâwi. Aregât maktere nâņgâņet. Yengât dosa tatâp aregât agak memeyeņe bâleņe are bo hepunmai, biwiyeņe Anutugâlân bo katmai akto âmâ yekâ hainâk hilip aguwai.” dâep.

<sup>6</sup> Den aregât dop siâ makyenġiwerâm aregât hin makyenġiep, “Luâk siâņe lowot siâ kâmeto humo agep. Akto amboņande koaņe hârewerâm akmâ arim ekto koaņe siâ bo yiep.

<sup>7</sup> Hain akto aregât kalam damunņe hin maganep, “Nâ lâwin iregât bunņæet kulâgâtâmâ lâmgom mandere hombaņ âlâwu aktâp lâwin ire wangât yân kinbiap? Kârâmenâ geâk.” dâep.

<sup>8</sup> Hain dâambo yâkņe hin dâep, “Luâk humo, hanâk hepunmenâ hombaņ irekâ kilâk. Hâmbâi nâņe keiņân ire une lokom togo katere hambumbo âmâ bunņe siâ yembiap me bo are ekbaet.

<sup>9</sup> Sop siân bunņe miawakbiap amâ âlepņe. Dâ arekâ hainâk bo akto âmâ makmenâ kârâm panbaen.” hain dâep.”

*Sarereân Yesuņe dâambo âmbâle hamiņe hagitņe gonġon aguep arekņe tâņâk kilep.*

<sup>10</sup> Yesu Sarere âi bo meme sopņe siân den emetņân âgâm den potatmâ makyenġiep.

11 Den makyenjimbo âmbâle siâ ain talep. Are âmâ sinduk baniara bâlenande memene aganjmâ hamiņe hagitņe mem goņ goņgombo kâņgomâk manmâ gambo hombaņ 18 bo agep.

12 Akto Yesuņe âmbâle are ekmâ hin dâm magaņep, “Meņ, hinņe âmâ kundat bo akgiņdo âlepņe ak.” dâep.

13 Hain dâm bâtņande mendo hamiņe miwindik akto tâņâk kinmâ Anutuņe okot âlep akniņdâp dâm heroņe agep.

14 Hain akto Yesuņe âi meme sopņe boân heņgemgoep aregât den emetņæet damunņe nâņgâmbô bâlimbo luâk âmbâle hin dâm makyenģiep, “Âi ketugu ketugu sopņe tatâp ain togombiâ âmâ heņgem yeņguwiap. Dâ uņak Sarereân heņgem yeņguâp ire amâ bo agakņe.” dâep.

15 Hain dâmbo Yesuņe aregât den hâuņe hin magep, “Bâe, hiaņgi luâk. Ye Sarere âi meme sopņe boân yeņe doņgi me bulimakao pekeyeņe hindâm meyekmâ arim tu yeņgimaigât dâp tatâp.

16 Dâ âmbâle hamiņe tâņâk bo ire âmâ Abrahamgât hakuņe siâ Niambi arekņe memene agando kopa akmâ manmâ gambo hombaņ 18 bo agep. Haingât Sarereân mem heņgemgore ârândâņ aktâp.” dâep.

17 Hain dâmbo gasa agañi arekņe aņun aņgiyi. Akto luâk âmbâle kâmot humo arekņe kulem âlepņe miep are egi aregât heroņe agi.

*Anutugât den lokomaen nengât keinenņe.*

18 Yesuņe den siâ lâuwâņe hin dâep, “Anutugât kâmot manmai are yengât dop wanân katmâ mak-tere ârândâņ akberâp?”

19 Aregât hin dâwe. Kapok koaņe âmâ bâleņ siâ gârâmâ luâk siâņe mem arim âi kâlegen kâmeto kâmņe gam miawakmâ lâwin humo akmâ kinmap. Akto lâutņe togom aregât bât bânņân panmâ tatmai.

20 Akto siâ makbe. Anutugât kâmot manmai areyengât wanân dop katbe?

21 Are âmâ matuk keluņe hain are âmbâle siâņe matuk keluņe are mem pipikom ondo sot hârok ukenņe akmap dop hain are.” dâep.

*Himbimgât dâp are gâwikņe.*

22 Akto Yesuņe Yerusalem kepiã purik katberâm arim kepiã kepiã den potatmâ yengim malep.

23 Hain akto luâk siâņe aikoep, “Anutuņe luâk amon bâleņânba mem olonyekto âlepņân gamai? Amon siâ mon?” dâep.

24 Hain dâmbo hin dâep, “Himbimân âgâwerâm âmâ dâp gâwikņân hâk hilâlâm nâņgâm ariwai. Akto luâk âmâle dondâ ain ariwerâm âmâ hâk hilâlâm humo nâņgâm ewum hâumgowai.

25 Emet amboņe akmâ manmâ dawalauņe tigimbo luâk âmâle dondâņe âgâwerâm ewum hâumgom betgen kinmâ hin dâwai, “Humo, hâņgi mem katnengi.” dâmbiâ hin dâwiã, “Ye wânân gâtņe?”

26 Hain dâm aiyengumbo aregât hin dâm ma- gaņbai, “Nen âmâ gâ olop kondo konogân sot neyion. Akto kepiã nenņân manmâ den potatmâ

nengimenâ nângâyion aregât hânġi mem kat-nengi.”

<sup>27</sup> Hain dâmbiâ hin dâm makyenġiwiap, “Ye wânân gâtġe? Nâ bo nângâ yenġiân. Ye bâleġe meme aregât arinġet.” hain dâm wat yekbiap.

<sup>28</sup> Hâmbâi ye Anutuġe wat yekto purik katberâm kinmâ hamiyenġangen Abraham akto Isaka akto Yakobo akto Anutugât den makmâ miawakmâ gayi are hârogâk Anutugât kâmolân purik katmâ mandâi are yekmâ biwiyenġe bâlimbo kuk nângâm han kalak akmâ manbai hain.

<sup>29</sup> Sop ain dewutâ gaganġangenba akto gegenġangenba akto bikenba bikenba areâk gam menduguakmâ sot nem heronġe akbiâ Anutuġe damunyenġe akbiap.

<sup>30</sup> Nângâi. Yenġâlân gâtġe siânġe, “Nâ luâk humo.” dâm ikinġe kotġe mem agatbiap are âmâ hami to-gowiap. Dâ siânġe, “Nâ luâk gegenġe.” dâm manbiap are âmâ Anutuġe mem âgâm ulik gulik katbiap.” dâep.

### *Herotegât den.*

<sup>31</sup> Sop ainâk Parisaio luâk bikġande togom hin dâm maganġi, “Herotenġe guguwerâm aktâp aregât hân ire hepunmâ siângen ari.” dâmbiâ

<sup>32</sup> hin dâep, “Nângâi. Sinduk baniara bâleġe watyekmâ mandân. Akto luâk kundatdâ areyenġât maktere bo akyenġiâp. Âine ketugum mandere hilâm âlâwu bo akto ârândânġ akbiap. Aregât ye arim dua metġe Herote are nânġe wan me wan aktân mendân iregât den pat maganġi.

<sup>33</sup> Akto ire maktere nângânġet. Yerusalem kepia ambolupġande Anutugât den makmâ miawagi are



Yerusalem kepia yengumbiâ moyi aregât nâkâ kepia siân mombomgât Yerusalem kepia arire hilâm âlâwu akto ewangiwan.

<sup>34</sup> Yerusalem kepia ambolupņe, yeņe Anutugât den makmâ miawagi are bugâņe yengumai. Akto Anutuņe hoņ bawalupņe huņgun yengimbo yengâlân togombiâ kâtņe mem yengumai. Puiņe nanaņlupņe damunyeņe akmâ mem mendugu yekmâ korat yengumap dop hainâk mendugu yekmâ okotnân katyekmâ damunyeņe akberâre hâkâņne akmâ arimai.

<sup>35</sup> Aregât Anutuņe damunyeņe bo akmap aregât kepiayeņe hepundo bugâ yembiap. Hain gârâmâ siâ hin maktere nâņgâņet. Hâmene bo nekmâ âgâwai aregât hilâm siân miawaktere nekmâ âmâ hin dâwai, “Anutu Humoņe wâtņe giņmâ huņgun giņdo togoât aregât heroņe akgiņne” hain dâwai.” dâep.

## 14

*Sarereân Yesuņe dâambo luâk keiņe diwirâ siâ âlepņe agep.*

<sup>1</sup> Sarere siân Parisaio are yengât damun kautņande sot nemberâm Yesu kewugumbo emetņân âgâyat. Âgâmbela luâk bikņande yelekmâ Yesuņe akmâ hilipkombo eknerâm aregât damun kili.

<sup>2</sup> Damun kinbiâ luâk siâņe hâkņânba diwi metņe humo miawaganep arekņe Yesu ekberâm âgâep.

<sup>3</sup> Âgâambo Yesuņe ekmâ Mosegât den kârikņe makmâ kepigi are akto Parisaio hin dâm makyenģiep, “Mosegât den kârikņe are gain gain

tatâp? Âi bo meme sopnân luâk âmbâle hen gem yen guwangât dopne tatâp me bo? Makniñbiâ nân gâwe.” dâep.

<sup>4</sup> Hain dâambo den hâuñe bo magañi. Hain akmâ anjun an gim kinbiâ makto diwi metne are bo agañdo huñgunañdo ariep.

<sup>5</sup> Arimbo emelan tali are hin makyen giep, “Lamayeñe me bulimakao yeñe siâ ai bo meme sopnân lâmân gembo âmâ aregât undâgâtmâ mem miawakmâ hikom oloñmâ gamai me bo?” dâep.

<sup>6</sup> Hain dâm makyen gimbo hâuñe bo magañmâ hanyen eâk anjun an gim tali.

### *Hâknene bo mem agatbaen.*

<sup>7</sup> Akto sop ain luâk bikne togom emet ain gam âgâyi arekne yeñe hanyenân âgâ kau dewunnân tatberâm akbiâ yekmâ aregât hin dâm makyen giep,

<sup>8</sup> “Luâk siâne âmbâle membiapgât sot humo omberâm oloñ gekto arim âmâ gâne hangeâk âgâ kau dewunnân bo tatben.

<sup>9</sup> Dâ gâne hain akbiat âmâ luâk oloñ gekbiap arekne hin dâm makñbiap, “Ire gângât welam bo. Ekemenâ âkâ luâk irekne talâk.” Hain dâm makñdo anjun an gim hami hami gem arim tungunângen tatbiat.

<sup>10</sup> Hain gârâmâ gâ hin akben. Luâk tatbiâ ain âmâ gugaet nân gâmenâ gembo tatmenâ emet amboñande gekmâ hin dâm makñbiap, “Galane tungunângen tatât un gure gam âgâ dakegen tat.” dâm makñdo âmâ ain tatbai arekne gekmâ okot âlep akbai.

<sup>11</sup> Aregât keiņe hin. Luâk siâņe ikiņe kotņe mem agatbiap are âmâ hâmbâi Anutuņe mem ge katbiap. Dâ luâk siâņe ikiņe kotņe bo mem agatbiap are âmâ hâmbâi Anutuņe mem agatbiap.” dâep.

<sup>12</sup> Hain dâm makyenġim benņe luâk oloņep are hin dâm maganep, “Sot omberâm âmâ emi teulupge me nan baratlupge me ginbailupge me luâk puli me ito sikumyeņe olowâk mandâi are bo oloņ yekben. Dâ hain akbiat âmâ hâmbâi yâkâ aregât hainâk hâuņe mem oloņ gekbiâ aregât dosa bo akbiap.

<sup>13</sup> Aregât hain bo akben. Sot omberâm âmâ kopa me umburuk me dewunyeņe bok bokņe me keiņe bâleņe hain are oloņ yekben.

<sup>14</sup> Hain are oloņ yekmâ hâu bo ġinġbaigât heroņe maroņe kakņân sot om yeņġimenâ nembai. Gârâmâ hâmbâi sop humoân agatbaiân Anutu ikiņak hâuņe ġinġbiap aregât nâņġâm biwige heroņe agâk.” dâep.

*Sot humo oyi aregât den umatņe.*

<sup>15</sup> Hain dâmbo sot nem tali are hut yeņânba siâņe den are nâņġâm hin dâep, “Anutugât kâmot manden aregât sop humoân Anutu olowâk sot nembraen aregât nâņġare heroņe aktâp.” dâep.

<sup>16</sup> Hain dâmbo Yesuņe den ġinņe siâ hin dâm maganep, “Luâk humo siâņe sot ombian dâmbo aregât sot mem mendugumbiâ kindo luâk dondâ yeņġât sop kalep.

<sup>17</sup> Akto arim arim emelâk sop are miawakto sot om katbiâ ekto ârândâņ akto hoņ bawa siâ huņgun aņdo arim âmâ hin dâm makyenġiep, “Sot hârok om

katmâ lâm yenġuengât toġoġet.” dâm makyenġimbo hâkânġ agi.

<sup>18</sup> Hâkânġ akmâ luâkne luâkne hârok hin dâyi, “Hân puligoân arekne oloġ nektâpġât are ekberâm ariwerân areġât luâk humoge are maganġmenâ nânġâmbo bo bâliwiâp.”

<sup>19</sup> Akto siânġe hin dâep, “Bulimakaolupne 10 puligoân are meyekmâ togowerânġât luâk humoge are maganġmenâ nânġât nânġâmbo bo bâliwiâp.”

<sup>20</sup> Siânġe hin dâep, “Hinġeâk âmbâle meânġât bo togowerân. Gain gain akmâ togowerân?” hain dâep.

<sup>21</sup> Akto hoġ bawa arekne purik katmâ arim luâk humoġe den dâyi are maganġdo nânġâmbo bâliep. Nânġâmbo bâlimbo hoġ bawa are hin dâm maganġep, “Ġânġe dowâk arim emetne emetne luâk umburuk mandâi are akto luâk kopa akto ondopyeġe bok bokne me dewunyeġe bok bokne luâk hainare meyekmenâ toġoġet” dâmbo hin dâm maganġep,

<sup>22</sup> “Luâk humo. Den maktât are akmâ meteân. Ġârâmâ emetġe ire boâk piktâi.” dâep.

<sup>23</sup> Hain dâmbo hin maganġep, “Hanâk siâkâ arim kepia ġinġânġen akto halânġen yoġâk yoġâk mandâi are undâġât yenġim mem miawak yekmenâ toġoġet. Togom emetne pikġet.

<sup>24</sup> Dâ emelâk mem oloġyekberâm aktere bo dâyi are âmâ yânâk tatbai.” dâep.” Yesuġe den ġinġe hain dâep.

*Yesu olop manbaiġe hâkyeġe bo mem agatbai.*

<sup>25</sup> Akto luâk dondânġe Yesu haminġânġen watmâ arimbiâ purik dâm hin makyenġiep,

26 “Luâk siâne nângâlân dewatiwerâm akmâ âmâ ewe memelupne me âmben nananjupne me emiņe garine hepun yekbiâp. Akto ikinje manman aregât ukenje bo nângâm gangerâwiâp. Dâ luâk siâne hain akbiap are âmâ nângât honj bawa akmâ manbiap.

27 Luâk siâ gasalupņande wan me wan siâ akmâ hilipkowai aregât hamep akmâ ikinje hâkņe gangerâm manbiap arekņe nângâlân bo dewatiwiap.

28 Yeņgâlân gâtņe siâne emet ketuguwerâm âmâ ulik gulik puli soņ oyaņmâ ekto ârândâņ akto âmâ emet are ketugumap.

29 Dâ hain bo akmâ yân emetņe are ketugumbo puli bo akto pânân hepundo emet are yân kindo ekmâ aregât den pat magaņgi goaņgi akmâ dewunņân gem giriņ aņmâ hin dâwai,

30 “Luâk irekņe luâk hanņeâk nângâm tetembeņe anuņdo giep ina gain gain akmâ benņe yân hepundo kindâp.” hain dâmai.

31 Akto siâ hin. Luâk humo siâne luâk humo siâgât gasa agaņmâ ligim ainâk agatmâ bo arimap. Tatmâ nângâ nângâ hin soņ nângâwiap, “Nen ire amâ amon siâ manden dâ indâgen âmâ yâk biwirâ hain mandâi. Aregât nenņe âlepņe yeņguwaengât dop bo.”

32 Hain dâm ikinjaet nângâmbo gembo gasalupņe kâlêwângen manbai ainâk honj bawa siâ huņgun aņdo arim hin dâm makyeņgiwiap, “Ye olop gala konok manberâm huņgun niņdâp” hain dâwiap.

33 Akto aregât keiņe hin. Yeņgâlân gâtņe siâne hainâk kotņe siâ siâ mem gangerâm hârogâk bo

hepunmâ nângâlân dewatiwiap are âmâ maktere nâ olop âlepne bo manbaet.

<sup>34</sup> Kâtembe siâ ukenne bo heñgemgom kotne gulip katbiat âmâ dowâk pâlâmne akbiap. Hain akbiap aregât siân gain gain akmâ âmâ lâuwâne ukenne akbiap? Are bo agakne.

<sup>35</sup> Hain akmap aregât yân kâienne gemap. Gârâmâ ye den ire nângâm biwiyenân katmâ heñgemgom manbi.” dâep.

## 15

### *Lama siâ gulip agando bo hepunbiap.*

<sup>1</sup> Akto luâk bikñande gawaman yengât puli meme luâk akto luâk agak meme bâleñe akmini arekne sop siân Yesugâlân den nângâwerâm togoyi.

<sup>2</sup> Togombiâ Mosegât den kârikne makmâ kepigi akto Parisaio luâk arekne nângâmbiâ bâlimbo Yesugât hin dâyi, “Yesune puli meme luâk akto luâk agak meme bâleñe akmai are meyekto yâk olop sot nendâi imâ bâliâp.”

<sup>3</sup> Hain dâmbiâ aregât Yesune den ginne hin dâm makyenjiep,

<sup>4</sup> “Yengâlân gâtne siâgât lama 100 kinañbiap. Akto hutyenânba konokne heambukto ambonande hepunbiap me bo hepunbiap? Amâ bo hepunbiap. Bikne are hân hañanân katyekto kinbiâ siâ heambukbiap aregât undâgâtbiap.

<sup>5</sup> Undâgâtmâ mem miawakmâ okot âlep akmâ oloñmâ kepijan togowiap.

<sup>6</sup> Kepian togom galalupne yengonmâ hin makyengiwiap, “Lama siâ heambugep ina mem miawaktân aregât herone akne.” dâwiap.

<sup>7</sup> Aregât maktere nângâñet. Luâk 99 yâkñe âmâ dosa nenñe bo dâmai are yeñgât Anutuñe okot âlep humo bo akyeñgimap. Gârâmâ bâleñe meme luâk konokñe agak memeñe akto dosañe are nângâmbo bâlimbo hanñe purikato Anutuñe ekto ârândâñ akto dosañe hepun añbiap. Hain akmâ hulañdo himbimân manmai arekñe herone humo akbai.

<sup>8</sup> Akto den siâ hin. Âmbâle siâne puli koañe 10 membiap. Akto puli koañe siâ heambukto hepunbiap me undâgâtbiap? Bo hepunbiap. Are kemdâ sagom gaunmâ gagap urutmâ undâgâtmâ manbiap.

<sup>9</sup> Undâgâtmâ manmâ mem miawakmâ aregât emi tâulupñe akto ginbailupñe yeñgonmâ hin makyenñiwiap, “Puli koañe heambugep are ina mem miawaktân aregât herone akne.” dâwiap.

<sup>10</sup> Aregât maktere nângâñet. Himbimân Anutugât añelolupñande hainâk bâleñe meme luâk siâne agak meme bâleñe makmâ miawakmâ, “Anutu dosane hepun niñ.” dâwiap aregât okot âlep nângâ añbai.” dâep.

*Nanñe bâiñande sikum mem arim gulipkoep.*

<sup>11</sup> Akto Yesuñe den ginñe siâ hin dâm makyenñiep, “Luâk siâgât nanlogâtñe lâuwâ maliat.

<sup>12</sup> Manmâ nanñe bâiñande eweñe hin dâm magañep, “Tâk puli are teune olop potatmâ netki.” dâep. Hain dâmbo tâk puli are ewe yetñande potatmâ teune olop yetkiep.

<sup>13</sup> Akto emiñe are âi ketugum getek manmâ tâk puliñe are meakmâ dâp kâlewângen ariep. Arim

manmâ sot sonçoân puligom kotņe gulip gulip akmâ puli are hârok panmâ metiep.

14 Panmâ metembo hân ain mop humo miawagep. Miawakto nanaņ are tâwât dewunņe siâ siâgât umburuk akmâ

15 hân amboņe siâgâlân arim mando yâkņe yâkgât bau damunņe akmâ manben dâm huņgunaņep. Huņgunaņdo arim bau damungom mando mopņe dondâ agumbo siâ me siâ sot bo waņdo âmâ

16 bau yeņgât goka hâkņe nemberâm agep.

17 Hain akmâ nâņgâ nâņgâņe miawakto hin dâep, “Apogât âi luâklupņande âmâ sot dondâ nemai. Dâ nâ âmâ sotgât akmâ hilip aguwêrâm aktân.

18 Aregât agatmâ kepiân purik katmâ apogâlân arim hin dâm maganņbian. Apo, bâleņe aktere dosanande Anutugâlân akto gâņgâlân umatņe agep.

19 Akmâ hilipkoân aregât nange bo nogonben. Yân hoņ bawage akbiangât menekmenâ manbe.”

20 Hain nâņgâm agatmâ arim aņgâņgen togombo eweņande dewunņe panmâ egep. Ekmâ okotņe nâņgâm pârigim arim nanņe lokom maņganlep.

21 Akto nanņande hin dâm maganņep, “Apo, bâleņe aktere dosanande gâņgâlân akto Anutugâlân umatņe miawagep aregât nekmâ nanne bo dâwen.” dâep.

22 Hain dâmbo eweņande âmâ âi luâklupņe hin dâm makyeņgiep, “Dowâk sâņgum kâlep are mem ga luguaņbiâ geâk. Akto donet siâ baraganņân katņet. Akto kei pekeņe luguaņet.

23 Akto bulimakao nanņe keluņe olowâk are



gâim ombiâ ondo nem heronje akne.

<sup>24</sup> Nanne emelâk moep dân ina togoâp. Emelâk gulip aguep dân ina miawakmâ togoâp.” dânbo heronje agi.

<sup>25</sup> Hain akmâ tatbiâ nanje ulik gulik arekne âiângen malepgât purik katmâ togom kepia ginjân kinmâ heronje maronje girin gegek kep kenju akbiâ nângâm

<sup>26</sup> âi luâk siâ kondo gembo hin dâm aikoepe, “Heronje maronje âure wangât akmâ tatâi?”

<sup>27</sup> dâm aikombo hin dâep, “Emige gulip aguep dâyon ina togombo aregât eweyetjande dânbo bulimakao nanje kelurâk are kom ondenje om kindo heronje aktâi.” dâep.

<sup>28</sup> Hain dâm maganjo nanje ulik gulik arekne kuk akmâ kepia ain âgâwerâm hâkâj agep. Akto ewejande kepia ginjângen gem, “Gâ ga.” dâm maganjep.

<sup>29</sup> Maganjo nângâm hansumbu akmâ hin magep, “Nâje âi luâkgande hin hombanj dondâ âi ketugu ginmâ den bo konjinmâ gan. Akto nâniñ nanje siâ bo niñmenâ galalupne olop nem heronje agion.

<sup>30</sup> Akto nangande gângât tâk puli aregât ukenje nângâm mem arim âmbâle kondarâ olop manmâ panmâ metiep ina togoâp yâkgât makmenâ makao nanje kelurâ are kom gâim ombiâ nângâre bâliâp.” dâep.

<sup>31</sup> Hain dânbo ewejande hin dâm maganjep, “Nanne, gâmâ nâ olop sop kâlep manmâ gamat aregât nâjeân kotje siâ siâ tatâp are hârok gângât pat aktâp.

<sup>32</sup> Dâ emige emelâk moep dâman ina togoâp. Akto emelâk gulip aguep dâman ina togoâp. Aregât heronje akmâ okot âlep agandenne ârândân aktâp.” dâep.”

## 16

*Damunje puli siâ siâ mem hanâk hanâk ketuguep aregât den umatje.*

<sup>1</sup> Yesunje Aposololupne den ginje siâ hin dâm makyengiep, “Luâk humo sikumdâ siâ malep yâkgât tâwât dewunne akto sângum me kotje siâ siâ aregât damunje malep. Aregât den hâkne tunmâ hin dâm maganji, “Gângât hon bawa âige damunje akmap arekne tâwât dewunne siâ siâ mem hanâk hanâk ketugumap.”

<sup>2</sup> Hain dâmbiâ mem oloņmâ dâep, “Gângât hâkge tunbiâ nâņgân. Hainâk damun lâuwâņe bo menjektere hepunbiat aregât puligo puligo kulem esenņe are mem gamenâ tâwât dewunne siâ siâ yenġât keiņe mem miawakbe.” dâep.

<sup>3</sup> Hain dâambo arim damunne biwiņân hin nâņgâep, “O luâk humonande wat nekbiap aregât gain akbe? Âi ketugum kâmetbiangât hâkân aktân. Akto hokboâk hokboâk ulilaņdere nekbiâ anun anġiman.

<sup>4</sup> Hinne nâņgân. Galalupne mem gala katyekmâ mem heronje maronje katyektere luâk humonande watnekto âmâ emetyenân oloņnekbiâ olowâk manbaen.” dâep.

<sup>5</sup> Hain nâņgâm luâk humonæet tâwât dewunne siâ siâ dosa aganmâ mem mali aregât ikeņeâk

ikiñeâk mem olonjegep. Hain akto togombiâ aiyeñgum dêep,

<sup>6</sup> “Gângât dosa humogâlân amon tatâp?” dâmbo lâwin kelunjet dop 100 dêep. Hain dâmbo hin dêep, “Âlepñe 50 âk niñben.” dêep.

<sup>7</sup> Hain dâm siâkâ aikoep, “Luâk humogâlân dosa amon tatâp?” dâmbo, “Sanj sanj koañe are ito 100.” dâmbo dêep, “Âlepñe 80 âk niñben.” dêep.

<sup>8</sup> Hain dâmbo luâk humonande nânğâm damunñe are hin magañep, “Gângât nânğâ nânğâge humo aregât nânğâre biwine âlepñe aktâp.” humoñe hain dêep. Wangât? Hingât. Anutugât den bo lokomai bikñande tâk puliyenñe damungom galalupyenñe heyenğimai aregât nânğâ nânğâyenñe humo tatâp yenñe âmâ Anutugât den lokomai ewangi yektâi.

<sup>9</sup> Haingât ire maktere nânğânjet. Yenñe hainâk tâk puli me wan me wan mem manmâ are gala akyenğim âmâ hâmbâi umatñe miawak yenğiwip sop ain yâk yenğâlân arim kepia tatmâ âğâwip ain manbai.

*Wan umatñe me owânñe aregât den.*

<sup>10</sup> Luâk siânñe wan me wan owânñe damungom biwiñande lokom manmapñe âmâ tâwât dewunñe wan me wan bunñe are hainâk biwiñande lokom damungomap. Gârâmâ luâk siânñe wan me wan hanâk damungom hilipkomapñe âmâ tâwât dewunñe wan me wan bunñe are hainâk hanâk damungom hilipkowiap.

<sup>11</sup> Haingât yenñe tâwât dewunñe me wan me wan hângât egâlian are biwiyenande bo lokom manbiâ âmâ wan me wan bunñe hâmbâi bo yenğiwip.

12 Akto humo yenjaet puli me wan me wan bo damun akmâ heŋgemgombiâ aregât âigât hâuŋe bo yeŋgim heŋgemgowiap.

13 Akto aregât siâ makbe. Nanaŋ konokŋe luâk kembu lâuwâ yetgât hoŋ âlepŋe bo akyetkiwiap. Wangât? Hingât. Siâgât lau lokoanmâ benŋe siâgât lau bo lokoanbiap. Akto siâgâlân purik katmâ siâgâlân hâkân akmâ hamianbiap. Aregât Anutugât lau lokowerâm âmâ puligât nâŋgâmbiâ humo bo akbiap.” dêep.

*Yesuŋe Parisaio den kârikŋe dâm makyenŋiep.*

14 Yesuŋe hain dâmbo Parisaioŋe tâwât dewunŋe aregât ukenŋe nâŋgâmbiâ âgâep aregât Yesuŋe den magep are nâŋgâm âmâ hâkân akmâ dewunŋân geyi.

15 Dewunŋân gembaliâ makyenŋiep, “Yeŋe âmâ tek tekŋân manmâ luâk âmbâleŋe nenekmâ egâlianŋet dâmai. Dâ Anutuŋe âmâ biwiyenjaet keiŋe nâŋgâp. Wan me wan siâ siâ ekbiâ âlepŋe akmap are âmâ Anutuŋe ekto bâlimap.

16 Akto siâ maktere nâŋgâŋet. Mosegât den kârikŋe akto Anutugât den kulemgom gayi den are kârikŋe tatmâ gam gam Yohanegâlân bunŋe miawagep. Miawakto aregât kakŋân Anutuŋe damun nenŋe akberâm aktâp aregât den pat âlepŋe hauŋmâ arimbo nâŋgâmbiâ biwiyenŋe pagalembo aregât bunŋe memberâm akmâ âi humo mem wârakmâ âgâwai.

17 Himbim hân haru are âmâ gulip akbiandatgât dopŋe tatâp. Gârâmâ Mosegât den kârikŋe are dowâk gulip akbiapgât dopŋe bo tatâp.

18 Akto siâ maktere nângâñet. Luâk siâñe âmbenñe hepunmâ anğâ membiapñe âmâ dosa umatñe membiap. Akto luâk siâñe âmbenñe wato bam mando siâñe mem âmâ dosa olowâk manbiap.” dêep.

*Luâk sikumyene olop akto luâk umburuk are yengât den umatñe.*

19 Akto Yesuñe den siâ hin makyenğiep, “Luâk humo siâ malepñe tâwât dewunñe humo mem hâk pekeñe âlep âlep puligom mem malep. Manmâ hilâmñe hilâmñe sot keiñe keiñe om nem unsambe malep.

20 Hain manmâ luâk siâ umburuk malep kotñe Lasaro mando diwi kârikñe miawaganđo hâkñe diwiâk hârok agep. Hain akmâ betgen yem manminep.

21 Hain akmâ luâk humoñe emelanba manmâ sot nendo gagapñe gembo are nemberâm akminep. Hain akto duane togom diwiñe elewe-lañmâ mali.

22 Akto manmâ umburuk are mondo aneloñe oloñmâ âğâm Abrahamğât okotñân katbiâ malep. Akto kakñân luâk kotdâ are mondo hangoyi.

23 Hangombiâ mom kâlâwân gem âmâ hâk hilâlâm humo nângâm manmâ hâkñângen Abraham akto Lasaro yelegep.

24 Yelekmâ hin dâm Abraham magañep, “Apo, kâlâp bâlenñân tatmâ hâk hilâlâm bâleñe nângâm mandân aregât okot nângâm Lasaro magañmenâ bâteñe pikñân tu katmâ gutmâ elewetnân howaimbo getek sândugeâk.” Hain dâmbo

<sup>25</sup> Abrahamņe dâep, “Gala, gâ nâņgât. Hânân ukenņe akto heroņe humo kakņân malen aregât sop bo agep. Lasaro yâgâmâ okot bâle kakņân malep are hainâk bo agañep. Aregât biwiņe heroņe mandâp. Dâ gâmâ hâk hilâlâm humo nâņgâmâk mandât.

<sup>26</sup> Akto hut nenņân hemem humo kindâp aregât in gâtņande yeņgâlân gewaigât dopņe bo. Akto yeņgâlân gâtņande nengâlân gawerâm hainâk ewum pâpkowiap.”

<sup>27</sup> Hain dâmbo luâk kâlâwân talep arekņe hin dâep, “Apo, siâ maktere nâņgâ.

<sup>28</sup> Lasaro huņgunañmenâ ewenaet emelan ariâk. Kepianân emilupne momerâk mandâiņe hâk hilâlâm iren togowâigât Lasaro huņgun añmenâ aregât den kârikņe makyeņgimbo nâņgâ nâņgâyeņe pâroņ dâk.” dâep.

<sup>29</sup> Hain dâm makto Abrahamņe hin magañep, “Bo, Moseņe den kârikņe kulengoep are tatâp. Akto Anutuņe den makyeņgimbo propetelupņande kulemgoyi are tatâp are oyaņmâ nâņgâņet.”

<sup>30</sup> dâmbo dâep, “Apo, hain bo. Moyi yâk yeņgâlân gâtņe siâņe arim makyeņgimbo âmâ agak memeyeņe bâleņe Anutugâlân makmâ âmâ han biwiyeņe purik katmâ manbai.” dâep.

<sup>31</sup> Hain dâmbo hin dâep, “Mosegât akto propete yeņgât den are oyaņmâ nâņgâm hâkâņ akmai aregât moyi yâk yeņgâlân gâtņande arim makyeņgimbo hainâk den are hâkâņ akbai.” dâep.” Yesuņe hain dâep.

*Dosa aregât keiņe.*

<sup>1</sup> Yesuņe hoņ bawalupņe den siâ hin dâm makyenģiep, “Niambiņe ye hârok dop yeņguwerâm biwiyenân gemap aregât dop tatâp. Gârâmâ luâk siâņe Niambi gala aganmâ luâk siâ ekmâ bâleņe ak dâmap are Anutuņe hâuņe humo wanģbiap.

<sup>2</sup> Gârâmâ luâk siâņe nanan siâ ekmâ bâleņe ak dâmbo are siâņe kât humo dondâ hannân imbo-goanmâ haru bāt gumân hâkokombo dâine arekņe âmâ siâ me siâ owâiņe miawaganģbop.

<sup>3</sup> Aregât biwiyene pâlâmņe bo agâk. Akto siâ makbe. Galage siâņe bâleņe akto âmâ sami maganģbiat, “Bâleņe akniņdât aregât dâm makniņmenâ dosage are bo akberâp.” dâmenâ hain akto gala konok akbiandat.

<sup>4</sup> Akto hilâm konok aregât kâlegen bâleņe akģiņmâ dosa are makmâ miawakmâ arim nâmbulân lâuwâņe hain dâm miawakmâ âmâ hin dâm makģiņbiap, “Gala hain akģiņdângât biwine bâliâp.” Hain makģiņdo gâkâ hainâk, “Âlepņe, are bo aktâp.” dâm gala aganģbiat.” dâep.

<sup>5</sup> Hain dâmbo aposololupņande hin dâm ulilaņi, “Humo, gâ nâņgâ nâņgânenņe mem sambelem nengiwen.” dâyi.

<sup>6</sup> Hain dâmbiâ Kembuņe hin dâm makyenģiep, “Nâņgâ nâņgâyeņe bunņe bâlensiâ dondâ dâwok koaņe hinare yeyenģimbo dâine âmâ lâwin indâre petakmâ haruân gem kilâkgât maganģbiâ âmâ lauyene lokom hain akbop.

<sup>7</sup> Yeņgâlân gâtņe siâņe hoņ bawa âi ketugum bulimakao damunņe mando emet dâgâmbo guto âmâ ain hin dâm maganģbiat me? “Emetgân âgâ

tatmenâ sot om ginbe.”

<sup>8</sup> Hain bo dâwiat. Hin dâm maganbiat, “Letge konok areâk latmâ tatmâ sot om ninmenâ nendere hâmbâi âmâ guge om nembiat.” dâwiat.

<sup>9</sup> Haingât keiņe hin. Gâņe hoņ bawa âi dâm waņen are ketugumbo gâņe bo mepaiņe membiat. Yân nânğanmenâ ârândân akbiap. Akto aregât hin maktere nânğanet.

<sup>10</sup> Yeņgât keiyeņe âkâ hainâk tatâp. Âi makmâ yeņgire are ketugum metem âmâ hin dâwi, “Nen hoņ bawa yânņe akmâ manden. Âi makmâ nengiep are konok mem metien.” dâmbiâ ârândân akbiâp.” dâep.

*Luâk 10 hâk bâle miawak yeņgiep.*

<sup>11</sup> Yesuņe Yerusalem kipuan ariwerâm âmâ Galilaia hân ewangim Samaria hân hâlânâmâ kipia bânânģenba ariep.

<sup>12</sup> Arim kipia ginņân âgâmbo luâk 10 hâk bâle miawak yeņgiep arekņe ekmâ âmâ kâlewângen kinmâ hin dâm konmâ maganji,

<sup>13</sup> “Woa, luâk humo Yesu, gâ nengât okot nânģâ.”

<sup>14</sup> dâm konmâ maganbiâ yekmâ âmâ hin makyenģiep, “Sumbe kat kat luâk are yeņgât damunņande yekbaigât yâk yeņģâlân arinet.” dâm makyenģimbo arim manbiâ hâkyeņe are dâwân âlepņe akmâ metiep.

<sup>15</sup> Hain akto yâk yeņģâlân gâtņe konokņe egakto hâkņe âlepņe akto aregât purik katmâ togoep. Togom kârikņe akmâ Anutu maņganlep.

<sup>16</sup> Maņganmâ Yesugât enemņân togo keiņân ge yem âmâ heroņe akmâ maņganlep.



17 Akto luâk are Samaria hânân gâtņe aregât Yesuņe hin dâep, “Luâk 10 âlepņe aktâi are 9 âmâ yâgâten?”

18 Yâkņe âmâ arim nâņgâm ondop kârik akmâ yân manbiâ luâk lombo konokņe togom Anutugât mepaiņe mendâp.”

19 Hain dâm luâk are hin dâm maganep, “Biwige nâņgâlân katâp aregât Anutuņe nâņgâ giņdo âlepņe aktât aregât arim biwige sândugeâk.” dâep.

*Anutuņe damun nenņe akbiapgât sop.*

20 Sop hain Parisaio luâk bikņande Yesu aikom hin dâyi, “Sop amuten Anutuņe miawakmâ damun nenņe akbiap?” dâyi. Hain dâmbiâ hin makyenņiep, “Anutuņe damunyenņe akbiap ain kulem keiņe keiņe bo miawakto ekbai.

21 Aregât hin bo dâņet, “In miawaktâp, me indâgen miawaktâp.” hain bo dâņet. Nâņgâi. Anutuņe damunyenņe emelâk akberâm aktâpğât pat âmâ hutyenân mandâp ire.” dâep.

22 Hain dâm kinmâ Aposololupņe hin dâm makyenņiep, “Hâmbâi sop siân umatņe miawak yenņimbo ain ye hin dâwai, “Wei, luâk akmâ giep yâkgât sop siâ ekne.” dâm nâņgâmbiâ humo akbiap. Ain bo miawakto ekbai.

23 Akto sop ain luâk bikņande nâņgâ yâkgât hin dâm makyenņiwai, “Aregen miawaktâp me iregen nengâlân miawaktâp.” dâmbiâ aregen bo ariwi. Akto are nâņgâmbiâ bunņe bo akbiâp.

24-25 Akto hâk hilâlâm humo nâņgâre âmâ luâk dondâņe haminiņmâ hâk hilâlâm niņbai. Hain akbiâ aregât haminiņân mem belek akmâ himbim bikņe belek dâmbo âmâ bikņe bikņe arimap, aregât

dop akmâ luâk akmâ geân lâuwânje gem miawak-  
tere luâk âmbâle hârokje nekbai.

<sup>26</sup> Akto ire maktere nângânet. Uliknân luâk  
siâ kotje Noa, yâk malep sop ain âmâ hin areâk  
akmâ mali hainâk nângât sop humo tâlâgumbo ain  
hainâk akbai.

<sup>27</sup> Emelâk âmâ sot songo neyi. Akto âmbâle mem  
luâk mem agi. Hain akmâ manbiâ aregât purikje  
Noaje yekmâ wanjan âgâmba tânâk humo giep.  
Tânâk humo gembo ugurupje humo togom âmâ  
luâk âmbâle hânân mali are hârok kawut yekmâ  
metiep.

<sup>28</sup> Akto aregât haminân luâk siâ kotje Loti, yâk  
malep sop ain âkâ hainâk agi. Sot songo akto tu  
neyi. Akto kotje siâ siâ are mem anji goanji agi.  
Akto âi kalam kâmetmâ siâ siâ agi. Akto emet  
opmân ketuguyi.

<sup>29</sup> Hain akmâ manbiâ sop ain Lotije Sodom  
kipia hepundo himbimânba kâlâp humo gem kipia  
ambolupje hârogâk om meteyegep.

<sup>30</sup> Gârâmâ nâ luâk akmâ geân purik katbian sop  
ain âkâ dop hainâk miawakbiap.

<sup>31</sup> Akto sop humoân luâk siâ kipia sombeimân  
kinbiap arekje emetnân âgâm kotje siâ siâ bo  
meakbiap. Akto siâ âiângen manbiap arekje kip-  
ian bo purik katbiap. Hain bo akbi. Dowâk pârigim  
ariwi.

<sup>32</sup> Lotigât âmbennaet pat nângâm hejgemgowi.

<sup>33</sup> Aregât keije hin. Luâk siâje manmanje  
gangerâwiap arekje âmâ hilip aguwiap. Dâ siâ  
manmanje hepunbiap arekje âmâ âlepje tatbiap.

<sup>34</sup> Maktere nângânet. Sop ain luâk lâuwâ akmâ  
opmân konogân yembiandat. Yembela are siâ

mem siâ âmâ hepunbiap.

<sup>35</sup> Akto âmâle lâuwâne sot gâim tatbiandat. Tatbela siâ mem siâ âmâ bo membiap.

<sup>36</sup> Akto luâk lâuwâ âiân kinbela âmâ siâ mem siâ âmâ hepunbiap.” Yesuñe den hain dâmba aposololupñande aikom hin dâyi,

<sup>37</sup> “Humo, yâgâten miawakbiap?” dâmbiâ hin makyengiep, “Siâ siâ momoñe yembiâ ain liplipñe neyekberâm togomai.” dâep.

## 18

### *Âmbâle kambut siâñe kiap ulilañmâ malep.*

<sup>1</sup> Yesuñe konam bo akmâ âmâ hilâm ârândân Anutu olop den akmâ manñet dâm aregât den ginñe siâ hin dâm makyengiep,

<sup>2</sup> “Kiap siâñe den âiân katyekmâ malep. Hain akmâ manmâ Anutugât den bo lokom âmâ bo hamewagep arekñe luâk âmâle yekmâ yâk yengât nâñgâmbo gegenje akto malep.

<sup>3</sup> Hain akmâ mando kipia ain âmâle kambut siâ malep. Manmâ hilâmñe hilâmñe kiap aregâlân arim hin dâm magañmâ malep, “Gasanande hilip nuguwerâm aktâp aregât gala akniñmâ tân nugu.” dâep.

<sup>4</sup> Hain dâmba kiap arekñe âmâle kambut aregât den are hâkân akmâ nâñgâm pâlâmñe akmâ malep. Mando sop kâlep akto biwiñande hin nâñgâep, “Nâñe Anutugât den bo lokom bo hamewaktân luâk âmâle are yengât nâñgâre gemap are bunñe.

<sup>5</sup> Gârâmâ âmbâle kambut arekņe hilâm ârândâņ den makniņmap aregât biwinande hâkâņ akmap. Dâ uņak âmâ hanâk tângowe.” dâep.”

<sup>6</sup> Aregât Yesu Humoņe den dewatim hin dâep, “Kiap den kokoņe hain dâepgât nâņgâm henġemgowi.

<sup>7</sup> Gârâmâ Anutuņe âmâ luâk bikņe oloņyeko hilâm ârândâņ ulilaņbiâ dowâk tân yeņgum gasalupyene den âiân katyekbiap. Hâkâņ akmâ bo tân yeņguwiapgât dopņe bo tatâp. Bo kârikņe.

<sup>8</sup> Manmâ kâlep bo akto dowâk tân yeņgum gasalupyene den âiân katyekbiap. Hain gârâmâ Anutuņe huņgun niņdo geân nâņe hâmbâi lâuwâņe gem luâk âmbâle siâņe biwiyene nâņgâlân katmâ manmai are mem miawakyekbian mon?” dâep.

*Parisaio akto Roma gawaman yeņgât puli meme luâk.*

<sup>9</sup> Luâk bikņande yeņaet nâņgâmbiâ âlepņe akto galalupyene yeņgât nâņgâmbiâ gemap are yeņgât nâņgâm Yesuņe den ginņe siâ hin makyenġiep,

<sup>10</sup> “Luâk lâuwâ siâ sumbe emetņân âġâm Anutu den dâm magañiat siâ âmâ Parisaio, dâ siâ âmâ puli meme luâk.

<sup>11</sup> Akto Parisaio luâk arekņe âmâ ikiņaet nâņgâmbo agato bin binâk kinmâ hin dâep, “O Anutu, âlepņân kat nekmenâ ârândâņ agep. Akto luâk bikņande kâmbu akmâ bâleņe siâ siâ akmai. Dâ nâmâ hainare bo. Akto nâ puli meme luâk iņgon yu kindâp arekņe bâleņe akmap hainare bo akman. Nâ mandere nekmenâ ârândâņ akmap aregât ġaņe âlepņe akniņdât dâm mepaige mendân.

12 Akto hilâm lâuwâ kâlegen gângât kambiamge âlepne agâk dâm sot bâlâk manman. Akto tâk puli kotne siâ siâ are hutnânba konok âmâ gângât pat dâm katman.” dâep.

13 Hain dâmbo puli meme luâk are ingon anğângen kinmâ anjun anğim kângom hin dâep, “O Anutu, nâ luâk bâleņe mandân gârâmâ hanâk bo hepun nekben.” hain dâep.

14 Aregât keiņe hin makyengire nângâņet. Anutunę puli meme aregât âmâ dosaņe puliaņdo purik katmâ ariep. Dâ Parisaio are âmâ dosaņe hainâk talaņep. Akto aregât hin nângâņet. Luâk siâņe ikiņe kotne mem agato Anutunę mem ge katbiap. Dâ luâk siâņe ikiņe kotne mem gembo âmâ Anutunę mem agatbiap.” dâep.

*Yesunę nananlupyeņaet nângâm Anutugât pat makyengiep.*

15 Luâk âmbâle bikņande nananlupyeņe kewuguyekmâ Yesugâlân togom meyegâk dâmbiâ hoņ bawalupņande sârek yeņguyi.

16 Sârek yeņgumbiâ Yesunę mem olonęekmâ hin dâep, “Hepunbiâ nananlupyeņe are nângâlân gaņet. Hain arekņe Anutugât kâmolân gâtņe aregât bo mem gangerâ yekņet.

17 Aregât bunęe maktere nângâņet. Nananlupyeņande dowâk Anutugât den lokom biwiyeņe yâkgâlân katmai. Gârâmâ siâņe hain bo akbiap âmâ Anutunę bo meyekbiap.” dâep.

*Luâk koldâ siâņe sikumņe mem gangerâm biwiņe Yesugâlân bo kalep aregât den pat.*

18 Akto damun siâņe Yesu aikom hin dâep, “Luâk humo âlepne amboņe aktât. Aregât maktere

nângâ. Kârikņe manmâ âgâwiangât gain gain akbian nângât?” dâmbô

<sup>19</sup> hin magañep, “Âlepņe amboņe âmâ Anutu konok. Gârâmâ âlepņe amboņe dâm makniņdât aregât nângâm mak makgaet damun akmâ manben.

<sup>20</sup> Akto ainuguât aregât keiņe makgiņbe. Den kârikņe nângâmat amâ hin. Âmbâle siâ ekmâ egâlian bo akben. Akto luâk siâ moâk dâm bo koben. Kâmbu bo memben. Den bo hiangiwen. Ewege memegande den makbela loko yetkiwen.”

<sup>21</sup> Hain dâmbô hin magañep, “Ya maktât are âmâ nanaņânbak den kârikņe âlepņeâk lokom gam yu mandân.” dâmbô

<sup>22</sup> Yesuņe den are nângâepgât hin magañep, “Konok tatâp are âmâ hin akben. Arim âmâ puli me ito sikum me wan me wan are oyaņmâ luâk umburuk mandâi are yeņgiwen. Hain akmâ âmâ nângâlân lâuwâņe togomenâ nâ olop âi ketugum manbaet. Hain akbiat âmâ himbimân aregât hâuņe miawak giņbiap.” dâep.

<sup>23</sup> Hain dâmbô puli me ito sikum siâ siâņe dondâ talaņep aregât den are dâmbô nângâmbo umatņe agep.

<sup>24</sup> Hain akmâ kambiamņe bâlimbo Yesuņe ekmâ hin dâm magep, “Luâk âmbâle puli me ito sikum me wan me wan olowâkņe Anutugât den lokom manberâm akbiâ âmâ umatņe miawak yeņgiwiap.

<sup>25</sup> Akto aregât hin makbe. Soņgo piki dâpņânba ariwiapgât dop bo tatâp. Are âmâ luâk kotņe siâ siâ talaņdâp arekņe Anutuņe damunņe akbiawân ain ariwerâm akmâ hainâk hâumgowiap.” dâep.

<sup>26</sup> Hain dâmbô âmâ nângâm kiliņe hin dâyi, “Niņe

himbimân âgâwiap?” dâyi.

<sup>27</sup> Hain dâmbiâ hin makyenġiep, “Are âmâ han yeŋeâk âgâwerâm aregât ewum hâumgomai. Anutunġe âmâ dâp hainare mem miawakberâm aregât bo pâpkomap.” dâep.

<sup>28</sup> Hain dâmbo Petoroŋe agatmâ hin maganġep, “Nângât, kotŋe siâ siâ hârok hepunmâ metem nen gâŋgâlân purik katmâ malion akto manmâ gaen.” dâep.

<sup>29</sup> Hain dâmbo Yesuŋe hin makyenġiep, “Luâk siâŋe Anutugât âi ketuguwerâm akmâ âmâ emetŋe me âmbenġe me emiŋe garinġe me eweŋe memenġe, me ginbailupŋe hanâk hepun yekbiap

<sup>30</sup> are âmâ sop uŋak ire gala aganġmâ tângowerân. Tângore âmâ hinġe wan me wan dondâ miawakberâp. Akto titnan sop humoân âmâ tângore dondâ sambelem âgâwiap akto manman kârikŋân manmâ âgâwiap.” dâep.

*Kombiâ mombiap aregât den makyenġiep.*

<sup>31</sup> Yesuŋe Aposololupŋe mem olonyekmâ hin dâm makyenġiep, “Maktere nângâŋet. Yerusalem kipian âgâwerâm akten. Gârâmâ âgâenġe âmâ luâk akmâ geân nângât den makmâ miawakto kulemgoyi are bunġe akberâp.

<sup>32</sup> Roma luâkŋe menekmâ nugum mem ge katnekmâ siâ siâ akniŋmâ âmâ tâwut nuguwai.

<sup>33</sup> Akto tâk metŋe arekŋe mem orenekmâ nugumbiâ mombian. Mondere hilâm âlâwu bo akto âmâ momoŋânba agatbian.” dâep.

<sup>34</sup> Hain dâmbo nângâmbiâ ârândânġ bo akto keiŋe nângâwerâm akbiâ dâp bo akto âmâ bo nângâm heŋgemgoyi.

*Yesuñe dâmbô luâk siâ dewunñe hâreakto emet egep.*

<sup>35</sup> Yesu arimbo Yeriko kipia are tâlâguep. Hain akmâ dâp ginñân luâk siâ dewunñe bokbokñe siâ puligât ulit yeñgim talep.

<sup>36</sup> Hain akmâ tato luâk kâmot humoñe dâp hainâk arimbiâ keiyenñe munñe nâñgâm aregât aiyenñumbo hin dâyi,

<sup>37</sup> “Yesu Nasarete kipian gâtñe togoâp.”

<sup>38</sup> dâmbiâ nâñgâm kârikñeâk konmâ hin dâep, “Woa, Yesu, gâ Dawidigât kâmolân gâtñe, aregât okot nâñgâ niñ.” dâep.

<sup>39</sup> Hain dâmbô luâk ulik gulik ariyi arekñe den are nâñgâm den hepun dâm magañi. Hain magañbiâ den are koyenñim kârikñeâk dondâ konmâ hin dâep, “Dawidigât kâmolân gâtñe, aregât okot nâñgâ niñ.” dâm kolep.

<sup>40</sup> Hain dâmbô Yesuñe nâñgâm âmâ dâwân kinmâ hin dâep, “Kewugum nâñgâlân ganjet.” dâep. Hain dâmbô dewunñe bok bokñe arekñe yâkgâlân gambo

<sup>41</sup> aikom hin dâep, “Gain gain akginñbegât nâñgâm aregât nogondât?” dâmbô hin dâep, “O humo, dewunne hulañ akto emet ekbegât nâñgân.” dâep.

<sup>42</sup> Hain dâmbô Yesuñe hin magañep, “Biwige nâñgâlân katât aregât âlepñe ek.” dâmbô

<sup>43</sup> ainâk dewunñe hulañ akto emet egep. Ekmâ âmâ Yesugât hamiñân arim Anutu mañganlep. Akto luâk bikñe are egi aregât hainâk Anutugât kotñe mem agali.



*Sakaioŋe agep aregât den pat.*

<sup>1</sup> Yesu Yeriko kipuan arim ewangiwerâm agep.

<sup>2</sup> Hain akto kipia ain luâk tâlâwâk siâ malep kotŋe Sakaio. Arekŋe puli meme yeŋgât luâk humo agep aregât yâkgât puli me ito sikum dondâ talaŋep.

<sup>3</sup> Akto Sakaioŋe Yesu ekberâm agep. Ekberâm akmâ âmâ luâk tâlâwâkgât luâk hutyeŋân kinmâ gain gain akmâ ekbe dâm kâleim agato bo agep.

<sup>4</sup> Hain akmâ pârigim ewangiyekmâ arim lâwin siâ lokom lokom âgâm kinmâ hin nâŋgâep, “Yesu in gutmâ arimbo ekberân.”

<sup>5</sup> Hain nâŋgâm kindo Yesuŋe ain togom dewunŋe panmâ egon ekmâ hin dâm maganep, “Sakaio, nâ gâŋgât emelan âgâ tatberâm nâŋgân aregât dowâk sopanmâ ge.” dâep.

<sup>6</sup> Hain dâambo ainâk sopanmâ gem biwiŋe heronŋe agep. Hain akmâ emetŋân oloŋmâ âgâep.

<sup>7</sup> Oloŋmâ âgâambo luâk hârokŋe ekmâ nâŋgâmbiâ bâlimbo hin dâyi, “Gain gaingât luâk bâleŋaet emelan âgâp?” dâyi.

<sup>8</sup> Akto Sakaioŋe Yesugât enemŋân ba kinmâ hin dâep, “Humo, nâŋgât puli me kotŋe siâ siâ are dopŋe konogâk mem potatmâ luâk umburuk mandâi are yeŋgiwian. Akto luâk âmbâle yeŋgât puli are heyenŋim meyeŋgiân hainâk mem agatmâ emelâk konok yeŋgiân aregât hâuŋe imbât yeŋgim metewian.” dâep.

<sup>9</sup> Hain dâambo Yesuŋe hin maganep, “Gâ Abrahamgât kâmolân gâtŋe bunŋe. Anutuŋe gala akŋimâ damunge aktâp are nâŋgâm ektân.

<sup>10</sup> Akto nâ luâk akmâ gem miawakmâ luâk

bâleṅande hilip yeṅguwâigât meyekmâ himbingât pat katyekberâm aregât geân.” dâep.

*Luâk kotdâṅe puli geârâk konok konok yeṅgim ariep aregât den ginṅe.*

<sup>11</sup> Yesu olowâk arimbiâ Yerusalem kipia are tâlâgumbo âmâ denṅe nâṅgâyiṅe hin dâyi, “Anutunṅe damun nenṅe akbiap aregât sopṅe tâlâguâp.” dâyi.

<sup>12</sup> Hain dâmbiâ aregât Yesuṅe den ginṅe siâ hin dâm makyenṅiep, “Luâk kotdâ siâṅe luâk kotdâ siâgâlân ariwerâm âmâ ikinṅaet hin nâṅgâep, “Damunyeṅe katnekbiap aregât arim benṅe togowian.” hain nâṅgâep.

<sup>13</sup> Akto ariwerâm âmâ hoṅ bawalupṅe bât bip bip hârok yeṅgondo togombiâ puli koaṅe humo konok konok yeṅgim hin dâm makyenṅiep, “Puli irekṅe âi ketugum puli mem sambe ketugumbiâ hâmbâi purik katmâ togom ekbian.” dâep.

<sup>14</sup> Hain dâm kâlewâṅen arimbo luâk âmbâle bikṅande hâkâṅ akmâ âmâ luâk hoṅ bawa siâ huṅgun aṅbiâ luâk kotdâ aregâlân arim hin maṅaṅep, “Gâṅe damun nenṅe bo manbiat dâmbiâ aregât togoân.”

<sup>15</sup> Hain dâambo yâkgât luâk kotdâ arekṅe hân damunṅe malâkgât kato purik katmâ togoep. Togom âmâ hoṅ bawalupṅe puli yeṅgiep are yeṅgondo gembali hin dâm makyenṅiep, “Puli yeṅgiân arekṅe âi ketugumbiâ amon miawagep?” dâep.

<sup>16</sup> Hain dâambo hoṅ bawa siâṅe hin dâep, “Luâk kotdâ, gâṅe puli konok niṅen arekṅe âi ketugure puli koaṅe 10 hain miawagep.”

17 dâambo hin dêep, “Âlepne honj bawane kotne siâ siâ âine âlepneâk ketuguengât nâne kipia bât bip bip hârok are yengât damun kat gektere manbiat.”

18 Hain dâambo benne honj bawa siâne gam hin dêep, “Luâk koldâ, gâne puli koane konok ninen arekne âi ketugure koane momerâk miawagep.” dâambo

19 hin dêep, “Âlepne arim âmâ kipia momerâk are yengât damun manben.”

20 Hain dâambo benne honj bawa siâne âmâ gam hin dêep, “Gâne puli koane konok ire ninen a ainâk sângumnande katipkom katere tatmap.”

21 Gâ luâk hengân gugak kotne siâ siâ bo mem olojmenâ âmâ bikjande mem miawakmai are yengât memberâm aregât ukenne akmat. Akto gugak âi bo kâmetmat. Bikjande âi kalam ketugumbiâ bunne miawakto memberâm aregâlâk mârurum tatmat. Hain akmat aregât puli ninen ire heambukbop dâm sângumnande katipkom katere tatmap.” dêep.

22 Hain dâambo hin dêep, “Gâmâ honj bawa bâlene dondâ. Gugak den maktât aregât keige mem miawakbe. Nunak kotne siâ siâ bo mem olojdere âmâ bikjande mem miawakbiâ are membe dâman. Akto nunak are bo kâmetmâ bikjande kâmetbiâ bunne miawakto âmâ nembe dâman a nângât.

23 Keine hain nângâm puli giân are luâk yengâlân kalen dâine âi ketugumbiâ sambelembo membom ina gâne are bo agen.” dêep.

24 Hain dâm maganmâ luâk âmbâle kili are hin makyengiep, “Puli wanjan are bâtjanba mem âgâ luâk 10 mendâp are wanjet.” dâambo

25 hin dâyi, “Hain bo. Yâk emelâk 10 mendâp aten.” dâyi.

26 Aregât hin makyengire nângânet. Luâk siâ kotņe siâ siâ talaņdâp are mem humo ketugumbo are âmâ purik katmâ waņbian. Akto luâk siâ kotņe siâ siâ talaņbiap are biwiņande bo lokom manbiap are âmâ keņgoņmâ membian. Mendere yân manbiap.

27 Akto gasalupnande nângâ yâkgât luâk kotdânennņe bo malâk dâm magi yâk meyekmâ nângâlân gambiâ yektere yeņgumbiâ moņet.” dâep.

*Yesuņe Yerusalem kipian âgâm ariep.*

28 Yesuņe den are makmâ metem luâk âmbâle kâmot humo are hepun yekmâ Yerusalem kipian âgâwerâm ariep.

29 Arim Oliwa gimbâņân âgâm âmâ Betepage akto Betania kipia lâuwâ are talewân ariep. Arim Aposolo lâuwâ hin dâm huņgun yetkiep,

30 “Kipia indâre tatâp ain ariet. Arim âmâ doņgi kâmņe siâ luâkņe kakņân bo tatmai are tâkņe hikombiâ kindâp are mem miawakberat. Mem miawakmâ hulaņmâ mem oloņmâ togoet.

31 Hulaņbela âmâ luâk siâņe, “Wangât hulaņdat?” dâm aiyetkumbo âmâ hin dâm magaņberat, Humoņe iregât maktâp. dâwerat.” dâm huņgun yetkiep.

32 Hain dâm makmâ metembo Aposolologâtņe lâuwâ arekņe arim gain dâm makyetkiep hainâk mem miawagiat.

33 Mem miawakmâ doņgi kâmņe are hulaņbela amboņande dâyi, “Niņande makto hulaņdat.” dâmbiâ

34 hin dâyat, “Humoņe iregât dâmba togoet.” dâyat.

35 Hain dâm Yesugâlân mem togombela bâlâpnaet hâk pekeņe kâlep are oloņmâ dongi kakņân kali. Katbiâ Yesuņe âgâ talep.

36 Katbiâ âgâmba luâk âmbâle dondâņe hâk pekeyeņe oloņmâ dâwân mem melalakom dâp watmâ leņgaim arimbiâ hamiyenân dongi kakņân watyekmâ ariep.

37 Arim Oliwa gimbâņe ewangim gembo âmâ luâk âmbâle kâmot humo Yesu olop manmini arekņe Yesuņe kulem siâ siâ ketugumbo ekmâ gayi aregât nâņgâm âmâ heroņe akmâ Anutugât kotņe mem agatmâ âmâ Yesugât hin dâyi,

38 “Luâk kembunenņe Kembangât laugât togoâp yâk mepaiņe mene. Egon himbimân biwi sânduk humo miawaktâp. Dâ egon egâlianġ gogâleanġ miawaktâp.” dâyi.

39 Hain dâmbiâ Parisaio konok konok hutyenân kili arekņe hin dâm maganġi, “Tiksa, gâņgât maktâi are sami den makyenġimenâ den yoņâk kinmâ den hepunņet.” dâyi.

40 Hain dâmbiâ hin makyenġiep, “Makyenġire nâņgâņet. Den hepunbiâ âmâ kât irekņe yâk yenġât dumyenân kinmâ heroņe maroņe akbai.” dâep.

*Yesuņe Yerusalem kippia ekmâ okotņe nâņgâm in-diep.*

41 Akto Yesuņe Yerusalem kippia ginņân arim tatmâ âmâ ekmâ biwiņe umatņe akto indem hin dâep,

42 “Yae, kippia ambolupņe, âlepņân manberâm aregât dâpņe emelâk miawagep are egi. Are hinņe

miawaktâp ina dewunyeŋe boktâpgât bo ekmâ nâŋgâi.

<sup>43</sup> Sop siân ain gasalupyenande kipiayeŋe awam mewam ketugum dâp tigi yeŋgiwai. Tigi yeŋgim âmâ watyekbiâ bo akbai.

<sup>44</sup> Bo akbiâ âmâ âmben nanaŋlupyene akto âiângen me kipiangen hârogâk hilip yeŋgum itin gulam ketugu yekmâ yeŋgum om meteyekbiâ kawum yeŋeâk kinbiap. Amâ Anutuŋe togom meyekbiap aregât sopŋe hâkâŋ agigât.” hain dâep.

<sup>45</sup> Den are makmâ metem sumbe emetŋân âgâep. Âgâm âmâ kotŋe siâ siâ aŋgi goaŋgi akmâ tatbiâ yekmâ kuk akmâ watyekmâ hin dâm makyenŋiep,

<sup>46</sup> “Anutugât denŋande hin dâep, “Anutugât emet amâ Anutu olop den makbaigât opmân.” Den hain tatâp ina yeŋe akbiâ âmâ luâk kâmburâ yeŋgât emet hainare aktâp.” dâep.

<sup>47</sup> Akto hilâmŋe hilâmŋe sumbe emetŋân âgâm den potatmâ yeŋgim malep. Hain akmâ mando sumbe kat kat luâk aregât damun akto Mosegât den kârikŋe makmâ kepigi akto humomolupyene hârokŋe Yesu kondeneŋe bo agâk dâm aregât den magaŋgi goaŋgi agi.

<sup>48</sup> Hain akbiâ luâk âmbâle yânŋe bikŋande âmâ denŋe nâŋgâmbiâ âlepŋe dondâ akmap aregât nâŋgâmbi umatŋe akto hepuli.

## 20

*Parisaionŋe aikombiâ Yesuŋe ikinŋaet keiŋe bo makyenŋiep.*

<sup>1</sup> Hilâm siân Yesuḅe sumbe emetḅân kinmâ ikiye den pat âlepḅe dâm potatmâ yeḅgimbo âmâ sumbe kat kat luâk kautḅe Mosegât den kârikḅe makmâ kepiḅi akto humomolupyenande yâkgâlân togom hin dâm aikoyi,

<sup>2</sup> “Makmenâ nâḅgâne. Kulem hinare akmat are niḅaet kârikḅân kinmâ akmat? Niḅande hain akben dâm kârikḅe ḅiḅepgât akmat?” dâmbiâ

<sup>3</sup> hin makyenḅiep, “Akto nâkâ aiyenḅuwe.

<sup>4</sup> Yohanenḅe meyekmâ tuân katyeḅep aregât keiḅe gain gain? Anutuḅe dâmbo agep me luâk yânḅande makbiâ agep aregât makbiâ nâḅgâwe.” dâep.

<sup>5</sup> Hain dâmbo yeḅeak hin dâm maganḅi goanḅi agi, “Anutuḅe dâep hain dâenḅe âmâ dâwerâp, “Dâ wangât denḅe bo nâḅgâm lokoyi?”

<sup>6</sup> Gârâmâ nenḅe, “Luâk yânḅande tâḅgoyi.” dâenḅe luâk âmbâle Yohanenḅe Anutuḅe den maknengiminep dâm aregât kâtḅe mem nenguwâi.”

<sup>7</sup> Hain dâm maganḅi goanḅi akmâ benḅe Yesu hin dâm maganḅi, “O Yohanegât keiḅe bo nâḅgâen.” dâyi.

<sup>8</sup> Hain dâmbiâ hin makyenḅiep, “Akto nâkai hainâk niḅaet kârikḅân kinmâ kulem hin are akman aregât keiḅe bo makyenḅiwerân.” dâep.

*Luâk bâlenḅande kalam damunḅe akmâ tali aregât den umatḅe.*

<sup>9</sup> Yesuḅe den ḅinḅe siâ hin makyenḅiep, “Luâk siânḅe tâk waiḅ aregât âi kâmelep. Kâmetmâ damun katyekmâ hân siânḅen arim sop kâlep malep.

10 Akto bunje miawaktâp me bo aregât sop tâlâgumbo hon bawaŋe siâ bunje bikŋe meâk dâm aregât huŋgun aŋdo damun yeŋgâlân togombo kom watbiâ yânâk purik kalep.

11 Purik kato amboŋande kârikŋe akmâ hon bawaŋe siâ huŋgun aŋdo hainâk arim damun yeŋgâlân togombo kom watbiâ âmâ yânâk purik kalep.

12 Purik kato amboŋande hon bawa âlâwuŋe are huŋgun aŋdo yâk yeŋgâlân togombo hâk hilâlâm waŋmâ kom watbiâ purik kalep.

13 Purik kato amboŋande, “Gain gain akbe?” dâm hin nâŋgâm dêp, “Nune nanne okotne nâŋgaŋman are huŋgun aŋdere arimbo yâkgât den lokom sot âlem yendâp are bikŋe waŋbiâ mem togowiap mon?” dêp.

14 Hain dâm huŋgun aŋdo yâk yeŋgâlân togombo âmâ damunlupŋande magaŋgi goaŋgi akmâ hin dâyi, “O, yâkŋe âmâ âi ire amboŋe akbiap haingât kondeneŋe âi ire nengât akbiap.” dâyi.

15 Hain dâm watmâ hewukŋâŋen panbiâ gembo aregen kombiâ moep. Mondo arekŋeak âi amboŋande gain gain akyeŋgiwiap?

16 Aregât maktere nâŋgâŋet. Amboŋande togom âi damunlupŋe hainâk yeŋgum damun aŋgâ katyekbiap.” dâmbo hin dâyi, “Bo. Hain akto ârândâŋ bo aktâp.” dâyi.

17 Hain dâmbiâ Yesuŋe tâŋâk yekmâ hin dêp, “Ye pâpkoâi. Anutuŋe hain akmap aregât makyeŋgimbo kulemgoyi are hin, “Emet ketuguwerâm âmâ tetembeŋe ekmâ bâleŋe dâm hepuli are tetembeŋe kârikŋe aregât dopŋe aktâp.”



18 Den are bunje akto luâk siâne tetembeje are kâwutmâ hilipkowiap. Akto tetembeje arekne kâwulakmâ ge kondo mombiap.” dâep.

19 Akto Yesune Mosegât den kârikne makmâ kepigi akto yâk yengât keiyene nângâm den ginje are dop yengum makyengimbo nângâm biwiyene bâlimbo ainâk kala busiân katne dâm agi. Hain akberâm agi arekne luâk âmbâle kâmot humo are yengât hamep akmâ hepuli.

20 Hepunmâ hin dâyi, “Hâmbâi Yesune den makmâ hilip kombo âmâ kiapgâlân mem ari-waen.” dâm aregât damun agaņi. Hain akmâ luâk konok konok meyekmâ hin dâm makyengi-yi, “Yesu yoņâk hiaņgim aikombiâ den makmâ hilip kombo aregât kiapgâlân mem arim kombaen.” hain dâm huņgun yengi-yi.

21 Huņgun yengimbiâ Yesugâlân togom lau tu hin dâm magaņi, “Luâk humo, keige nângâen. Den makmat are bunje âlepne. Akto luâk kotdâ are yengât bo hamep akmâ kinmâ Anutugât dâp bunĵânâk maknengimat.

22 Aregât makmenâ nângâne. Roma luâk kotdâ yengât puli katenne ârândâņ akmap me bo?” dâyi.

23 Hain dâmbiâ hiaņgigât keiņe biwiyenân ekmâ nângâm hin dâep,

24 “Puli koaņe mem hekat niņbiâ ekbe.” dâambo mem hekalanĵiâ hin dâep, “Ire ekrjet. Niņaet ot-neņe katbiâ tatâp?”

25 dâambo dâyi, “Roma luâk kotdâgât otneņe tatâp.” dâmbiâ hin makyengiep, “Roma luâk kotdâ yengât pat are âmâ luâk kotdâ waņbi. Dâ Anutugât pat are âmâ Anutu waņbi.” dâep.

<sup>26</sup> Hain dâmbô denņe are nânġâmbiâ humo akto luâk âmbâle dondâ kiligât ġain ġain aknerâm ewum pâpkoyi.

*Momonânba agatmâ âmâ anġelo yeņġât dop akbaen.*

<sup>27</sup> Akto Sadukaio luâk bikņande Yesuġâlân togoyi. Sadukaio yâkņe âmâ momonânba agatbaengât dopņe bo tatâp dâm mali. Bo kârikņe hain nânġâm mali. Akto Yesuġâlân togom hin dâm magaņi,

<sup>28</sup> “Luâk humo, Mosenġe den kârikņe siâ hin dâm kulengoep are tatâp. Luâk siâņe âmbâle siâ mendo manmâ luâk are mondo âmâ emiņande kambut mendo nanaņ membiap are âmâ teuņaet pat akbiap. Den kârikņe hain tatâp areġât den pat siâ maktenņe nânġâ.

<sup>29</sup> Emelâk emi teu nâmbulân lâuwâ manmâ teuyeņande âmbâle mem nanaņ bâlâk manmâ moep.

<sup>30</sup> Mondo emiņande kambut areâk mem yâkâ hainâk nanaņ bâlâk manmâ moep.

<sup>31</sup> Mondo benġe emiņe siâņe kambut areâk mem yâkâ hainâk nanaņ bâlâk manmâ moep. Hainâk akmâ manmâ ġam âmâ emi teu nâmbulân lâuwâ arekņe âmbâle konok areâk mem nanaņ bâlâk manmâ mom meteyi.

<sup>32</sup> Hain akmâ mom metembiâ âmbâle kambut are bânġangen moep.

<sup>33</sup> Akto luâk nâmbulân lâuwâ arekņe âmbâle konok areâk meyi areġât hâmbâi momonânba agatbaiân âmbâle are niņaet pat akbiap?” dâyi.

<sup>34</sup> Hain dâmbiâ Yesuņe hin dâep, “Uņak âmâ âmbâle anġi goaņgi akmâ mandâi.

35-36 Dâ titnan sop humoân âmâ Anutuņe nâņgâmbô âmâ dop konogâk manmâ âgâwai. Anutuņe makyenġimbo momoņânba agatbai. Agatmâ aņelo yenġât dop hainare akbai. Haingât luâk âmbâle aņgi goaņgi akbaigât dopņe bo tatâp. Bo kârikņe. Akto ain âmâ Anutuņe dâmbo lâuwâņe bo mombai.

37 Akto momoņânba agatbai areġât Mosenġe den kulengoep are hin tatâp. Lâwin keiņân kâlâp punduņ katmâ oep areġât kulem âmâ luâk âmbâle hârokņe moyi areġât Anutuņe den siâ hin kalep, “Nâmâ Abraham Isaka akto Yakobo yâk yenġât damun.” Den hain dâm kulengoep tatâp areġât keiņe hin.

38 Anutu hâk heambuk are damunyeņe akmap, akto luâk golâ manmai are yenġât damunyeņe akmap areġât Abraham, Isaka, akto Yakobo, âmâ golâ mandâi.”

39 Yesuņe hain dâm makyenġimbo Moseġât den kârikņe makmâ kepigi bikņande hin dâyi, “Luâk humo âlepņe maktât.” dâyi.

40 Hain dâm siâkâ aikowerâm akmâ nâņgâmbiâ umatņe akto hepuli.

41-43 Hain ġârâmâ Yesuņe den hin dâm makyenġiep, “Dawidiņe kep keņgugât kulem hin kulengoep,

Anutuņe nâņġât Humone are hin maganġep, “Ġâ bâte bungen tatmenâ gasalupge keigaet amukņân kâmot katere tâliyekbiat.” dâep.

Hain ġârâmâ Anutuņe huņgun aņdo gem damun nenņe akbiap are Dawidigât hakuņe dâmai hain bo.

<sup>44</sup> Dawidiŋe humoŋaet nâŋgâm nâŋgât Humone, hain dâm kolep aregât yeŋe âmâ gain gain akmâ Dawidigât tepŋân gâtŋe dâmai?" dâep.

<sup>45</sup> Den are makmâ metem purik dâm luâklupŋe makyenŋimbo luâk âmbâle kili arekŋe hin nâŋgâyi,

<sup>46</sup> "Mosegât den kârikŋe makmâ kepikmâ manmai dop hain bo manbi. Yâkŋe âmâ hâk pekeŋe kâlep are kulem melem are luguakmâ dâp arim luâk âmbâle yekmâ herone aknenginŋet dâm aregâlâk nâŋgâmai. Akto den emetŋân âgâm luâk hutyeŋân tatmâ âmâ luâk humomo yeŋgât welam pat dâm yeŋgiyi ainâk nenŋe soŋ tatne dâm aregât akmai.

<sup>47</sup> Akto âmbâle kambut yâk yeŋgât kotŋe siâ siâ meyeŋgimai. Akto luâk âmbâleŋe nenekbiâ humo agâk dâm aregât miapŋân kinmâ Anutu ma- gaŋberâm kinmai. Luâk hain arekŋe aregât dosa dondâ memai. Aregât ye yâk yeŋgât dop bo akmâ manbi." dâep.

## 21

*Âmbâle kambut umburuk siâŋe Anutugât pat dâm puli kalep.*

<sup>1</sup> Hain dâm sumbe kat kat emetŋân tatmâ Yesuŋe dewunŋe panmâ yekto puli siâ siâ humo tatyenŋiep arekŋe Anutugât pat dâm puli katbiâ gembo yegep.

<sup>2</sup> Katmâ arimbiâ âmbâle kambut siâŋe ikinŋe puli gilâm lâuwâk kato giep.

<sup>3</sup> Kato gembo Yesuŋe ekmâ Aposololupŋe hin dâm makyenŋiep, "Bundâk makyenŋiwe. Âmbâle kambut ire umburuk mamburuk manmap irekŋe

puli gilâmñe lâuwâk katâp irekñe âmâ puli humo katâi are hârok ewangi yektâp.

<sup>4</sup> Puli humo tatyenjiâp arekñe âmâ oyanmâ bikñeâk mem ga katâi. Dâ âmbâle kambut ire âmâ hain bo. Yâk âmâ puli gilâmñe lâuwâk talañdâp are hârok katmâ âmâ yân manberâp.” dâep.

*Sumbe emetñe patakom hilipkawai aregât magep.*

<sup>5</sup> Hain dâmbo Yesugât kâmot bikñande sumbe emetñaet hin dâyi, “Emet iregât ambolupñande Anutugât opmân aregât dâm kotñe siâ siâ katbiâ humomoñe are mem sumbe emetñe ketuguyi.” dâyi.

<sup>6</sup> Hain dâmbiâ Yesuñe hin dâm makyenjiap, “Opmân yu ektâi ire hâmbâi togom hârem gagaim itin gulam ketuguwai.” dâmbo

<sup>7</sup> hin dâyi, “Luâk Humo, den yu maktât ire âmâ sop amuten miawakbiap? Akto sop are tâlâgumbo âmâ kulem gain gain hinare miawakbiap?” dâyi.

<sup>8</sup> Hain dâmbiâ hin magep, “Bikñande olonyekbiâ han gulip akbâigât keiñe makmâ miawaktere bi-wiyenân katmâ manbi. Keiñe hin. Luâk dondâñe togom nânğât kolân agonakmâ, “Nâ Anutuñe huñgun niñdo geân.” hain dâwai. Akto bikñande âmâ, “Sop tâlâguâp.” hain dâwai. Gârâmâ ye luâk hainare yenğâlân bo dewatiwi.

<sup>9</sup> Akto bugâ hanâk hanâk miawakto aguwai aregât den pat akbai are âmâ nânğâm ain bo hamewakbi. Are soñ miawakbiapgât Anutuñe magep. Dâ dowâk bo miawakbiap.” dâep.

10 Hain dâm den dewatim hin dâep, “Hângât luâk kotdâņe makbiâ tembe lokolupyenande hân siâgât amboņe yeņguwai.

11 Akto mop humo miawakbiap. Akto wan me wan bâleņe miawak yeņgiwiap. Akto wârîņ humo ain membiap. Akto wan me wan hamepņe olowâkņe miawakyenęiwiap. Akto sop ain kulem bâleņe aregât emelâk bo egion dâwai, hain arekņe himbimân miawakto ekbai.

*Biwiyenande Yesugâlân hokatmâ manbai arekņe âmâ Anutugât pat akbai.*

12 Hainare bo miawakto âmâ âi keņe katmâ meyekmâ yeņgum wat yekmâ mem siâ siâ ketugu yekbai. Akto ye nâņgât kotne mem manmai aregât yâkņe denân kat yekmâ kala busi kâlegen kat yekbai. Luâk humo akto kiap are yeņgâlân meyekmâ ariwai.

13 Hain akyenęimbiâ âmâ nâņgât den pat âlepņe aregât keņe makmâ miawakbiâ nâņgâwai.

14 Akto are yeņgâlân kinmâ âmâ den gain gain maktere ârândâņ akbiap aregât nâņgâm bo hanokoakmâ umale akbi.

15 Nâņe nunak memenęe akyenęire lauyenęe owâiņe akto den makbai amâ gasalupyenande denyenęe are mem ge katberâm ewum hâumgowai.

16 Akto sop ain ewe memelupyenęe me emi teulupyenęe tâulupyenęe akto galalupyenęe yâkņeak gasa akyenęim meyekmâ yeņgumbiâ yeņgâlân gâtņe bikņande mombai.

17 Akto sop ain âmâ ye nâņgât kotnaet akmâ manmai aregât yeņgât nâņgâm bâli yeņgim luâk kâmot humoņe gasa akyenęim manmâ âgâwai.

18 Siâ me siâ hain akyeŋgimbiâ nâŋe tânyeŋgure kautyeŋe dumutŋe siâ bo gulip akbiap.

19 Aregât kêrikŋe kinmâ âmâ bo hâkân akbiâ manmanyene bunŋe miawakyeŋgiwiâp.

*Yerusalem kipia mem bâliwai aregât Yesuŋe magep.*

20 Akto gasalupyene yeŋgât tembe loko kâmotŋe kâmotŋe togom Yerusalem kipia ire awam ketugumbiâ âmâ yekmâ hin dâwai, “Hilip nengumbiâ kipia kawum akberâm aktâp.” hain dâwai.

21 Akto sop ain âmâ Yudaia hân ambolupŋe kipiayene hepunmâ hewukŋâŋen pârigim heambukmâ ariwai. Akto Yerusalem kipia kêlegen manbai yâkâ hainâk pârigim ariwai. Akto kipia ginŋâŋen manbai arekŋe wan me wan memberâm purik katmâ kipian bo gawai.

22 Sop ain dosa manbai aregât emelâk kulemgoyi are Anutuŋe bunŋe agâk dâm dosa aregât hâuŋe yeŋgiwiap.

23 Yai, âmâle tepdâ me nanaŋ nam yeŋgim tatbai arekŋe gain gain akbai? Yâk ariwerâm hâk hilâlâm nâŋgâm umatŋe akmâ ewum hâumgowai. Hain akbai aregât hâuŋe âmâ Anutuŋe purikŋe yeŋgimbo hân ambolupŋande yae dâm agatmâ sopanmâ hâk hilâlâm nâŋgâm manbai.

24 Are tembe lokoŋe bikŋe oloŋ yekmâ hânŋe hânŋe meyekmâ arimbiâ hoŋ bawalupyene akmâ manbai. Ain âmâ Anutu bo nâŋgaŋmai arekŋe gasa akyeŋgim Yerusalem kipia itiŋ gulam ketuguwai. Ketugumbiâ kawum akto âmâ manmâ âgâmbiâ âmâ Anutuŋe hin dâwiap, “Nâŋgât bo nâŋgâ niŋmai

are yengât sop bo aktâp.” dâwîawân ain hilip aguwai.

<sup>25</sup> Akto siân âmâ dewutâ hilângât akto hândâkgât me pituŋ me hân akto haru bâliwiapgât kulem keiŋe keiŋe miawakto ekbai. Ekmâ âmâ luâk âmbâle hârokŋe biwiyenŋe agatbiap.

<sup>26</sup> Akto dewutâ me pituŋ arekŋe duwuŋ akmâ kotŋe hanâk hanâk bam gutbai. Hain akbiâ kulem are ekmâ hamewakmâ hin dâwai, “Gain gain akne? Yâgâten arim heambukne?” dâmbiâ okotyenân tuk tuk erâmbo âmâ biwiyenŋe gulip akbiap.

<sup>27</sup> Hain akbiâ pagalenŋe pakpak dâmbo âmâ luâk akmâ geân nâ kârikŋe akmâ hamandat kulewoŋwoŋ kakŋânba gere âmâ nekbai.

<sup>28</sup> Kulem hain miawakto ekmâ dewunyenŋe egon panmâ ekmâ hin dâwai, “O nen bâlenjânba mem oloŋ nenekberâm geâp.” dâwai.” dâep.

<sup>29</sup> Yesuŋe hain dâm den ginŋe siâ hin dâm makyenŋiep, “Ye hâpugât keiŋe ya nâŋgâmai are.

<sup>30</sup> Hâpu tatanŋainŋe gagai akto aregât hin dâmai, “O imâ dewutâ komberâm aktâp.” dâmai.

<sup>31</sup> Hainâk kulem hainare miawakto ekmâ âmâ hin dâwi, “Emelâk humo miawakmâ nen olop mando Anutuŋe damun nenŋe akbiap aregât sop tâlâguâp.” hain dâwi.

<sup>32</sup> Den ire maktere nâŋgâm biwiyenân katŋet. Luâk kâmot yu tatâi irekŋe bo mom golâ manbiâk hainare miawakto ekbai.

<sup>33</sup> Himbim hân haru kârikŋe yembiap dâmai are hârok gulip aguwiap. Dâ nâŋgât den yu maktân ire âmâ kârikŋe akmâ yem âgâwiap. Gulip akbiapgât dop bo tatâp.” dâep.



*Yesuŋe Aposololupŋe makyenŋim, “Biwi golâ manbi.” dêep.*

<sup>34-35</sup> Akto Yesuŋe hin dâm makyenŋiep, “Iren hânân kotŋe siâ siâ keiŋe keiŋe mem aregâlâk nânŋâwâigât biwi golâ manŋet. Akto tu kârikŋe nembîâ wâtŋeŋe bo akto nânŋât nelâm yeŋgiwopgât aregât âkâ hainâk biwi golâ manŋet. Wangât? Hingât. Nâŋe dowâk miawakmâ togowian ain âmâ luâk hârokŋe dosayeŋaet hâuŋe membai. Bo nânŋâm pâlâmŋe manbiâ hami komŋe sân sânâk meyekmap dop hainâk togowian.

<sup>36</sup> Anutugât den konok lokom manmâ biwiyeŋe yâkgâlân kârikŋe tatbiâp aregât nânŋâm hokboâk hokboâk Anutu ulilaŋmâ biwi golâ manmâ âgâmbîâ kulem hainare miawakbiap. Hain akmâ manbiâ nâ miawakmâ kinbian ain bo anjun anŋiwai.” Yesuŋe hain dâm makyenŋiep.

<sup>37</sup> Akto hilâm ârândâŋ sumbe emetŋân âgâm kinmâ den potatmâ makyenŋim malep. Hain akmâ manmâ âmâ emet dâgâambo âmâ Oliwa gimbânŋân âgâm ain tatminep.

<sup>38</sup> Hain akminepgât emet haunŋo luâk âmbâle hamepŋe olowâkŋe denŋe nânŋâwerâm sumbe emetŋân âgâm mendugum lâmgoyi.

## 22

*Yudasîŋe Yesu membian dâm makyenŋiep.*

<sup>1</sup> Akto hombaŋ siâ aregât kotŋe Pasowa dâmini ain sot bo kaulemap omini are tâlâguep.

<sup>2</sup> Akto sop ain sumbe kat kat luâk akto Mosegât den kârikŋe makmâ kepigi yâkŋe luâk âmbâle dondâ are yeŋgât nânŋâm hamep akmâ aregât

Yesu gain gain agan̄den̄je moâk dâm magan̄gi goan̄gi agi. Hain akmâ dâpgât undâgâtmâ mali.

<sup>3</sup> Hain akmâ manbiâ Niambiñe Aposolo siâ Karioto kipian gâtñe kotñe Yudasi are kautñân mendo

<sup>4</sup> sumbe kat kat luâk are yengât damunlupyene akto tembe loko kautñe arekñe magan̄gi goan̄gi akmâ, “Yesu gain gain akten̄je koñet.” dâmbiâ Yudasine arim aregât keñje makyen̄giep.

<sup>5</sup> Den makyen̄gimbo biwiyene âlepñe akto puli wan̄berâm agi.

<sup>6</sup> Hain akbiâ denyene are lokom luâk âmbâleñe aregât keñje nân̄gâwâi dâm aregât yoñâgângen mem miawakmâ âmâ kombai aregât ekmâ watmâ malep.

<sup>7</sup> Akto homban̄ are miawakto hilâm siân lama gâim om nemberâm agi ain

<sup>8</sup> âmâ Yesune Petoro akto Yohane hin dâm makyetkim hun̄gun yetkiep, “Yet arim âmâ homban̄ Pasowa aregât lama gâim âmâ om lâm nengum tatbela togoen̄je nemberen.” dâep.

<sup>9</sup> Hain dâmbo hin dâm aikoyiat, “Emet wan̄ân gâim om lâm yen̄guweret?” dâmbela

<sup>10</sup> hin dâep, “Kipian âgâm âmâ luâk siâne asap lokoakmâ arimbo ekmâ âmâ are hamiñân watmâ arimbela emelan kewugu yelemâ âgâmbô âgâwerat.

<sup>11</sup> Âgâm emet ambon̄je mem miawakmâ hin dâm magan̄berat, “Luâk humonetñande gân̄gât hin dâm maktâp. Emet kâlêne gain hinan̄ luâklupne olop Pasowagât pat om nemberen?

<sup>12</sup> Hain dâm maknetkiâp.” dâm magan̄bela emet kâlêne humo siâ mem âlepñe dondâ ketuguyi are

hekat yetkimbo âmâ âgâm sot wan om lâm nenguwerat.” dâep.

13 Hain dâm hunḡun yetkimbo ariyat. Arim magep hainâk mem miawakmâ maganḡbela emet are hekat yetkimbo siâ siâgât magep hainâk hainâk mem heḡgemgoyiat.

*Yesuḡe Aposolupḡe olop sot neyi.*

14 Mem heḡgemgombela kindo sop akto âmâ aposolupḡe olop penâyetkimbiâ sot neyi.

15 Nem tatbiâ âmâ hin dâm makyenḡieḡ, “Nugumbiâ hâk hilâlâm nânḡâwerâḡgât sop tâlâḡuâḡgât ye olop sot ire nemberenḡât ukeneḡ nânḡân.

16 Akto maktere nânḡâḡet. Nâ hinḡe ye olop sot yu nenden hainâk lâuwâḡe bo nembian arekḡe maleine bunewâk Anutuḡe damunyeḡe akberâm keḡe katbiap âmâ lâuwâḡe nembian.” dâep.

17 Hain dâm waiḡ are nemberâm hâpurâ mem Anutu maḡganmâ mepaiḡe mem hin makyenḡieḡ, “Ire mem potatmâ neḡet.

18 Akto ire maktere nânḡâḡet. Nâ hinḡe waiḡ tu ire bo nem mandere Anutuḡe bâin dâm damunyeḡe akberâm keḡe kato âmâ tu irakḡe nembian.” dâep.

19 Hain dâm sot siâ mem Anutu maḡganmâ mepaiḡe mem munditmâ Aposolupḡe yeḡieḡ. Yeḡim hin dâm makyenḡieḡ, “Imâ nânḡât sunumnaet dop. Nânḡât pat nelâm yeḡiwopḡât sot ire nem manmâ âḡâwi.” dâep.

20 Hain dâmbo nembiaḡ bo akto waiḡ hâpurâ siâ mem hin makyenḡieḡ, “Waiḡ irekḡe Anutuḡât dâp irakḡe miawakto dosayeḡe heḡun yeḡiwaiḡ

aregât nugumbiâ gilâmne gewiap aregât dopņe aktâp. Are yengât pat dâm makmâ hâreân aregât mem neņet.

<sup>21</sup> Akto den siâ ire maktere nâņgâņet. Yengâlân gâtņe siâņe nâņgât nâņgâm bâli niņmâ moâk dâm gasalupne makyengimbo menekmâ nuguwai.

<sup>22</sup> Aregât Anutuņe hin dâm makniņep, “Dâp hainâk arim manbiat.” hain dâm huņgun niņdo aregât dâp hainâk arim mombian. Are âmâ nugumbiâ mombiangât luâk siâņe heniņmâ dâp hainâk oloņnekmâ ariwiap aregât dosa umatņe bâleņe membiap.” dâep.

<sup>23</sup> Hain dâmbo hin dâyi, “Nengâlân gâtņe niņande akbiap?” dâm maganņi goanņi agi.

*Aposololupņande papalakmâ den maganņi.*

<sup>24</sup> Akto Aposololupņande maganņi goanņi akmâ papalakmâ hin dâyi, “Nengâlân gâtņe niņande humonenņe mandâp?” dâmbiâ

<sup>25</sup> hin dâm makyengiep, “Hân siâ siâ yâk yengât luâk humo yâkņe âmâ hoņ bawalupņe meyekto hoņ bawa aganņmai akto hoņ bawa arekņe luâk aņgâņe luâk humo yengonmâ kotyene mem agatmai.

<sup>26</sup> Dâ yeņe âmâ hângât luâk kembu are yengât agak meme hain bo akbi. Gârâmâ yengâlân gâtņe siâņe humo akbian dâm âmâ gegeņe manbiâp. Akto Anutuņe nekmâ luâk humo dâwiap dâm manmâ âmâ ye hârok yengât hoņ bawa akyengiwiâp.

<sup>27</sup> Akto luâk siâņe sot om katyengim tân yengumap are âmâ luâk yânņe dâmai. Dâ luâk siâ âi bo mem yân tato hoņ bawaņande sot om kalaņdo

nemap aregât âmâ luâk humo dâmai. Gârâmâ ye hain bo akbi. Aregât nâkai hain nângâm hoj bawa akyengim tân yengum malân.

<sup>28</sup> Akto nâ hâk hilâlâm kakjân manmâ gan amâ yeje bo hepun nekbiâ biwiyenje nângâlânâk kindo olowâk manmâ gayion.

<sup>29</sup> Hain akbiâ aregât Ewenande damunyeje kat negep hainâk nâje âmâ damunyeje dâm katyek-bian.

<sup>30</sup> Hâmbâi lâuwâje miawakmâ gere âmâ olowâk manmâ nembaen aregât pat kat yengîân. Akto ain âmâ luâk kotdâ yengât tat talân tatmâ Israe luâk kâmot keiân lâuwâ tatbai are yengât den makmâ hâre yengiwai aregât pat katyengîân.” hain dâep.

### *Yesuje Petoro maganep.*

<sup>31</sup> Yesuje hain dâm Petoro hin dâm maganep, “Simon, Simon, matuk helekje are mem pipikoenje tujê ingoen gembo helekje are mem pandenje arimap dop hainâk Niambiñe keige ekberâm aregât aktâp.

<sup>32</sup> Niambiñe hain dâmbo nâje âmâ biwige bâliwop dâm gângât Ewene ulilandân. Ulilandere aregât ulik gulik nângât hâkâj akmâ hamiñân biwigande nângâ niñmâ âmâ galalupge are tân yenguwiat.” dâep.

<sup>33</sup> Hain dâmbo Petoroñe hin dâep, “Humo, gâ kala busi kâlegen kat gekbiâ tatbiat me bugâ mem mombiat âmâ nâ gâ bo hepun gekbian. Nâkâ hainâk akbian.” dâmbo

<sup>34</sup> hin dâm maganep, “Petoro maktere nângâ. Gokorok bo indemboân gâje nângâ yâkgât bo

nânğanman dâm munen akmenâ sop âlâwu akbiap.” dâep.

<sup>35</sup> Hain dâm benne luâklupne hinâk makyengiep, “Emelâk puli bo ito bo kei pekeje bo, hain hunğun yengire arim umburuk akmâ mali me bo?” dâmbo hin dâyi, “Nen umburuk bo malion.” dâmbiâ

<sup>36-37</sup> hin makyengiep, “Nângât den kulemgoyi are hârogâk bunne akbiapgât sopne tâlâguâp. Akto Anutune nângât den siâ dâmbo kulemgoyi are hin, “Bâleje meme yâk yengât kâmolân katbai.” den are nângâlân bunne akberâp aregât ito me iripân me wan me wan tatyengiâp are mem ariwerâi. Dâ yengâlân gâtne bikņande puli me wan me wan bo tat yengiâp yeje âmâ yeņandeân hâk pekeje mem yâk yengimbiâ puli yengimbiâ puli are mem arim bugâ puligowai.” dâep.

<sup>38</sup> Hain dâmbo hin dâm maganĵi, “Humo ire ek. Nengâlân tâwât lâuwâ tatâp.” dâmbiâ hin dâep, “Bâin. Hain talâk.” dâep.

### *Oliwa gimbânĵân âgâm Anutu ulilanĵep*

<sup>39</sup> Hain dâm Yesune hândâk ârândânĵâk kipia are hepunmâ Oliwa gimbânĵân âgâm manminĵep hainâk kipia hepunmâ Oliwa gimbânĵân âgâwerâm hoņ bawalupne kewugu yekto âgâyi.

<sup>40</sup> Âgâm malewân arim hin dâm makyengiep, “Bâleņande mem katyekbopgât in tatmâ Anutu ulilanĵet.”

<sup>41</sup> Hain dâm kat yekmâ getek bam ge tatmâ hin dâm ulilanĵep,

<sup>42</sup> “Apo, gâ nângâmenâ ârândânĵ akto makmenâ âmâ hâk hilâlâm irekņe gam ewanginegâk gârâmâ

nângât den bo. Gângât den kârikņe agâk.” dâm ulilaņep.

<sup>43</sup> Hain dâmbō aņelo siâņe himbimânba gem memeneņe agaņep.

<sup>44</sup> Hain akto biwiņe umatņe akto nângâm kârikņe akmâ lâuwâņe hainâk dâm ulilaņep. Ulilaņdo âmâ ogowak biririk dâm gem gilâm tiriņ târâņ gemap dop hainâk akmâ tiriņ târâņ dâm hânân giep.

<sup>45</sup> Hain akto ulilaņmâ metem Aposololupņe bam yegep. Akto okot yeņe nângâm wâtyeņe hutuk âgâmbō asiņ yeyi.

<sup>46</sup> Asiņ yembiâ yekmâ hin dâep, “Gain akmâ asiņ yendâi? Agatmâ kinņet. Hâwâtyekto bâleņe akbâigât Anutu ulilaņņet.” dâep.

### *Yesu meyi.*

<sup>47</sup> Hain dâm kindo ainâk dondâ togoyi. Togombiâ âmâ Aposolo siâ kotņe Yudasi yâkņe sumbe kat kat luâk are yeņgât humomolupyne akto areyeņgât tembe loko akto Yuda yeņgât kaunsoli are olop halop hogoañmâ den hikoyi are watmâ gasa makyeņgim kewugu yekmâ togo katyekto kinbiâ ba Yesu lokom maņganlep.

<sup>48</sup> Maņgando Yesuņe hin dâep, “Yudasi, luâk akmâ gewiap dâmai are âmâ nâ menekņetgât wangât maņgan nektât?” hain dâep.

<sup>49</sup> Hain dâmbō Aposololupņande siâ siâ akyeņgiwai aregât nângâm hin dâyi, “O humo nângâmenâ tâwâtņe kârâ yekne.” dâyi.

<sup>50</sup> Dâmbiâ are hutyeņân gâtņe siâņe tâwât mem sumbe kat kat luâk humoyeņe siâ yâkgât hoņ bawa siâgât ondopņe bikņe tâwâtņe kârâm hâriep.

51 Kârâm hârembo Yesuņe ekmâ hin dâep, “Hep-unņet.” dâm luâk aregât ondopņe are mendo âlepņe agep.

52 Hain akmâ sumbe kat kat humomolupyene akto yâk yengât tembe lokolupyene hin dâm makyengiep, “Yeņe âmâ nâņgât nâņgâmbiâ bugâ koko luâk akman aregât bugâyeņe loko akmâ menekberâm togoâi mon?”

53 Nâ sop ârândân sumbe kat kat emetņân ye olop manmâ gayion sop ain wangât bo menegi? Dâ uņak ire âmâ Hândâk Amboņe arekņe memeņe akyengîap aregât togoâi.” hain dâep.

*Petoro hamewakmâ, “Nâ Yesugât kâmolân gâtņe bo.” dâep.*

54 Hain dâmbo mem arim sumbe kat kat luâk yengât humoyene aregât emelangen mem ariyi. Mem arimbiâ Aposolo awam akmâ arim meteyi. Akto Petoroņe purik katmâ yonâk yonâk hamiyenângen watyekmâ togoep.

55 Akto emelan mem âgâmbiâ tembe loko bikņe âmâ sombeimân kâlâp om nâņgâm tatbiâ Petoro âkâ hainâk kâlâp nâņgâwerâm yâk yengât hut yeņân ge talep.

56 Hain tatbiâ hoņ bawa âmbâle siâņe ekmâ nâņgâm hin dâep, “O luâk ire âmâ Yesugât kâmolân gâtņe.” dâmbo

57 munep akmâ hin dâep, “Nâ luâk are bo nâņgân. Akto bo ekman.” dâep.

58 Hain dâmbo sop kâlêwâk bo aktoâk luâk siâņe ekmâ hainâk dâep, “Âo gâ yâk yengâlân gâtņe.” dâmbo hin dâep, “Nâ yâk yengât kâmolân gâtņe bo.” dâep.



59 Hain dâm getek sop kâlewâk hin tato luâk siâne ekmâ wâarakmâ hin dâep, “Bundâk gâ yâk olop manmai. Akto gâ Galilaia denân makmenâ nângân.” dâep.

60 Hain dâmbo hin dâep, “Nâ gângât den are pâpkoân.” dâmbo ainâk gokorok indiep.

61 Indembo âmâ Yesu Humoņe purik dâm Petoro tânjâk egep. Ekto âmâ Humoņe den hin dâm maganep are nângâep, “Gokorok bo indemboâk gâņe nângât keine tigimenâ sop âlâwu akbiap.” dâep.

62 Den are nângâm biwiņe umatņe akto arim indiep.

*Yesu mem keiņe hârok mângiyi.*

63 Akto Yesu damungom kili arekņe dewunņân gem den maganmâ sângumņe dewunņe hikom tigim ondopņe hogoyi.

64 Ondopņe hogom hin dâyi, “Ondopge hogoâp aregât kotņe kon.” dâyi.

65 Hain dâm den are maganmâ den bâleņe maganmâ kili.

66 Hain akmâ kinbiâ emet haunđo sumbe kat kat luâk akto Mosegât den kârikņe makmâ kepigi, akto Israe yenğât damunlupyene donđâ mendugu akmâ Yesu kâmot yenņân mem âgâ katmâ hin dâm maganĵi,

67 “Gâņe Anutņe huņgunniņđo geân maktât aregât âmâ keige makmâ miawak.” dâmbiâ hin dâep, “Den ire hâkâņ akberâigât nângân aregât hepunbe.

68 Akto den siâ aiyenğure bo makniņberâi.

69 Gârâmâ sop iregât luâk akmâ geân nâ Anutu kârikne amboje yâkgât bâtnje bungen tatere nek-bai.” dêep.

70 Hain dâmbo hârokne nângâm hin dâm maganji, “Gâne hin dâmat, “Nâ Anutugât nanne mandân.” dâmat are bunne me bo?” dâmbiâ, “Âo, ya maktâi are.” dâmbo hin dâyi,

71 “Siâne siârâm siârâm akbiâ âmâ den âi humo membâen. Emelâk maktâp areâk bugâ neâk.” dâyi.

## 23

*Yesu mem Pilato akto Herote yetgâlân arim denne dâm hâreyi.*

1 Akto Yesu meyi arekne hârogâk agatmâ Yesu mem Pilatogâlân ariyi.

2 Yâkgâlân arim kinmâ hin dâm yâkgât den dâm hiangiyi, “Luâk iregât keine hin. Luâk hârok yenngât biwiyenân nângâ nângâ bâlene lugumap are hin. Roma luâk kotdâgât puli bo katnet dâm aregât makmâ nâ Anutuñe huñgunniñdo geângât damunyeñe akman dâmap.” dâyi.

3 Hain dâmbiâ Pilatoñe aikom hin dêep, “Gâ Yuda yenngât luâk humo me?” dâmbo hin dêep, “Gâne maktât are bunne.” dêep.

4 Hain dâmbo Pilatoñe sumbe kat kat luâk are yenngât humomolupyene akto luâk dondâ ain kili are hin dâm makyenngiep, “Luâk iregât dosa siâ bo tatâp nângân.” dêep.

5 Hain dâmbo kârikneâk konmâ hin dâyi, “Bunne luâk mem hanâk hanâk ketugu yekmâ biwiyenân gem denne hânne hânne ariâk dâm aregât

makmap. Akto Galilaia hânân bam keiņe makmâ ainba Yudaia hânân togom hainâk akmap.” dâyi.

<sup>6</sup> Hain dâmbiâ Pilatoņe hin aiyenguep, “Luâk ire Galilaia hânân gâtņe me?” dâmbô

<sup>7</sup> hin dâyi, “Âo ain gâtņe.” dâmbiâ Pilatoņe hin nâņgâep, “Galilaia hân are Heroteņe damunņe akmap ain gâtņe.” are nâņgâm yâkgâlân mem arinet dâm huņgun yeņgiep. Akto sop ain Heroteņe Galilaia hân hepunmâ Yerusalem kipian malep aregât huņgun yeņgimbo Herotegâlân mem ariyi.

<sup>8</sup> Yâkgâlân mem arimbiâ Heroteņe Yesugât den pat are nâņgâm ekbeâk nâņgâm malepgât Yesu ekmâ âmâ biwiņe heroņe agep. Hain akmâ kulem siâ ketugumbo ekberâm aregât ukenņe nâņgâm malep.

<sup>9</sup> Akto Heroteņe den keiņe keiņe aregât aikombo hâuņe bo magañep.

<sup>10</sup> Hain akto sumbe kat kat luâk akto Mosegât den kârikņe makmâ kepigi arekņe hâkņe tunmâ den umatņe siâ siâ magi.

<sup>11</sup> Hain akbiâ Herote akto tembe lokolupņe yâkņe Yesu dewunņân gem betorok panaņi. Betorok panaņmâ den hembalik mâņgiyi. Hain akmâ Heroteņe dâmbô hâk pekeņe kulemņe âlepņe dondâ siâ mem lugu aņbiâ gembo Pilatogâlân mem purik katmâ ariyi.

<sup>12</sup> Dâ ulikņân Pilato akto Herote gasaņe gasaņe maliat. Akto mem arimbiân âmâ ainâk gala agiat.

<sup>13</sup> Akto Pilatoņe sumbe kat kat luâk akto Israe yeņgât damunlupyene akto luâk âmâle yânņe are yeņgondo togom menduguyi.

<sup>14</sup> Mendugumbiâ hin dâep, “Yeņe luâk ire

nângâlân mem togom yâkgât hin dâm makniñdâi, “Luâk irekñe luâk mem kotñe hanâk hanâk ketuguyekmâ biwiyenân gemap.” dâi aregât nâñe yengât dewunyenân keñe mem miawaktere dosañe bo aktâp.

15 Emelâk Heroteñe makmâ hâreañâk dâm hungun yengire bo akto nângâlân lâuwânje mem togoâi. Nângâi. Luâk ire mombiapgât dosañe siâ bo ektân aregât hin aktere ârândân akberâp.

16 Tembe lokolupne makyengire tâkñeak orem hâk hilâlâm wañmâ hungun anbiâ yân gem ariâk.” dâep.

17 Hain dâm kinmâ sop ain Pasowa homban ârândân nângâ yengim kala busi kâlegen kat yekbiâ tatmini are yengâlân gâtñe konok wato ariminep.

18 Hain akminep aregât luâk âmbâle arekñe moâkgât konmâ kârikñe akmâ hin magañi, “Are âmâ moâk. Dâ yâkgât dumñân Baraba are wamenâ geâk.” dâyi.

19 Akto Barabagât keñe hin. Yâkñe luâk dondâ mem mendugu yekmâ hin dâm makyengiep, “Kiap tembe loko hârok yengum wat yektenje ariñet.” dâm bugâ mem luâk siâ kondo mondo aregât kala busi kâlegen katbiâ talep. Keñe hain.

20 Akto Pilatoñe lâuwânje hin dâep, “Nâmâ Yesu watere gewerâpgât nângân.” dâep.

21 Hain dâmbo den kârikñe konmâ magañi, “Yesu lâwinân kombiâ moâk. Lâwinân kombiâ moâk.” dâyi.

22 Hain dâmbiâ Pilatoñe den koyengim âlâwuñe hin makyengiep, “Bâleñe bo agepgât nângâre dosañe bo tatâp aregât maktere bugânje yânâk

kom mem hulanbiâ yân arim manbiâp.” dâep.

<sup>23</sup> Hain dâambo kautyeŋe orem kârikne akmâ den dâyi hainâk dâyi, “Lâwinân kombiâ moâk” dâmbiâ arim denyenande gewe âgâwe akmâ yendo âmâ Pilatogât den are mem ge kali.

<sup>24</sup> Mem ge katbiâ Pilatoŋe den dâyi aregât bunŋe miawagâkgât dâm aregât makmâ hâre yeŋgiep.

<sup>25</sup> Hain akmâ denyeŋe lokom Baraba luâk koko akto den koko luâk are hulanmâ yâkgât dumŋân Yesu moâk dâm makmâ hâreaŋep.

*Yesu lâwinân kombiâ moep.*

<sup>26</sup> Hain dâambo arim luâk siâ dâwân gembo egi kotŋe Simon, Kirene kipian gâtŋe yâk âiângenba togombo lâwin ire loko dâm maganji. Maganmâ Yesugât lâwin are kamberân katbiâ lokom hamiŋân arimbo luâk kâmot humo hamiyenân ariyi.

<sup>27</sup> Arimbiâ hutyeŋân âmbâle bikŋande okot dondâ nâŋgâ aŋmâ indem ariyi.

<sup>28</sup> Akto Yesuŋe purik katmâ yekmâ hin dâep, “Yerusalem âmbâle nâŋgât bo indenŋet. Yeŋaet akto nananlupyene yeŋgât indenŋet. Maktere nâŋgâŋet.

<sup>29</sup> Hâmbâi yeŋe hin dâwai, “Bâe, âmbâle gupin, âmbâle sigan yânâk nanan bo meygât nâŋgâenne âlepŋe aktâp.”

<sup>30</sup> Hain dâm ain gimbâŋe iregât hin dâwai, “Hogoakmâ gem tigi nenegâk.” dâwai. Akto hemem keiŋân kinmâ, “Gem nenguâk.” dâwai.

<sup>31</sup> Aregât hin dâre nâŋgâŋet. Lâwin golâ ombiâ âmâ bo omap. Dâ lâwin momoŋe âmâ ombiâ dondâ omap. Aregât gain gain akbai.” dâm makyenŋiep.

<sup>32</sup> Akto bâleŋe meme luâk lâuwâ biken biken yâk olowâk yeŋguwerâm meyelekmâ ariyi.

<sup>33</sup> Arim hân siâ kotŋe kaut hagit ain arim lâwinân koyi. Kom âmâ bâleŋe meme luâk lâuwâ are biken biken kat yelekmâ yetkuyi.

<sup>34</sup> Olowâk yeŋgumbiâ Yesuŋe hin dâm Anutu maganep, “Apo yu akniŋdâi ire âmâ keine bo nâŋgâm kinmâ akniŋdâi aregât dosayeŋe hepun yeŋgiwen.” dâep. Hain dâmbo tembe loko arekŋe Yesugât hâk pekeŋe memberâm aregât kulem esenŋe bâleŋ maleŋ oyaŋmâ puli memai dop hain akmâ anŋiyi.

<sup>35</sup> Akto luâk âmbâle kâmot humo kinmâ tâŋâk eksiâ Israe yeŋgât damunlupyenŋe arekŋe dewunŋân gem den hin dâm maganji, “Emelâk luâk dondâ tân yeŋgumbo âlepŋe agi. Akto ikinjaet hin dâmap, “Nâ Anutugât nanŋande ewenande huŋgunniŋdo gem damunyeŋe akmâ mandân.” dâmap aregât lâwinânba sopanmâ geâk.” dâyi.

<sup>36</sup> Hain dâmbsiâ tembe loko yâkŋe hainâk dewunŋân gem waiŋ tu ŋasukŋe bâleŋe are mem waŋmâ hin dâyi,

<sup>37</sup> “Gâ Yuda yeŋgât luâk humo mandât akto âmâ pekmâ sopanmâ ge.” dâyi.

<sup>38</sup> Hain dâm Yesugât lâwin ulikŋân hin dâm kulemgom kali, “Ire Yuda yeŋgât luâk kembu.”

<sup>39</sup> Akto bâleŋe meme siâ Yesugât enemŋe biken lâwinân kombiâ kilep arekŋe hainâk Yesu dewunŋân gem hin dâep, “Bundâk, gâ Anutuŋe huŋgun giŋdo damun nenŋe akberâm gien akto âmâ tân netkumenâ nen hârok sopanmâ gene.” dâep.

<sup>40</sup> Hain dâmbo galaŋe siâ Yesugât enemŋe biken

kombiâ kilep arekne hin dâm galaņe are magañep, “Gâ bugâgât pat aktât arekne gain gain akmâ Anu-tugât hamep bo akmâ hain dât? Amâ bo agakne aktât.

<sup>41</sup> Net âmâ dosanetne tat netkiâp aregât wan me wan aknetkimbiâ âmâ ârândâņ aktâp. Dâ luâk ire âmâ dosane bo ina hanâk agañdâi.” dâep.

<sup>42</sup> Hain dâm magañmâ benne Yesu hin magañep, “Yesu, lâuwâne damun nenne akberâm miawakmâ gewiat sop ain nâņgât nâņgâ niņben.” dâep.

<sup>43</sup> Hain dâmbo Yesuņe hin magañep, “Bunne makņindere nâņgâ. Hinne emet boâk dâgâmbo mom Anutuņe tatmawân arim tatberet.” dâep.

### *Yesu moep.*

<sup>44</sup> Hain dâmbo hilâm tânâmņe akto ain dewutâ are heambukto hândâk agep. Hândâk akmâ yendo enğaiņe agep.

<sup>45</sup> Akto hândâk agep ain sumbe kat kat emetņaet dawalaunę aregât sâņgum kâlep humo tigiyi arekne tânâmņânba hioņakmâ bikne bikne agep.

<sup>46</sup> Hain akto Yesuņe hin dâep, “Apo, otnene gâņgâlân purik kalâkgât nâņgân.” hain bân dâm manmanņe palep.

<sup>47</sup> Panakto tembe loko yengât humoņe ekmâ nâņgâm âmâ Anutu maņganmâ hin dâep, “Bundâk, luâk iregât dosane bo.” dâep.

<sup>48</sup> Hain dâmbo luâk kâmot humo are ekberâm togo kili arekne kulem miawagep are ekmâ bi-wiyenę bâlimbo nâņgâm bâlim ariyi.

<sup>49</sup> Akto Yesugât nâņgâm âmbâle bikņande Galilaia hân hepunmâ Yesu watmâ togoyi yâk olowâk

kâlewângen kinmâ kulem miawagep are ekmâ nângâyi.

<sup>50</sup> Akto luâk siâ malep kotje Yosepe, are Ari-mataia kipia Yudaia hânân talep ain gâtje. Akto yâk Yuda yengât kaunsoli mali yâk yengâlân gâtje. Akto luâk are âmâ âlepje gala konok malep.

<sup>51</sup> Hain gârâmâ galalupjande Yesugât den makmâ hâreaŋmâ kombiâ moâk dâmbiâ âmâ biwiŋande nângâmbo ârândâŋ bo agep. Hain akmâ Anutuŋe damun nenje akbiap aregât ukenje nângâm lâmgom malep.

<sup>52</sup> Luâk arekje Pilatogâlân arim Yesugât hâkje mem arim hangowerâm aregât maganep.

<sup>53</sup> Maganjo âlepje dâmbi arim lâwinânba mem gem sângum kau kau siâŋe katipkom lokom arim kât dâpje siâ sumgât dâm kepikmâ hepunbiâ yân kilep ain kalep.

<sup>54</sup> Ain âmâ hole âmâ âi meme sopje bo dâm aregât Yesugât hâkje ain kalep.

<sup>55</sup> Akto emet dâgâmbo âmâ âmbâle bikje Galilaia hân hepunmâ Yesu watmâ togoyi arekje Yosepe olop arim Yesu sumân kalep are egi.

<sup>56</sup> Ekmâ tu higenne âlepje are puligowerâm aregât kipiangen purik katmâ ariyi. Akto Moseŋe den kârikje siâ kulemgoep are hin, “Sarere akto ain âi bo ketugum yân tatmâ nângâwi.” den are lokom kipian yân tatmâ nângâyi.

## 24

*Yesu momoŋânba agalep.*



1 Akto sonda hândâk pipiņe tatoâk âmbâle arekņe tu higenņe pindindiņ dâm yendo are mem sumângen ariyi.

2 Arim ekbiâ kât humo siâņe lâm dâpņe tigiyi are hindakmâ siângen arimbo launje miawâk kilep.

3 Hain akmâ kindo gem Yesugât undâgâli.

4 Undâgâtbiâ bo akto kinbiâ ainâk aņelo lâuwâ hâk pekeyetņe kau kau dondâ arekņe miawakmâ kiliat.

5 Kinbela yelekmâ hamep akmâ kâņgom kinbiâ hin dâm makyenģiyiat, “Ye wangât golâ mandâp aregât undâgâtmâ sumân togo kindâi?”

6 Yâk iren bo yendâp. Emelâk agatmâ ariâp. Akto ulikņân Galilaia hânân manmâ den makyenģiep are nelâm yenģiep mon? Emelâk hin dâm makyenģiep,

7 “Luâk akmâ geân nâ menekmâ makbiâ luâk bâleņande nugumbiâ mombian. Mondere hilâm âlâwu bo akto sumânba agatbian.”

8 hain dâm makyenģiminep.” dâyiati. Hain dâm makyenģimbela biwiyenje pâron dâmbo den are nâņgâm heņgemgoyi.

9 Nâņgâm heņgemgom sum are hepunmâ purik katmâ arim Aposololupņe bāt bip bip hârok keiân konok are akto olowâk mali yâk den pat are makyenģiyi.

10 Akto âmbâle are kotyenje âmâ hin. Maria Madala kipian gâtņe akto siâ Yohana, akto siâ Maria Yakobogât memenje.

11 Yâkņe âmâ lâulupyenje bikņe olop arim Aposolo den pat are makyenģiyi. Makyenģimbiâ nâņgâmbiâ bunje bo agep.

12 Hain akmâ Petoroŋe agatmâ sumângen pârigim arim sângum lâuwâ arekŋe konok talep are ekmâ nâŋgâ nâŋgâŋe gulip akto emetŋân purik kalep.

*Yesuŋe galalogâtŋe olop ariep.*

13 Akto hilâm ainâk Yesugât kâmot are yengâlân gâtŋe lâuwâ siâŋe Emausi kipia Yerusalem kipia okotŋângen talep ain ariwerâm ariyat.

14 Arim dâwân wan me wan miawagep aregât magaŋgi goaŋgi akmâ ariyat.

15 Arim magaŋgim ai agum bao guto manbela dâwân Yesuŋe penâyetkimbo olowâk ariyi.

16 Arimbiâ Anutuŋe nâŋgâ nâŋgâyetŋe mem gisapkombo yâk bo ekmâ nâŋgâyat.

17 Hain akbela aiyetkum hin dâep, “Gain gain? Niŋaet magaŋgi goaŋgi aktat?” dâambo hâme yetŋe bâlimbo kiliat.

18 Hain akmâ kinmâ luâk siâ kotŋe Keleopa arekŋe aikom hin dâep, “Yerusalem kipiangenba Sarereân togoyi arekŋe den pat ire makbiâ luâk âmbâle hârokŋe nâŋgâm mandâi. Dâ gâmâ gain gain akmâ bo nâŋgâm mandât?” dâep.

19 Hain dâmbela aiyetkum hin dâep, “Wan denŋe?” dâambo dâyat, “Yesu Nasarete kipian gâtŋande hin agep aregât den pat. Yâkŋe âmâ Anutugât hoŋ bawa humo malep. Manmâ Anutugât dewunŋân akto luâk âmbâle yengât dewunyeŋân den âlepŋe magep akto âi kârikŋe ketugum malep.

20 Hain akmâ mando sumbe kat kat luâk humomolupyenŋe akto humomolupnenŋande moâk dâm makmâ hâreaŋmâ kiapgâlân katbiâ makto

lâwinân kombiâ moep aregât den pat maganji goanji akmâ mandet.

<sup>21</sup> Akto nengât gasalupnenne yengum watyekto ariwai hain nângâyion ina kombiâ mondo mandenne emelâk hilâm âlâwu bo aktâp.

<sup>22</sup> Akto unjak nengâlân gâtne âmbâle biknande den siâ maknetkimbiâ nângâm han lâuwâ aktet. Amâ hândâktâk âmbâle arekne Yesu hâkne ekberâm sumângen arim

<sup>23</sup> undâgâtbiâ bo akto purik katmâ togom hin dâi, “Anjelo lâuwâ siâne miawak nengim Yesu momonânba agatâp.” dâm maknengiâi. Hain maknengimbiâ nângâenne dâtne aktâp.

<sup>24</sup> Aregât nengâlân gâtnde den maktâi hainâk arim mem miawaktâi. Akto ikinje âmâ bo ektâi.” dâyat.

<sup>25</sup> Hain dâm maganbela hin dâep, “Han biwiyetne pâlâmne akto nângâ nângâyetne umatne. Emelâk Anutuje den dâmbo kulemgoyi are nângâm ewum hâumgombela ârândâj bo aktâp. Haingât hin maktere nângâet.

<sup>26</sup> Bundâk Anutuje hunjun anjo giep are hâk hilâlâm kaknân manmâ mom agatmâ himbimân âgâwiap.” dâep.

<sup>27</sup> Hain dâm ulik gulik Mose akto propete biknande Anutuje hunjun anjo gewiap aregât den kulemgoyi aregât keine makyetkim ikinjaet pat makmâ miawakmâ metiep.

<sup>28</sup> Hain akto arimbiâ Emausi kipia are tâlâguep. Tâlâgumbo hepun yelekmâ ariwerâm agep.

<sup>29</sup> Hain akto âmâ hin dâyat, “Emet dâgâwerâm aktâp aregât olowâk tatne.” dâmbela emelan

olowâk âgâyi.

<sup>30</sup> Âgâm sot nemberâm akmâ ge tatmâ sot ogoŋe siâ mem munditmâ Anutu mepaiŋe mem sot yetkiep.

<sup>31</sup> Yetkimbo ainâk biwiyetŋe pâroŋ âgâmbo ekmâ nâŋgâyat. Ekmâ nâŋgâmbela benŋe ainâk heambugep.

<sup>32</sup> Heambukto makmâ maganŋi goanŋi akmâ hin dâyat, “Âo, dâwân togoetŋe Anutuŋe makto kulemgoyi aregât keiŋe siâ siâ dâm maknetkimbo biwinetŋe agatâp.” dâyat.

<sup>33</sup> Hain dâm dowâk agatmâ kipia are hepunmâ Yerusalem kipian ariyat. Arimbela hoŋ bawa bât biken konok are akto luâk âmbâle bikŋe olop mali arekŋe yelekmâ hin dâm makyetkiyi,

<sup>34</sup> “Humo are bunŋe agatmâ Simonŋ miawaganep.” dâmbiâ

<sup>35</sup> Humoŋe dâwân penâyetkim sot ogoŋe siâ mem munditmâ yetkimbo âmâ ekmâ nâŋgâyat aregât den pat are makyenŋiyat.

### *Aposololupŋande Yesu egi.*

<sup>36</sup> Den hain makyenŋimbela tatbiâ Yesu ikiŋak hutyenân miawakmâ kilep.

<sup>37</sup> Miawakmâ kindo ekmâ sân sân mem hamep akmâ hin dâyi, “Otno siâ togoâp.” dâyi.

<sup>38</sup> Hain dâmbiâ hin makyenŋiep, “Wangât biwiyenŋe agatmâ hogoâp? Nâ nunak togoân.

<sup>39</sup> Keine bâtne ire ekŋet. Howai nekmâ nâŋgâm heŋgemgoŋet. Nâ otno bo.” dâep.

<sup>40</sup> Den hain makyenŋim bâtŋe keiŋe koyi are hekat yenŋimbo

<sup>41</sup> benne biwiyene herone nângâm han lâuwâ agi. Hain akmâ, “Ire bo agakne” dâyi. Hain dâmbiâ aregât hin dâep, “Sot siâ tatâp me bo?” dâmbo

<sup>42</sup> injan siâ oyi are wanji.

<sup>43</sup> Wanbiâ nendo egi.

<sup>44</sup> Nem metem hin makyengiep, “Emelâk ye olowâk manmâ âmâ den makyengiân Mose akto propete luâk bikne akto Dawidi yâkne nângât nângâm den kulemgoyi are hârogâk bunne akberâm aktâp.” dâm makyengiep.

<sup>45</sup> Hain dâm makyengim Anutugât den uliknân kulemgoyi aregât nângânet dâm nângâ nângâylene mem hulando den are nângâm hengemgoyi.

<sup>46</sup> Akto hin dâm makyengiep, “Propetene nângât hin kulemgoyi, “Anutune hungunando gewiap are hâk hilâlâm nângâm mondo hilâm âlâwu bo akto ain momonânba agatbiap.”

<sup>47</sup> Akto aregât den pat âlepne arekne sambelem hân hârok arimbo âmâ agak meme bâlene yâkgâlânâk panbiâ arim kindo bâleyene makmâ miawakbiâ dosayene hepun yengiwiap. Akto maktere nângânet. Uliknân nângât den pat arekne Yerusalem kipia ainba

<sup>48</sup> arim hânne hânne ariwiap. Akto âi mendere miawakto egi are makyengiwi.

<sup>49</sup> Akto Ewenande ikinje Heakne âlepne are yengât hungun anbiap aregât pat kat yengiep are hungun andere gewiap. Aregât kipia ire bo hepunmâ yân lâmgom manbiâ indâgen miawakmâ gem memene akyengimbo wâtân kinbai.” dâep.

<sup>50</sup> Hain dâm oloj yekmâ Betania kipia ewumâk arim âmâ bâte panmâ mem kârikne ketugu

yegep.

<sup>51</sup> Mem kârikņe ketugu yekmâ hepunyekmâ himbimân âgâep.

<sup>52</sup> Âgâmbo biwiyenę heronę humo akto nângâm purik katmâ Yerusalem kipian ariyi.

<sup>53</sup> Purik katmâ arim sumbe emetņân âgâm Anutugât kotņe mem agali.

**Yusugât Pat Âlep Den**  
**The New Testament in the Timbe Language of Papua**  
**New Guinea**  
**Nupela Testamen long tokples Timbe long Niugini**

copyright © 1987 Wycliffe Bible Translators, Inc.

Language: Timbe

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-10-23

---

PDF generated using Haiola and XeLaTeX on 18 Apr 2025 from source files dated 31 Aug 2023

03f82704-6ad1-5094-a78e-e240d9f2d4f8